



808

3-70





ՀԱՅԱՍՏԱՆԻ ՀԱՆՐԱՊԵՏՈՒԹԵԱՆ


ԱԶԳԱՅԻՆԿԱՆ ՄԱՐԴԱԲԱՆԱԿԱՆ
ՊԵՏԱԿԱՆ ՔԱՆՏԱՐԱՆ-ԳՐԱԴԱՐԱՆԻՆ

ԱՂԷՔՍԱՆԴՐ ՄԵԼԻՔ ԱԶԱՐԵԱՆԻՅ

11 3

ԱՌՁԵՌՆ

ՃԵՐՏԵՍԵՆՈՒԹԻՒՆ



Handwritten text in a non-Latin script, possibly Indic or Persian, appearing as a faint, mirrored impression.

Handwritten text in a non-Latin script, possibly Indic or Persian, appearing as a faint, mirrored impression.

808

Այ.

30 MAY 2005

Հ-70

Ա Ռ Ձ Ե Ռ Կ

ՃԵՐՏԱՄԱՆՈՒԹԻՒՆ

ՀԱՄԱՌՕՏԵԱ

Ի Տ Ե Գ Ո Ւ Ա Բ Դ Ա Յ Վ Ա Բ Դ Ա Պ Ե Տ Ի

Հ Ի Ի Մ Ի Զ Ե Ա Ն Մ Ի Թ Ա Բ Ե Ա Ն Ց

6026



Ի Վ Ե Ն Ե Տ Ի Կ

Ի Ս Ո Ւ Բ Բ Ե Վ Ա Ջ Ա Բ

1922



1859

Имени А. Мясникова


808
5-
NY. 30 MAY 2002

2654-62

STATION

STATION
STATION

FORM



STATION
STATION
STATION

Յ Ա Ռ Ա Ջ Ա Ւ Ա Ն


Որ մինչև ցայժմ հսկողականին կանոնաց կացին աւանդիչք յազգիս, քանզի կէտ առաջի եգեալ էր նոցա 'ի ծայր արուեստին ածել զհամբակս, ոչ էր մարթ նոցա 'ի սուղ մատենի վարժապետել:

Այլ քանզի ստուարութիւն գրոց խրատցանէ զբազումս՝ որք ոչ 'ի գագաթն արուեստին վերանալ ցանկան, ոչ անօգուտ թուի զկարևորագոյնս 'ի կանոնաց նորա համառօտել: Որով կիտոց դիւրեացին վերելք բարձուտաճարին, նախ 'ի գիրս յայս կրթեալ, և աստի ապա 'ի վարժս բարձրագոյն դասուն անցեալ. իսկ այլոց, որք առ ստորոտովքն ևեթ գեգերել կամին, մարթ իցէ դէթ աղօտաբար զգեղեցկութիւնս նորա նկատել: Նմին իրի որպէս զքերականութեանն, նոյն փոյթ եղև մեզ և զգուռն ճարտասանութեան կազմել գիւրամտանելի ամենեցուն Առձեռն մատենիւս, առ հեշտի համբակաց և վարժապետաց:

Այսին որոյ մի ոք մեզագրեացէ զմեզ իբր
օտարին վատակոյ յափշտակող, առ սանելով ՚ի
սմա բազում ինչ յերկուց առաջնոցն մերոց
հռետորաց ժողովեալ, քանզի մեզէն իսկ
խոսատւանիմք, զի գրեթէ զնոյն նոցին բանս
հոգացաք համառօտել. և զքերթողականին
իսկ կանոնս ՚ի գաղղիական քերականէն ՚ի կիր
առեալ, որ նախ առաջին զայնցանէ գրեաց:
Զի ոչ ինչ ամօթ համարիմք զհոգեկցորդ և
զուսումնակից եղբարցն մերոց և զլարթասու-
տաց ճոխութիւնս ՚ի կիր առնուլ, զմատենա-
գրի անուան ոչ թեկն ածելով:

Ազաչեմք ևեթ զուսուցիչս մանկուոյ, ընուլ
զթիւրին համառօտութեանս, և վերլուծանել
համբակաց զօրինակս ձևոց ածեալս այսր առ
՚ի նախնեաց, և տալ նոցա ՚ի միտ առնուլ թէ
որակս մարթէր զնոյն բանս պարզաբար առանց
ճարտասանական ձևոց ասել, և թէ յորում
օրինակացն իւրաքանչիւր իցեն գեղեցկու-
թիւնք, զոր ոչ էր մարթ առնել մեզ առանց
ստուարացուցանելոյ զմատենաս:

ՃԱՐՏԱՆՈՒԹԻՒՆ



ԳԱՍ Ա

Ընդհանուր գիտելիք շարտասանութենէ :

Հ. Օր^ն շ է ճարտասանութիւն .

Պ. Արուեստ բարևոք խօսելոյ :

Հ. Քանի՞ ինչ կարևոր են առ բարևոք խօսել .

Պ. Արեք, պարզութիւն, վայելչութիւն, զօրութիւն :

Հ. Օր^ն յօրինի պարզութիւն 'ի խօսս .

Պ. Պարտ է զսեփական զազգային ըզնախնի ընտիր մատենադրաց զբառս ըստ բնիկ նշանակութեան, և զնոցին եղանակս բանից 'ի կիր արկանել, և մի՞ զեկամուտս, զնորահնարս և զանսովորս :

Վրին իրի պարտ է ճարտարախօսի յաճախել 'ի վերժանութիւն քաջաց մատե

նագրաց, և ներկուռ 'ի բնիկ բարբառն գոր:

Հ. Ապա ուրեմն ոչ է մարթ ճարտարել բառս արտաքոյ այնոցիկ՝ որ առ մատենագիրս գտանին .

Պ. Մարթ իսկ է ըստ պատշաճի յօրինել ածանցականս և բարդել, այլ խնայելով և բազում զգուշութեամբ ըստ քերականական խիստ կանոնաց :

Հ. Աւ իցէ բաւական առ 'ի պարզութիւն երկիւղած նմանութիւն նախնեաց 'ի բառս և յեղանակս բանից .

Պ. Ամենեւին ոչ զի այդ նիւթական և եթ է պարզութիւն, այլ կարևորագոյն ևս խնդրի պարզութիւն իմաստից, վասն որոյ սլարտ է ճարտարախօսին քաջ երկնել 'ի մտի զիմաստս, ասպա ծնանել : Սի եթէ որ խօսին՝ ոչ քաջ ըմբռնիցէ զիմաստս, անհնարին է թէ պարզ իմացուցէ զայն որում խօսին :

Առ այս կարևոր է զգուշանալ և 'ի կարի համառօտութենէ 'ի բացատրելն զիմաստս, և 'ի հակառակէն այնորիկ յաւելորդ շատախօսութենէ :

Հ. Կարիցես օրինակաւ պարզաբանելինձ զվարդապետութիւնդ .

Պ. Բուզանդայ կամելով ասել և եթ վասն եպիսկոպոսին Պանիէլի, թէ յաւուրս ձմերայնոյ խորհէր զնալ ուրեք ընդ

ձիւնախաղաղ լերինս , այսպէս բազմաբա-
նութեամբ անիմանալի առնէ զբանն .

« Յաւուրս ձմերայնոյն՝ յորժամ կուտեալ
« դիզեալ մեծութիւն բազմութեան թանձ-
« րութեան ձեանց , կուտակեալ հիւսեալ
« ձեանց ՚ի վերայ ձմերային լերանց , յայն-
« պիսի լերանց վերայ , ընդ այնպիսի ժա-
« մանակի կամէր ուրեք երթալ ՚ի պէտս
« ճանապարհի » :

Հ . Օ ինչ թերութիւն գտանես ՚ի բա-
« նիս . « Ալ հանգեան ընդ վարսագեղ ծա-
« ոռմն , որ շուք մեծ ՚ի սլարտիզի անդ գոր-
« ծէր » .

Պ . Մարթի բառիցն ընտիրս գոլ և զբը-
նիկ նշանակութիւն իւրեանց պահել , և
իմաստիցն յերկաքանչիւրոց ևս ծայրայեղ
խոտորմանց հեռի կալ՝ յաւելորդաբանու-
թենէ և ՚ի կարի համառօտութենէ , այլ
երկդիմութեամբ միոյ ՚ի բառիցն կորու-
սանել զպարզութիւն . որպէս բառդ շ-
աստանօր՝ զվայելչութիւն և զհովանի ան-
խտիր նշանակելով :

Մարթ է յաճախագոյն ևս ՚ի յոռի շա-
րագրութենէ բառից կորուսանել բանին
զպարզութիւն . վասն որոյ պարտ է ճար-
տարախօսի յիշել միշտ զառ ՚ի նախնեացն
աւանգեալ սահման քերականութեան , զի
« Քերականութիւն է հմտութիւն , որք ՚ի

« քերթողաց և 'ի շարագրաց իբրու բա-
« զուժանդամ ասացելոց » . այսինքն է զի
ոչ զամենայն եղանակս բանից նախնեաց
օրէն է 'ի կիր արկանել, այլ զյաճախագոյն
առ 'ի նոցանէ 'ի կիր արկեալս :

Հ. Օ իմրդ վայելուչ և զօրաւոր յօրի-
նին ճառք .

Պ. Աչ է մարթ համառօտիւ զպատաս-
խանի առնել հարցուածոյդ . զի դա հարկ
առնէ ինձ զամենայն ազգս ազգս հանդի-
սից ճարտասանութեան առաջի առնել, և
զիւրաքանչիւր նոցա սլատշաճեալ ձևս առ
'ի զարդ և զօրութիւն, և զքերթողակա-
նին իսկ փոքր 'ի շատէ տալ զկանոնս :

ԴԱՍ Բ

Երէք ազգք ճարտասանութեան : — Յա-
ռաջաբանութիւն . — Առաջարկութիւն .
— Բաժանումն :

Հ. Քանի՜ ազգ են ճարտասանութեան .

Պ. Արրեակ . կացրդական, բաղխոհա-
կան, ատենական :

Հ. Օ ինչ է կացրդականն .

Պ. Պարսաւ կամ գովեստ զիրաց ինչ .
վասն որոյ կացրդականք են ներբողեան և
գամբանական ճառք, և որ 'ի ծնունդս և

'ի հարսանիս , կամ որ 'ի շնորհակալութիւն և յուրախակցութիւն յօրինին :

Հ. Օրինչ է բաղխոհականն .

Պ. Համոզել զոք յօղտակարն և խորշկուցանել 'ի մնասակարէն . վասն որոյ բաղխոհականք են ամենայն խրատական և յորդորական ճառք , և որովք ճարտարախօսք երբեմն վարէին յատեանս տեսչութեան իրաց աշխարհին :

Հ. Օրինչ է ատենականն .

Պ. Ըմբաստանութեան կամ ջատաղովութեան ճառ , որպէս որ յատենի 'ի լուրգատաւորաց ճառին :

Հ. Ըն ինչ զանազանութիւնս այս է պիտանի .

Պ. Ըն 'ի սահմանել զկէտ նպատակի ճարտարախօսին . զի 'ի կացրդականն և 'ի բաղխոհական առաւել ջանալի է նմա ըզկամսն և զսիրտ շարժել , իսկ յատենականն հաւանեցուցանել զմիտս . և ըստ այնմ պատշաճի զձեւ ճարտասանականս 'ի կիրարկանել , և համեմատ առաջարկութեան զոճ ճառին յերիւրել :

Հ. Իցէն ինչ որ այս ամենայն ազգի ազգի ճառից անխտիր պատշաճիցին .

Պ. Ըն ամենայն իրօք . և այսոքիկ են վեցեակ մասունք ճառին , որ են՝ յառաջարանութիւն , առաջարկութիւն , պատ-

մութիւն , ցուցումն , յորդոր , և վերջաբա-
նութիւն :

Իբր ոչ եթէ այս ամենայն մասունք յա-
մենայն ճառս անհրաժեշտ կարևորք իցեն
այլ 'ի կարգաւոր ճառս այսոքիկ առաւե-
լագոյն մասամբ մտանեն :

Տ. Օ՞րնչ է յառաջաբանութիւն .

Պ. Պատրաստել զմիտս ունկնդրաց 'ի
լուր բովանդակ ճառին :

Տ. Օ՞րնչ կարևոր է յառաջաբանին .

Պ. Սախ զի անգստին 'ի բնէ ճառին
առեալ իցէ , և քաջ ընդ նմա կցորդեալ .
վասն որոյ խրատէ Աիկերոն՝ խորհել նախ
զբովանդակութիւն ճառին , և ապա յօրի-
նել զյառաջաբանն :

Արկրորդ՝ առաւելագոյն զցուշութեան
պէտք են 'ի յառաջաբանին առ 'ի քաջբա-
ցատրութիւն իմաստից և 'ի բարւոք շա-
րագրութիւն . զի 'ի սկզբան անդ ունկըն-
դրացն միտք և լսելիք դեռ անխոնջք՝ դիւ-
րաւ ստղտանիցեն զթերութիւն : Գար-
ձեալ և 'ի հակառակէն առաւել քան ամե-
նայն ուրեք 'ի յառաջաբանէն խուսելի է
'ի պաճուճանաց . զի ինքնազարդ պարզու-
թիւն կարևոր հանգամանք են յառաջա-
ջաբանութեան :

Արրորդ՝ սրարա է յառաջաբանութեան
լինել հանդարտ և մեղմ , եթէ ոչ դէպք

ինչ անակնկալ պատճառս տացեն յանկար-
ծական յառաջաբանութեան . այլ յայն-
ժամ պարտ է զընթացս բովանդակ ճա-
ռին պատշաճել նմին , ապա թէ ոչ նուա-
ղեալ անկանի բանն :

Չորրորդ՝ մի ինչ ՚ի զօրաւոր փաստից
յիշատակեսցի ՚ի յառաջաբանին . զի այն
ապա ՚ի բնիկ տեղւոջն ոչ ինչ ազգեսցէ :

Հինգերորդ՝ պարտ է յառաջաբանին
համեմատել չափոյ երկնայնութեան ճառին
և գեղեցկութեան . որպէս զի մի դուռն քա-
ղաքին գեղեցկագոյն քան զքաղաքն իցէ ,
կամ քաղաքին վտանգ առաջի կայցէ փախ-
չելոյ ՚ի բաց , ըստ ծաղրական Ղիողիմեայ
առակին :

Հ. Օ ինչ է առաջարկութիւն .

Պ. Պարտ է ճարտասանին յաւարտ յա-
ռաջաբանութեանն առաջի առնել զպատ-
ճառս ճառիցն . և այն կոչի առաջարկու-
թիւն :

Ն. Ապարտ է առաջարկութեան զոլ բա-
ցայայտ և ճիշդ , որովհետև իմացուած բո-
վանդակ ճառին յայն հաստատեալ է :

Նթէ պատճառք ճառիցն քաջածանօթք
իցեն , մարթ է նորաձև իմն զառաջարկու-
թիւնն առնել առ ՚ի զարթուցանել զլսե-
լիս . զոր օրինակ Սէնիէրի ՚ի ճառել զաս-
տուածութենէ Քրիստոսի , այսպիսի յօրի-
նէ առաջարկութիւն .

« Աթէ Քրիստոս չէր աստուած, ամպա-
« րըշտագոյն քան զամենայն մարդիկ զը-
« տանէր » :

Օգնէ բազում ուրեք և բաժանումն 'ի սրարդութիւն առաջարկութեանն և ճառինս :
Հ. Ո՞ր իցեն կանոնք բաժանման .

Պ. Այախ՝ զի մի մին 'ի մասանց բովան-
դակեսցի 'ի միւսն , այլ խսկապէս զանա-
զանեսցին 'ի միմեանց :

Արևորդ՝ զի մասունքն 'ի միասին բո-
վանդակեսցեն զառաջարկութիւնն :

Արևորդ՝ զի մի բազմամասն իցէ բաժա-
նումն , այլ դուն ուրեք աւելի քան զերիս
մասունս :

Չորրորդ՝ զի մի արուեստակեալ իցէ
բաժանումն , այլ 'ի բնէ առաջարկութեանն
յառաջ ածեալ :

Այս ամենայն սրայմանք քաջ սպասին 'ի
բաժանմանն՝ զոր Մասիլիոն առնէ 'ի ճա-
ռըն չարչարանաց փրկչին . զի զքնաբանն՝
« Ամենայն ինչ կատարեալ է » , բաժանէ
յերիս այսպէս . քանզի կատարեցաւ ար-
դարութիւն առ 'ի Մատուծոյ, չարութիւն
առ 'ի մարդկանէ, և սէր առ 'ի Քրիստոսէ :

ԴԱՍ Գ

Պատմութիւն . — Յուցումն 'ի ներքին տեղեաց . — Սահման . — Թուումն մասանց և Ստուգաբանութիւն :

Տ. Օրինչ է պատմութիւն , զոր երրորդ մասն ճառի ասացեր :

Պ. Պատմութիւն 'ի դատասացութիւնս առաւելապէս ունի զտեղի , և է մի 'ի կարևորագոյն և 'ի դժուարին մասանց ճառին , զի պարտ է անդ ճարտասանին զամենայն ինչ ասել ճշմարտութեամբ , և մի ինչ յեղծումն իւրոյ դատին :

Պարտ է նմա անդստին արկանել զՏիմունս ցուցակութեանց ճառին , պարզելով զՏանգամանս նպաստամատոյցս իւր , և տկարացուցանելով զՏակառակորդին :

Ի բացայայտութիւն պատմութեան ընդ նախասացեալ պայմանս խնդրին և առաւելագոյն խնամք 'ի ճշգրտապատում առնել զանձինս , զժամանակ , զտեղի և զայլ կարևոր հանգամանս :

Պարտ է դարձեալ հաւանական յօրինել զպատմութիւնն , և համառօտ՝ առանց աւելորդ հանգամանաց :

Ի վարդասլետական ճառս զտեղի պատ-

մութեանն ունի բացատրութիւն իրացն ,
զորմէ ճառքն են :

Հ. Օ ինչ է ցուցումն, զոր չորրորդ մա-
սրն ճառի ասացեր :

Պ. Հերքել ինչ կամ հաստատել փաս-
տիւք: Քանզի պարտ է ճարտասանին յետ
'ի ներքս ածելոյ զառաջարկութիւնն՝ ցու-
ցանել զայն , գտանելով փաստս զօրաւորս,
և բարւոք կարգաւորելով զգտեալն :

Հ. Աւտի ինդրելի են փաստք .

Պ. Տեղեաց , ուր փաստիցն գիւտք են ,
կէսք կոչին ներքինք և կէսք արտաքին ,
ովանք հասարակք և այլք յատուկք :

Հ. Ար իցեն ներքինք .

Պ. Ներքին տեղիք են , որ 'ի բնէ ա-
ռաջարկեալ իրացն տան ապացոյցս . որպի-
սիք են՝ սահման , թուումն մասանց , ստու-
գաբանութիւն , լծորդք , սեռ և տեսակ ,
պատճառ և գործ , նմանութիւն և աննմա-
նութիւն , բաղդատութիւն , հակադրու-
թիւն , նախընթաց և հետևորդ և յարակից
հանդամանք :

Հ. Օ ինչ է սահման .

Պ. Սահմանն է բան բացայայտիչ բը-
նութեան իրին . որ ըստ իմաստասիրաց
համառօտ կազմի՝ բաղկացեալ 'ի սեռէ և
'ի տեսակէ . որպէս սահման մարդոյ՝ Ան-
դանի բանական :

Բայց ըստ ճարտասանից ոչ 'ի սեռէ և
'ի տեսակէ՝ այլ 'ի գործոց և 'ի պատճա-
ռաց և յայլոց հանդամանաց կազմի ընդ-
արձակագոյն , և կոչի ստորագրական սահ-
ման :

Այսպէս Ասկերբերան ստորագրէ զար-
ժաթասէրն .

« Չիք և չիք ինչ անիմաստագոյն քան զըն-
« չիցն ծառայ . թուի թէ իշխեսցէ , և իշ-
« խան 'ի զլուխ ունի . թուի թէ տէր իցէ ,
« և ծառայութիւն հարկանէ . կապանս վա-
« րակէ զանձամբ , և ուրախ է . զրգէ զգա-
« զանն , և բերկրի . 'ի գերութեան վա-
« րեալ , ցնծայ և խայտայ . շուն կատաղի
« տեսանէ 'ի վերայ դիմեալ ոգւոցն , և
« յանհոգս է . զոր պարտ էր խառանել և
« սովամահ առնել , առատացեալ յանխը-
« նայ՝ շանի առ կուրծան կուտէ զի ևս
« քան զևս 'ի վերայ խաղայցէ և ահա-
« զինս լինիցի » :

Հ. Օ՛ ինչ է թուումն մասանց .

Պ. Չև բանի՝ որով ճարտասանն զիւ-
րաբանչիւր մասանց իրիք ասէ որ ինչ ըզ-
բողորէն է իմանալ : Արպէս Նարեկացւոյն
գեղեցիկ հատուածն , յորում զհոգւոյն նա-
ւակոծութիւն այլաբանաբար նկարագրէ .

« Աւստի նաւն 'ի բաղիմանէ վայրենի ա-
« լեացն խորտակեցաւ . թևոցն ձեռնար-
« կութիւն քայքայեցաւ . կայմն ամբարձ-

« ման ՚ի կայից իւրոց խլեցաւ . առապաս-
« տին թռչարան յանկարկատելի ծուէնս
« պատառեցաւ . շինուածոյն շուք անզար-
« դեցաւ , առասանք ձգողականացն խը-
« զեցաւ , տեսարան գլխոյն դիտակի խո-
« նարհեցաւ , ապաւանդակին պարան կրտ-
« րեցաւ , ապաւինութիւն խարսխին լու-
« ծաւ , լուծք ստուարք ամուլիցն կցորդու-
« թեան բաժանեցան , սամլք ուղղչացն
« հետոց դալարեցան , լաստ հիմանն հաս-
« տարանի ընկղմեցաւ , ղեկացն կառուց-
« մունք անդրէն սուզան , չուոցն յարմա-
« բութիւն պակասեցան , ողնափայտին
« պատսպարան իսկոյն բեկաւ , կապարանք
« զստին հաստուածոյ յօշոտեցաւ , դոզք
« ամիոփման ծոցոյն կազմածոյ անարդե-
« ցան , խելք շրթանցն եզերաց խախտեալ
« ոտաեաւ , պաղպաջունք բազմականացն
« անկեալ բարձաւ , վանդակասպատին վայ-
« ելութիւն յատակեցաւ , գահաւորակին
« հանգստարան շփոթեցաւ , մաժմունք
« տախտակաշարք ՚ի միաբանութեանց մի-
« մեանց անջատեցան , հեղոյսք սնդման
« բեւեռացն քարշեցան . արդասիք իրին յի-
« շատակարան ողբոց ինձ նմանեցաւ :
« Վաւուղիղն հանդէս նաւին գեզերեալ
« ողբայ , ձեռն ՚ի ծնօտի եղեալ՝ արտա-
« սուաց դետս իջուցանէ » :

Հ. Օ ինչ է ստուգաբանութիւն .

Պ. Ստուգաբանութիւն է , ըստ ճարտասանից , 'ի նշանակութենէ անուան ածել զհաստատութիւն . զոր օրինակ՝ Պարտ է իմաստասիրի սիրող գոլ իմաստութեան :

Ըստ այսմ է և Աբիգեայ ստուգաբանութիւն անուան առն իւրոյ պարսաւելն զնա .

« Մի գիցէ տէր իմ զսիրտ իւր 'ի վերայ
« առն ժանտի՝ Աբաղայ , զի ըստ անուան
« նորա և ինքն է . Աբաղ անուն նորա ,
« և անզգամութիւն ընդ նմա » :

Եւ Ռսկերերան այսպէս պարսաւէ ըզխեղկատակութիւն .

« Եւ զի ուսանիցիս , միտ գիր . և անուն
« իսկ խեղկատակութեանն յանդիմանիչ է
« կատականայն . յայտ է թէ չէ առողջ և
« կատակն . նախ ինքն իսկ 'ի յանձնէ կա
« տակի , զի հարկ լինի և զերեան ծոել ,
« և զբերանն և զաչսն այլայլել : Օ՛ի հարկ
« է նմա այնուհետև և զկերպարանս և
« զծաղր և զգնացս փոփոխել , և հտպտել ,
« և ամենեցուն նմանել , և ազգի ազգի
« պարսաւանս հնարել իմանալ . և հեռի
« են 'ի բրիտանից գուսանական բանք » :

ԴԱՍ Դ

Լծորդք. — Սեռ և տեսակ. — Պատճառք և
գործք . — Կմանուլթիւն և աննմանուլթիւն .
— Բաղդատուլթիւն :

Հ. Օ՛րնչ են լծորդք .

Պ. Լծորդք են՝ որք անդատին ՚ի նմին
բառէ ածանցեալ՝ իբր թէ լծորդին ընդ
արմատոյն : Արդ որպէս ՚ի ստուգաբանու
լթենէ անուան , այսպէս և ՚ի լծորդ բա
ռից կամ յածանցականաց առնուն ճար
տասանք զհաստատուլթիւն . զոր օրինակ՝
« Սարդ եմ , և զմարդկայինս յինէն ոչ օ
տար համարիմ » :

Ըստ այսմ և Ոսկեբերան ասէ .

« Եւ քանզի սրբուլթիւն արար զնա մե
« ղաց մերոց , կացցուք մնասցուք սուրբք , և
« մի ինչ կալցուք աղտ յանձինս . այլ ըզ
« գեղն և զվայելչուլթիւնն զոր զգեցոյց
« մեզ՝ պահեսցուք անարատ , զի ոչ ինչ
« գտանիցի աղտ և խորշ կամ թէ այլ ինչ
« այնպիսի » :

Հ. Օ՛րնչ է սեռն և տեսակ .

Պ. Սեռ կոչի բոլոր ինչ , որ պարու
նակէ ընդ իւր և բազում մասունս այլատե
սակս . և տեսակ , որ պարունակէ ընդ

իւրեւ բազում անհատս : Արդ է ուրեք զի
ճարտասանն զհանդամանս պատշաճեալս
սեռին կամ տեսակի հասարակաբար նը-
կատեալ, ապա զառաջարկութիւնն՝ որ ընդ
նոքօք բովանդակի՝ ՚ի վերայ ածէ : Բստ
այսմ Աղիշէ վարդապետ առ ՚ի ներբողել
զհրաշալի արդասիս աստուածսիրութեան
՚ի սուրբ Վարդանանս, նախ զսիրոյն Աս-
տուծոյ հասարակաբար յօրինէ ներբող,
և ապա յառաջարկութիւն մատչի .

« Մեծ է սէրն աստուծոյ քան զամենայն
« մեծութիւն երկրաւոր, և այնպէս ան-
« երկիւղս առնէ զմարդիկ իբրև զան-
« մարմին զօրս հրեշտակաց . որպէս անդըս-
« տին ՚ի սկզբանէ է տեսանել բազում ան-
« գամ ՚ի բազում տեղիս : Մարդիկ, որ սի-
« րովն Աստուծոյ իբրև զինու վառեալք
« էին՝ ոչ ինչ խնայեցին զանգիտելով իբ-
« րև զանարի, գոլով վատասիրտք, կամ
« ՚ի մահ անձանց, կամ յափշտակութիւն
« ընչից, կամ ՚ի խողիսողումն սիրելեաց,
« կամ ՚ի գերութիւն ընտանեաց, ելանել
« ՚ի հայրենի՝ երկրէն և անկանել ՚ի ստրկու-
« թիւն յօտարութեան : Արպէս յայսմ ժա-
« մանակի տեսաք աչօք մերովք . զի զնոյն
« նահատակութիւն նահատակեցաւ և աշ-
« խարհս հայոց : Բանզի իբրև ետես մեծն
« Վարդան » և այլն :

Հ. Արայէս 'ի պատճառաց կամ 'ի գործոց մարթիցէ առնուլ ապացոյց .

Պ. Բազում ուրեք ճարտասանն 'ի Հանգամանաց պատճառին զլաւութի կամ զյոռութիւն գործոյն առնու ցուցանել , և կամ զհակառակն : Այսպէս Սարգիս վարդապետ կուտակութեամբ եղեոնական գործոց ազահութեան պարսաւէ զախան .

« Սակայն արմատ ամենայն չարեաց ար-
« ծաթսիրութիւնն է , ըստ առաքելոյն , և
« ազահութիւն . վասն զի չիք և չիք ինչ
« չարիք , որ ոչ 'ի սոցանէ ծնանին , ատե-
« լութիւն մարդկան , խոռովութիւն , և պա-
« տերազմ առ ազգակիցս , պոռնկութիւն
« և գողութիւն և սպանութիւնք , և այլ ևս
« անթիւ մնապք՝ զորս ո՛վ որ կարէ թուել :
« Օյի եթէ զտէրն տիեզերաց և զարա-
« ըիչն արարածոց 'ի վաճառ էա՞ծ այս
« ախտ և ետ ստանանել , զինչ այլ ինչ մը
« նայ 'ի չարեաց՝ զոր ոչ կարիցէ գործել :
« Աւ եթէ զառաքեալն՝ զՔրիստոսի ընտ-
« թութեանն արժանաւոր՝ այնպէս վաղվա-
« ղակի գերի առեալ տարաւ , և զթիւն
« պակասեցոյց , և յահաւորսն զնա յանդրդ-
« նեցոյց , ապա ո՛վ որ կարէ կալ առաջի
« բուն զօրութեան նորա : »

Դարձեալ և 'ի գիրս Բմաստութեան .
« Բնդ որոց թէ ընդ դեղն զուարճացեալք

« զնոսա աստուածս կարծիցեն , գիտաս
« ցեն թէ որչափ ևս նոցա տէրն առաւել
« լաւ է . զի որ գեղեցկութեան արարչա
« պետն է՝ նա հաստատեաց զնոսա : Ա
« պա թէ ընդ զօրութիւնս և ընդ ազգե
« ցութիւնս զարմանայցեն , իմասցին 'ի
« նոցանէն՝ որչափ ևս որ կազմեացն զնո
« սա առաւել զօրաւոր է » :

Հ. Սարթիցէ և 'ի նմանութենէ կամ
յաննմանութենէ ցուցանել ինչ .

Պ. Այո ամենեւին . բայց 'ի յոյզս կրից
դուն ուրեք վարի ձևս այս . և ոչ երբէք
օրէն է յանձանօթ իրաց առնուլ նմանու
թիւն կամ աննմանութիւն : Օրինակ իմն
յԱսկեբերանէ վասն նմանութեան .

« Չտեսանես և զմարմնոց իսկ զաչս . յոր
« ժամ հանապաղ ընդ ծուխ գայցեն , ար
« տօսր բերեն . եւ յորժամ 'ի խաղաղ օդս
« և 'ի մարդս և յաղսիւրս և 'ի դրախտս ըզ
« բօնուցուն , առողջագոյնք և քաջատեսք :
« Աոյնպէս և մտացն ակն եթէ յեղտիւրս
« հողևոր բանիցն ճարակիցի , սուրբ յըս
« տակ և քաջատես լինի . իսկ եթէ ընդ
« ծուխ ինչ աշխարհի իրացս գայցէ , բը
« ժաբեր արտօսրալից լինիցի , և զազգի
« ազգի լալիւնս լայցէ և աստ և անդ » :

Այլ օրինակ 'ի Ամբրոնացւոյն .

« Աչ է այս արութիւն զինուորի՝ յիւր ա

« պարանս թուր շողացուցանել , և զօր
« հարկանել . այլ որ 'ի հանդիսի տեղին ի-
« ջանէ , և ընդդէմ ախոյեանին կայ : Աոյն
« պէս իմա , զի չէ ուղիղ մարտ հոգևոր '
« որ 'ի Չորոյ գետ նստի , և զիս 'ի Արլի-
« կիա յաչաղէ » :

« Աւարդ աղէ ասա . ճարտարախօսն ո՞չ
« զվերջին բանսն փութայ առաւել յօրինել ,
« զի գովեալ դրուատեալ մեկնիցի : Աւ ըս-
« պասաւորն վերջին նուագաց կարի պատ-
« կառ կայ , զի մի պարսաւ լիցի : Աւ նահա-
« տակն եթէ ոչ զվերջին մարտն առաքի-
« նագոյն ցուցանիցէ , ո՞չ ապաքէն ամե-
« նայն աշխատութիւնն անօգուտ է : Աւ
« նաւաւարն եթէ յամենայն ծովուն զգու-
« շանայցէ , և մօտ 'ի նաւահանդիստն խը-
« րիցէ զնաւն կամ բախիցէ , ո՞չ ապաքէն
« զառաջին վաստակն կորոյս : Աւ բժիշկն
« եթէ թեթեացուցանիցէ զցաւ հիւան-
« դին , և յորժամ մօտ 'ի կատարեալ ա-
« ռողջութիւն ամիցէ , յայնժամ զեղծ-
« ցի , ո՞չ ապաքէն զամենայն ջանն կորոյս :
« Աոյնպէս և որ զառաքինութեան կա-
« տարումն ընդ սկզբանն ոչ միաբանեն ,
« եղծանին և կորուսանեն զամենայն : Աոյն
« և 'ի կառամարտիկսն , որք 'ի գլխոյ աս-
« պարիզացն պնդակազմ զերիվարսն ար-
« ձակեն , և յետոյ մեղկիցին ինչ և ծու-

« լանայցեն , ոչ պարզեացն հասանեն , և
« ոչ 'ի տերանցն ճանաչին » . Ուիէէ :

Իսկ յաննմանեաց այսպէս ասէ հաս-
տատութիւն Սարգիս վարդապետ .

« Օր օրինակ առանց Քրիստոսի չկարէ
« որ արդարագործութիւնս առնել , զոր և
« ինքն իսկ ասաց՝ առանց իմ ոչ ինչ կա-
« րէք առնել , նոյնպէս և ոչ առանց սա-
« տանայի մեղս գործէ որ » :

Հ . Օրնչ է 'ի բաղդատութէ ցուցումն .

Պ . Յորժամ ճարտասանն 'ի մեծէ զփոք-
րն , կամ 'ի փոքրուէ զմեծ և կամ 'ի հա-
ւասարէ զհաւասար յառաջ ասէ . դ՞ .

« Եթէ առ Լստուածն իւր սուտ գտաւ ,
« առ ո՞ որ 'ի մարդկանէ դա արդար զը-
« տանիցի » . Եւէ . Կարճ :

Երկրորդին օրինակ .

« Եթէ մեք հեռագոյնս 'ի ձէնջ՝ միայն 'ի
« լսելն այսպիսի ընկալաք յանձինս մեր
« սուգ դառնութեան , ապա սրչափ ևս
« առաւել դուք հաղորդեալքդ 'ի չարչա-
« րանս ընդ հօտից ձերոց » . Յւէ . Կարճ :

Օրինակ երրորդին .

« Համարիք , եթէ այն գալիլիացիք եղեն
« մեղաւոր քան զամենայն գալիլիացիս , զի
« զայնպիսի անցս կրեցին . ոչ , ասեմ
« ձեզ . այլ եթէ ոչ ապաշխարիցէք , ամենե-
« քին նոյնպէս կորնչիցիք » . Ղուկ . ԺԳ . 12 :

ԴԱՍ Ե

Հակադրութիւն. — Նախընթաց և հետևորդ
և յարակից հանգամանք . -- Արտաքին տե-
ղիք :

Հ. Օրինչ է 'ի հակադրութէ ցուցումն.

Պ. Ճարտասանին բազում ուրեք զներ-
հականս առ միմեանս կացուցանելով, յա-
ւելու զօրութիւն մեծ 'ի բանս. զոր օրինակ.
« Ար ինքն իւր չար է, այլում բարի ոչ կա-
« րէ լինել, և որ ինքն ընդ խաւար զնայ,
« այլում ոչ առաջնորդէ ճշմարտութեան
« լուսով: Արպէս զի չիք յանիրաւութենէ
« արդարութիւն, այսպէս 'ի ստութենէ
« ճշմարտութիւն » . Եւէլ. պարս :

« Չեկաց դահիճ առննթեր՝ զկողս քերել
« առ 'ի զոհս մատուցանելոյ 'ի հարկէ .
« այլ հասեալ կայ 'ի վերայ սաստիկ ցան-
« կութիւն ընչից և ազահութիւն, և փո-
« րէ զաչս : Աչ ոք 'ի զօրականաց արկ ըզ-
« մեզ 'ի խարոյկ և կացոյց 'ի վերայ կաս-
« կարայից . այլ մարմնոյ բոցն բորբոքեալ
« առաւել քան զայս այրէ զողիս : Չկայ
« մօտ թագաւոր՝ բազում պարզ և խոստա-
« ցեալ առ 'ի զեղծուցանել, այլ 'ի մօտ կան

« մողեկան փառք, որ ևս չար քան զայն
« խտտղեն » . Ա՛հէք :

Եւ Աղիշէ 'ի խրատն միանձանց .

« Եւ արդ ևս տեսանեմ 'ի մերում աշխար-
« Հիս և ոչ զոք աղատեալ յայսպիսի աղե-
« տից, յետս ընդդէմ ընթերցաք զգեղեցիկ
« գրեալսն . 'ի պատճառս ուխտաւորութե
« Հեռացաք 'ի սուրբ ծնողացն, և արարաք
« բազում հարս օտարոտիս . զորս պա-
« տուելոյ արժանի էր՝ անարդեցաք, և յորս
« ոչն ունէաք իշխանութի՛ դնել մեծարանս,
« զախտ աղետից մերոց յոյժ ծախեցաք :
« Աղատեցաք 'ի հարկաց արքունի՛ զորս
« առանց մեղաց էր հարկիլն , և մտաք
« ընդ հարկաւ ստացուածոց՝ որ լի են ան-
« առակ ազահուլթի : Չեւաք յանկողինս
« սուրբ հարսանեաց, և արարաք մեզ բար-
« ձրագահոյս առաւել քան զաշխարհի . . . :
« Կօշիկք ոտից մերոց յանդիմանեն զմեզ ե-
« թէ ոչ են սուրբ ձանապարհք մեր : Հան-
« դերձք մեր աղաղակեն զգործոց ձեռաց
« մերոց, եթէ մերկ եմք յերկնաւոր զգես-
« տուցն : Արիվարք մեր ցուցանեն զմեզ,
« եթէ ոչ եմք յափշտակելոց ընդ առաջ
« տեառն 'ի վերայ օդոց : Շինուածք ապա-
« րանից մերոց յայտ առնեն, եթէ ոչ ու-
« նիմք մեք տաճար առանց ձեռագործի
« յերկինս, յոր մտանելոց են ամենայն

« դասք սոսկացելոցն յերկրաւոր ախտից :
« Աալուածք անդաստանաց մերոց կշտամ
« բեն զմեզ , եթէ չիք մեր բաժին 'ի վի-
« ճակս երկնաւորս : Արդուզք անյազք
« եղաք 'ի կերակուրս , և առանց չափոյ
« արբաք զինի պղտորիչ խորհրդոց և մը-
« տաց : Խոր 'ի քուն ննջեմք ամենեքեան,
« և երազ թուի մեզ ճշմարտութիւն : Աա-
« փուլցեալ են աչք մտաց մերոց 'ի տեսա-
« կան խորհրդոց , և անյազ պաղշոտեալ
« հայել 'ի կեանս աշխարհիս : Արդեյեաք
« զլեւիս 'ի սուրբ ընթերցուածոց , և ուն-
« կրնգիր եմք բառաչման խաշանց մերոց :
« Աչ եկն մեզ հոտ անոյշ 'ի հողւոյն սրբ-
« բոյ , վասն զի սիրեցաք մեք զիւզ ախ-
« տալից աշխարհիս : Աչ ճաշակեցին քիմք
« ողւոց մերոց զկերակուր երկնային , վասն
« զի պարարեցաք զանձինս մեր 'ի զա-
« նազան խորտիկս : Առթ է գոյն զիմաց
« մերոց , վասն զի ոչ զուարթացան երեսք
« մեր 'ի խորհուրդս սրբութեան : Յաւա-
« լից են անդամք մարմնոց մերոց , վասն
« զի յառաջ քան զմարմինս զողիս ախ-
« տացուցաք : Գերեզմանաց բուկոց նը-
« մանեցաք յանձինս մեր , վասն զի ու-
« նայն եմք 'ի շնորհաց սուրբ հողւոյն .
« վասն այսորիկ և ամենայն չարիք հա-
« սին յաւուրս մեր » :

Տ . Օ՞րինչ է 'ի նախընթաց և հետևորդ
և 'ի յարակից հանդամանաց ցուցումն .

Պ . Քաղուժ ուրեք 'ի հանդամանաց աս-
տի յայտնի կամ հաւանական ապացոյցս
առնու ճարտասանն . զոր օրինակ 'ի ծագել
արեգական՝ հարկ է զի իցէ տիւ , և եթէ
տիւ է՝ հարկ է թէ ծագեալ իցէ արեգակն :

Ը . յսպէս քաջն Վարդան զյոյս օգնա-
կանութեան առ 'ի յԱստուծոյ հաստատէ
'ի նախընթաց հանդամանաց .

« Յերկուս և յերիս կոիւս տէրն ինքնին
« մեծաւ զօրութեամբ օգնեաց մեզ . որ
« պէս զի զանուն քաջութեան ժառան-
« գեցաք , զգօրսն արքունի շարաչար հա-
« րաք , և զմոզսն անողորմ սատակեցաք ,
« և զպղծութիւն կռապաշտութեանն 'ի
« տեղեաց տեղեաց սրբեցաք , զանօրէն
« հրաման թաղաւորին եղձաք ապականե-
« ցաք , զխռովութիւն ծովուն ցածուցաք .
« լեռնացեալ ալիքն դաշտացան , բարձրա-
« զէզ փրփուրն սպառեցաւ , դազանացեալ
« սրամտութիւնն դադարեաց : Ար 'ի վե-
« րայ ամպոց որոտայր , նկուն եղեալ քան
« զսովորական բնութիւնն 'ի վայր դտաւ
« ընդ մեզ խօսելով » :

Իսկ յարակից հանդամանք թէպէտ և
ոչ համօրէն 'ի միասին , այլ ստէպ 'ի ճահ
սլատահեն ճարտասանին . և են ութ այ-

տաքիկ՝ Ո՞վ, Օ՞րնչ, Ո՞ր, Ի՞նչ, Քանիցս,
Ի՞նչէր, Ո՞րպէս, Ե՞րբ :

Օքազումս յայսցանէ վայելուչ 'ի կիր
արկանէ Իմաստունն 'ի բանս յայս .

« Կինչգեռ խաղաղութեանն սլատեալ
« էր զամենայն , և այն ինչ զիշերն իւրով
« արաղութեամբն ընդմիջէր , ամենազօր
« բան քո յերկնից յաթոռոց արքունեաց
« սաստիկ սլատերազմող 'ի մէջ սատակ
« ման երկրին հասանէր : Սուսեր սլողո
« վատիկ զանաչառ հրամանդ քո բերեալ
« և 'ի մէջ անցեալ , զամենեսին ընոյր մա
« հուամբ . անդ առ երկնիւք քերէր , և այ
« սրբ յերկիր հասանէր : Յայնժամ վաղ
« վաղակի ցնորք անհնարին երազոց խը
« ոովեցուցանէին զնոսա , և արհաւիրք
« անկարծք 'ի վերայ հասանէին : Եւ այլ
« ոք այլուր անկեալ կիսամահ , վասն որոյ
« սլատճառանաց մեռանէրն՝ յայտ առնէր :
« Օ՛ի երազոցն խռովեցուցեալ զնոսա , ըզ
« նոյն յառաջագոյն դուշակէին . զի մի յան
« դէտս , վասն որոյ չարաչարն տանջէին ,
« կորնչիցին » :

Հ . Ո՞ր են արտաքին տեղիք .

Պ . Իսկ արտաքին կոչին տեղիք՝ Օրէնք,
Համբաւ, Երձանաղիւք, Երդումն, և Վճի
կայք , յորոց մարթ է ճարտասանին քաջ
հաստատութիւն ամել բանիցն :

Հ . Օ՛խարդ սարաւ իցէ զփաստս կար-
դաւորել .

Պ . Պարա է հզօրագոյն փաստիւ իւիք
զրաւել նախ զմիտս , և ապա տակաւ 'ի-
տկարագունից 'ի հզօրագոյնս անցանել ,
յաւելեալ զիւրաքանչիւր սլատշաճ օրինա-
կրս և վկայութիւնս : Մի՛ խառնակել ըզ-
տարասեռ փաստս ընդ միմեանս , այլ ու-
րոյն զպատշաճն և զօգտակարն և զիրա-
ւացին կարգել , հերքելով զհակա՛ոական :

ԴԱՍ Զ

Յօրգոր . — Վերջաբան :

Հ . Օ՛ինչ է յօրգորն , զոր հինգերորդ
մասն ճառի ասացեր .

Պ . Ճարտասանին ոչ միայն սարաք են
խելամանցուցանել զունկնդիրս , այլ և
զկաման յօրգորել կրիցն յուզմամբ :

Հ . Ա՛ր են զլիաւորք 'ի կիրս , զոր սարաւ
է ճարտասանին յուզել ըստ սլատշաճի .

Պ . Սէր և շատելութիւն , բարկութիւն
և հեղութիւն , խնդութիւն և տխրութիւն ,
երկիւղ և քաջալերութիւն , կարեկցութիւն ,
մխիթարութիւն :

Հ . Ա՛րսէս զմի մի 'ի կրից այտի մարթ
իցէ զարթուցանել .

Պ . Օսէր՝ նկարագրութեամբ գեղեցիկ
հանդամանաց անձին կամ իրաց, զոր սար-
տրն իցէ սիրելի ընծայեցուցանել . և դար-
ձեալ յուսով առ ՚ի նմանէ բարեացն և օգ-
տից : Իսկ զատելութիւնն ՚ի հակառակէն՝
նկարագրութեամբ յոռութեանց նորա, և
երկիւղիւ առ ՚ի նմանէ չարեացն :

Օբարկութիւնն՝ յիշատակաւ թշնամա-
նացն կրելոց . իսկ զհեզութիւնն՝ անկեղծ
խոստովանութեամբ յանցանաց, անչարու-
թեամբ դիտաւորութեան յանցաւորին, և
յիշատակաւ վաստակոց և լաւութեան
նորա :

Օխնդութիւնն՝ մեծութեամբ բարւոյն
և բազմաժամանակեայ ակնկալութեամբն
կամ անկարծելի յաջողութեամբ . իսկ ըզ-
տխրութիւնն հակառակօք սոցին :

Օերկիւղ՝ մերձաւորութեամբ վտան-
դին և անխուսափելի հետեութեամբ չա-
րեացն . իսկ զքաջալերութիւնն՝ յուսով յա-
ջողութեան, դիւրին և հաւանական գլա-
ջողութիւնն իրացն ցուցանելով :

Օկարեկցութիւնն՝ մանրասպառում առ-
նելով զաղէտս վշտացելոյն, ցուցանելով
զի չէր արժանի չարեացն . և զգթութիւնն՝
ցուցանելով զվսեմութիւնն և զբարութիւնն :
Իսկ զմխիթարութիւնն՝ թեթեացուցանե-
լով ըստ կարի զճանրութիւնն չարեացն ,

յուսացուցանելով 'ի փոխարէնան աստ և 'ի հանդերձեալս , և զարիութեանն յուշ առնելով զվսեմութիւն և զօգուտ :

Տ . Իցե՞ն ինչ կանոնք առ 'ի յոյզս հաւարակաց ամենայն կրից ճահաւորք .

Պ . Ան իսկ . և նախ՝ զի ճարտասանն զգածեալ իցէ կրիւքն , զոր յայլս կամի զարթուցանել :

Արկրորդ՝ զի նախ համոզեսցէ զմիտս փաստիւք և ապա ջանասցի շարժել զսիրտ :

Արրորդ՝ զի 'ի պատշաճ տեղւոջ դորդորակն արասցէ առ 'ի շարժել զկիրս , որ ըստ յաճախ սովորութեան 'ի վերջաբանին 'ի դէպ դայ :

Չորրորդ՝ զի մի զգացուցէ ունկրն՝ դրացն՝ թէ ահա մատչի 'ի յորդորակս , այլ յանզգաստից 'ի վերայ ածել զոյզս կրից՝ տակաւ պատրաստելով առ այն զսիրտ :

Հինգերորդ՝ զիտել զլեզու և զբարբառ կրից , որ է ամենեկին առանց արուեստակութեան , և եռանդուն լի ձևովք՝ առանց զարգուց և նրբաբանութեանց :

Վեցերորդ՝ մի ընդհատումն առնել յուզման կրից , այլ ինչ 'ի ներքս ածեալ . և մի շիջուցանել զեռանդն կրից եկամուտ զարգուք կամ նմանութեամբք :

Աօթներորդ՝ մի կարի յամել 'ի յորդորա

կրս, զի եռանդն կրից չէ յերկարատե :
Յաճախ են 'ի ճառս Ասկեբերանի չքը
նաղ օրինակք զարթուցիչք կրից. որպէս և
ուրանօր յաղազս սուրբ խորհրդոյն ճառէ .
« Ասան որոյ ամենեւին արթուն պարտիս
« լինել . քանզի և ոչ սակաւ տանջանք պա-
« ճիցին այնոցիկ՝ որք անարժանութեամբն
« հաղորդիցին : Օմտաւ ամ որպիսի ցա-
« սումն մատնչին և խաչահանուացն եղև .
« զչոյշ լեր այժմ, դուցէ և դու պարտական
« մարմնոյ և արեան գտանիցիս : Արքա ըզ-
« մարմինն ստանին, և դու յաղտեղեալ հո-
« ղիդ ընդունիս յետ այնչափ երախտեացն :
« Քանզի չչատացաւ մարդ լինել և ապ-
« տակել և մեռանել, այլ և տակաւին
« զանձն իւր խառնէ ընդ մեզ . ոչ միայն
« հաւատովք, այլ և արդեամբք իսկ մար-
« մին իւր յօրինէ զմեզ : Քան զինչ չէ պարտ
« սրբադոյն լինել այնմ, որ յայնմ զենման
« վայելցէ . քան զորպիսի՞ ճառաղայթս
« պայծառադոյն՝ ձեռինն, որ զայն մար-
« մին հատանիցէ . և բերանոյն, որ հոգևոր
« հրովն ընուցու . և լեզուին, որ համակ
« 'ի կարմիրս յահաղին յարենէն ներկա-
« նիցի : Օմտաւ ամ որպիսի պատուով
« պատուեցար, կամ յորմէ սեղանոյ վայել-
« լեա . զոր հրեշտակք տեսանեն և զար-
« հուրին, և չիշխեն համարձակ ընդդէմ

« Հայել 'ի փայլատականցն՝ որ անալի հա-
« տանիցին , և մեք նովաւ կերակրիմք , և
« նովաւ զանդանիմք , և լինիմք մի մարմին
« և մի հոգի : Ո՞ պատմեսցէ զզօրու-
« թիւնս տեառն , լսելի արասցէ զամե-
« նայն օրհնութիւնս նորա : Ո՞ր հովիւ
« յիւր անդամոցն կերակրէ զիւր ոչխար-
« սըն , և զինչ ևս ասացից հովիւ , այլ և
« մարք ևս իցեն բազում անգամ , որ յետ
« երկանց և ծննդոց՝ դայեկաց տան զոր-
« դիս : Իսկ սա ոչ ժուժեաց զայս առնել ,
« այլ ինքնին կերակրէ զմեզ իւրով արեամ-
« բըն , և ամենայնիւ ընդ իւր զրկախառն
« առնէ զմեզ . : Աւարդ մի ծուլանայցեմք ,
« որ այսչափ արժանի եղեաք սիրոյ և սլա-
« տուոյ . չտեսանիցեմք զմանկունս մատա-
« զըս՝ որպիսի յօժարութեամբ բուռն զըս-
« տեանց մարցն հարկանիցեն , որպիսի յօ-
« ժարութեամբ մաժուցանեն զչրթունսն
« ընդ մարցն շրթունս : Այսպիսի յօժարու-
« թեամբ մատիցուք յայն սեղան և 'ի մայ-
« բենի հոգևոր բաժակն . մանաւանդ թէ
« ևս յօլովադոյն քան զմանկանցն ձգես-
« ցուք մեք զնորհս Հոգւոյն , և զմին
« միայն արտմութիւն համարեսցուք , չը-
« վայելեն յայնպիսի կերակուր : Քանզի
« չէ մարդկեղէն զօրութեան գործն , որ
« առաջի կայ . զոր յայնժամ յընթրեացն

« Ժամ արար , և այժմ զնոյն գործէ : մեր
« զսպասաւորաց աստիճան ունիմք , և սրբ
« բէ և վերստին կազմէ նա » :

Հ . Օ՛րնչ է վերջաբանն .

Պ . Վերջին մասն ճառին , յորում ճարտասանն 'ի դիտաւորութիւն բովանդակ ճառին ազդողագոյնս ջանայ հասանել :

Վասն որոյ պարտ է 'ի վերջաբանին համառօտել զամենայն զփաստս , կնիք ըզհօրագոյնն գնելով :

Բայց գործ է գիտել ըստ ժամանակին աւարտել զճառն . զի մինչ չև ցուցեալ զառաջարկութիւնն՝ զհետեանսն 'ի վերայ ամել ծաղրելի է : Դարձեալ և զպերճաբանութիւն ընդ զօրութեան բանից վայելչապէս խառնելի է 'ի վերջաբանին , զի և ճարտասանն ընդ ճառին հաճոյ լիցի լսելեաց :

ԴԱՍ Է :

Տեղիք սեփականք երից ճարտասանական հանգիսից :

Հ . Իցէ և այլ ինչ զանազանութիւն ճարտասանական տեղեաց քան զներքինսն և զարտաքինս .

Պ . Ը՛յո՛ ամենակին . զի զորոց ցայսվայր

ասացաքն՝ հասարակ կոչին տեղիք, բայց
են և սեփականք երից ճարտասանական
հանդիսիցն :

Հ. Ա՛ր իցեն կայրդական հանդիսին
սեփական տեղիք .

Պ. Ա,ախ ազգն կամ հայրենիք, եթէ
ազնուազգի իցէ ներբողեալն . իսկ եթէ
յանտոհմութենէ ազնուացեալ, պարտ է
զառաքինութիւն նորա և զվաստակս սրան
ծացուցանել՝ որովք անձամբ զանձն ազ-
նուականացոյց :

Արկրորդ՝ քաջակիրթ դաստիարակու-
թիւն ներբողելոյն :

Արրորդ՝ մեծութիւնք, եթէ բարւոք վա-
րեալ իցէ նոքիմբք, և ՚ի զրկիլն յայնցանէ
անխոով կացեալ :

Չորրորդ՝ համառօտիւ իմն և ՚ի վայե-
լուչ կերպարանաց առնելի է զներբող, և
մանաւանդ ՚ի տգեղութենէ զպարսաւ :

Հինգերորդ՝ բարեմասնութիւնք բնա-
կանք և ստացականք . առաջնովքն զովե-
լի է՝ եթէ բարւոք ուրուք վարեալ իցէ նո-
քօք, և վերջնովքն՝ եթէ ճգամբք ստացեալ
իցէ զայնս :

Վեցերորդ՝ գործք ներբողելոյն, որ
ուսումնականք և որ այլ ինչ կենցաղօգուտ
արդասիք՝ որ յաճախեն պարծանս մար-
դոյ :

Աթերորդ՝ փառք և մրցանակք, զորս տարեալ ուրուք իցէ :

Ալթերորդ՝ հանդամանք մահուն, եթէ վասն հաւատոց կամ յօգուտ աշխարհի կամ՝ ի վերայ հայրենեացն զմահ յանձն առեալ իցէ :

Ըստ սմին օրինակի և զքաղաք մարթէ ներբողել ՚ի հիմնագրէն, ՚ի վաղեմի հընութենէն, ՚ի տեղւոյն, ՚ի ձևոյն, ՚ի մեծութենէ, ՚ի գեղեցկութենէ փողոցացն և հըրապարակաց, յաշխարհամուտ շինուածոց, ՚ի կամրջաց, ՚ի նաւահանգստից, ՚ի հին աւանդից, յանառիկ ամրութենէն, յանխըռով խաղաղութենէն, ՚ի բարւոք տեսչութենէն, ՚ի ճոխութենէ, ՚ի բարգաւաճ շահավաճառութենէ, ՚ի բազմամարդութենէ, ՚ի հանձարոյ բնակչացն, յականաւոր մարդկանէ՝ որ անդ կացեալ, ՚ի ստածիչ օգոց, ՚ի բերոց երկրին, այլովքն հանդերձ :

Ար ինչ զներբողինէն ասացաք՝ նոյնք օգնեն և առ ՚ի պարսաւ, անմասն ՚ի գովելեաց անտի ցուցանելով զպարսաւեալն :

Շ . Ար իցեն բաղխոհական հանդիսին սեփական տեղիք .

Պ . Ասի ցուցանել զարդարութիւն առաջարկութեանն . զի ոչ բնական օրինաց, ոչ քաղաքականին և ոչ աստուածայնոցն և մարդկայնոց գրական օրինաց հակառա

կի, և ոչ վաղեմի սովորութեանց կամ կարծեաց՝ որ զօրինաց ունին զօրութիւն :

Արկրորդ՝ ցուցանել զօգտակարութիւն, որ առաւել յորդորին է, և զտոյժս՝ որ յապախան առնելոյ զայն ծնանիցին : Իսկ եթէ կարևոր ևս առ ՚ի կեանս և ՚ի բարեկենդանութիւն իրքն իցեն, հզօրագոյն ևս ցուցանելի է զայն :

Արրորդ՝ ցուցանել զփառս և զպարծանս՝ որ անտի յառաջ դայցեն, քանզի բազումք այնոքիկ են՝ որ ցանկութեամբ փառաց և երկիւղիւ վատանունութեան առաւել յորդորին քան թէ օգտակարութեամբ :

Չորրորդ՝ ոչ միայն զհնարաւորութիւն իրացն, այլ և զգիւրութիւնն ցուցանելի է : Իսկ եթէ դժուարին իցէ, յաւելուլ պարտ է և զպարծանս յաղթելոյ դժուարութեցն :

Այսոքիկ ՚ի համոզելն . իսկ ՚ի հերքելն ինչ՝ հակառակօք սոցին հնարիւք վարելի է՝ անիրաւ, փնասակար, անօգուտ, անպատշաճ, դժուարին և անհնարին իսկ ցուցանելով :

Ինդ բաղխոհական հանդիսիւ բովանդակին և բարոյական խրատք և քարոզք, այլ ՚ի սոսա պարտ է ճարտասանին ցուցանել զպարտս ունկնդրաց ՚ի կատարումն աստուածային և մարդկային օրինաց, և սպառնալեօք պատուհասից երկեցուցա-

նել զնոսա : Այլ ապա վայելչականաւն ևս
և օգտակարաւն և խոստացեալ վարձուքն
հոգևորականօք և ապա մարմնաւորօք քա-
ջալերել զնոսա , և զգիւրութիւնն ևս և
զզուարճութիւն կատարման իրացն 'ի վե-
րայ յաւելուլ , և յորդորակօք կատարել
զճառն :

Գ Ա Ս Ը

Տեղեք ատենական հանդիսին :

Հ. Ար իցեն ատենական հանդիսին սե-
փական տեղեք .

Պ. Ատենախօսին երկեակ պարտք են,
դատախազի և ջատագովի :

Արդ դատախազին նախ քան զամենայն
պարտ է ցուցանել զհաւաստիս յանցանաց
ամբաստանելոյն 'ի հանգամանաց անտի
դործոյն . զոր օրինակ զյանցանս սպանու-
թեան յարիւնաշաղախ հանդերձիցն , 'ի
զէնս կրելոյ 'ի ծածուկ , 'ի յառաջագոյն
սպառնալեացն , յայլազոււնելոյ դիմացն , 'ի
փախստենէ , և այլն :

Արկորդ՝ յականատես վկայից :

Արբորդ՝ 'ի խոստովանութենէ պարտա-
ւորին :

Բայց բազում այն է՝ զի ոչ յայտնի զը-

տանին հաւասարք, և յայնժամ գուշակու-
թեամբք և եթ հարկ է վարել դատախա-
զին, յորմէ գուշակական դատն այն կոչի :
Եւ տեղիք գուշակութեանցն են նախըն-
թաց և զուգընթաց և հետևորդ հանդա-
մանք. զոր օրինակ 'ի դատ սպանութեան
նախընթաց հանդամանք են՝ եթէ ամբաս-
տանեալն թշնամութեամբ էր ընդ սպա-
նելոյն, եթէ մահ սպառնացեալ էր նմա,
եթէ զրկեալ 'ի նմանէ, եթէ սովորեալ 'ի
հարուածս կարեւէրս կամ յայլ ոճիրս : Օւ-
գընթացք են՝ եթէ սրտեհ էր նմա տե-
ղին և ժամանակն, և մարթէր նմա ան-
սրտուհաս զերծանել, եթէ լսելի եղև ա-
ղաղակ և հեծութիւն, և այլ այսպիսի նը-
շանք : Իսկ հետևորդք են՝ խուճապել նորա
զվայրօքն, փախչել, այլագունել զխմացն,
զէն 'ի ծածուկ ունել, սրտ 'ի սրտ սր-
տասխանիք, այլովքն հանդերձ :

Իսկ ջատագովին սարտ է նախ ժրխ-
տել զյանցանս ամբաստանելոյն՝ անդստին
'ի նոցին հանդամանաց անհնարին ցու-
ցանելով զայն և 'ի վեր քան զկար նորա :
Բայց եթէ արդարև սարտաւոր իյէ յան-
ցանացն, սարտ է ջատագովին թեթևա-
ցուցանել ըստ կարի զյանցանսն, ցուցա-
նելով եթէ էին ինչ ամբաստանելոյն ի-
րաւունք կամ սատճառք 'ի դործ ան-

դրր ձեռնարկելոյ . վասն որոյ պարտ է ա-
ռաւել ևս ջատագովին հմուտ լինել օրի-
նաց և իրաւանց և սովորութեանց : Իսկ
եթէ բնաւ ամենեին չիցէ մարթ արդա-
րացուցանել զդործն , հարկ է զկամս յան-
ցաւորին ցուցանել անպարտ , դիպաց ըն-
ծայելով զդործն , կամ ապշութեան , կամ
արբեցութեան , կամ բուռն թափոյ կրից ,
կամ գրգռութեան թշնամւոյն , այլովքն
հանդերձ :

Համառօտիւ ասել , յոյժ այլազգ են 'ի
միմեանց դործ դատախազի և ջատագովի-
և դժուարագոյն յոյժ երկրորդիս գործ-
քան զառաջնոյն : Սմա պարտ է ցուցա-
նել 'ի յառաջաբանի իւրում , զի ոչ շար-
ժի յատելութենէ կամ յայլոց կրից , այլ 'ի
սիրոյ և եթ արդարութեան և ճշմարտու-
թեան . իսկ ջատագովին պարտ է ջանալ
յինքն յանկուցանել զլսելիս ցածութեան
բանիւք , և կասկածանս իմն և երկմտու-
թիւն զհակառակորդէն արկանել 'ի միտս
ունկնգրացն : Դատախազին պարտ է զօ-
րաւոր և բացայայտ առնել զպատմու-
թին , իսկ ջատագովին մեղմ և ուրեք ուրեք
սքօղեալ : Դատախազին պարտ է տակաւ
սաստկացուցանել զփաստս , և կնիք զհը-
զօրագոյնն 'ի փաստից 'ի վերայ ածել .
իսկ ջատագովին զհզօրագոյնս 'ի փաս-

տիցն նախ ցրել, և մի երբէք խուսել 'ի պատասխանատրութենէ, այլ մանրախուզիւ հետազօտել զփաստս հակառակորդին և հերքել: Իսկ 'ի վերջաբանին պարտ է երկաքանչիւրոցն ևս եռանդուն յօրինել զբանսն, միոյն 'ի վրէժխնդրութիւն և միւսոյն 'ի գթութիւն շարժելով զլսելիս. յորում զօրավիզն մեծ իցեն ջատագովին վաստակք և առաքինութիւնք ամբաստանելոյն:

Գ Ա Ս Թ

Ձեք բառից:

Հ. Յայս վայր զմասանց իւրաքանչիւր զազգի ազգի ճառիցն և զտեղեաց նոցա պարզաբանեցեր զկանոնս, արդ ասա ինձ, Իցեն ինչ որ ամենայն մասանցս այսոցիկ առ հասարակ պատշաճիցին, և ո՞ր այնոքիկ իցեն:

Պ. Քերականին պարտք են անսխալ զբանս յօրինել՝ նիւթականին և եթ վայելչութեան ուշ ունելով. իսկ ճարտասանին պարտ է իմանալի իմն վայելչութիւն յաւելուլ 'ի նոսա: Աւ առ այս 'ի կիր արկանէ նա զձևս, որոց յամենայն մասունս ճառին են մուտք:

Հ. Օրինչ են ձեք.

Պ. Չեք են նորօրինակ բացատրու-
թիւնք՝ առ ՚ի տալ ազգուութիւն խօսից :

Եւ յայսցանէ են որ բառից և եթ կո-
չին ձեք, որպէս փոխանակ ասելոյ՝ Չիք որ
ուրեք, ասելն՝ « Չիք որ չիք ուրեք » : Եւ
են որ իմաստից կոչին ձեք, որպէս փոխա-
նակ ասելոյ՝ Բազում վիշտս կամ փորձու-
թիւնս կրեալ, ասելն՝ « Բազում ևս ձիւ-
նաբերս յանձին կուտեալ » : Ամ փոխա-
նակ ասելոյ՝ Օ՞ումանս սրով կոտորէին, ա-
սելն՝ « Օ՞ումանս բազմախողխող երկաթոյն
տային կերակուր » :

Հ. Քանի են ձեք բառից .

Պ. Տիրապէս չորք, աւելադրութի, զեղ-
չումն, յոգնահոլովք և նմանաձայնութիւն :

Հ. Օ՞ինչ է աւելադրութիւն .

Պ. Արկնումն նոյն կամ համանշանակ
բառի, պէսպէս ձևովք, զոր օրինակ կրրկ-
նութեամբ ՚ի սկիզբն .

« Ո՞ւր են դպիրքն, ո՞ւր են խրատութքն ,
« ո՞ւր է որ ունի զհամար սրահակերաց
« զմեծի և զփոքու » . Եսայ :

Դարձեալ կրկնութեամբ ՚ի վերջն .

« Իսկ արդ բնութիւնս իմ ոչ կշտամբեալ
« յանդիմանէ զիս՝ եթէ ստեղծայ մերկ ,
« և եթէ եղայ ՚ի դրախտին մերկ , և եթէ
« ելի անտի մերկ , և եթէ ծնայ մերկ , և եթէ
« անդրէն յերկիր մերկանդամ երթամ » .

Եւն :

Գարձեալ խառն կրկնութեամբ .

« Ողորմիմ ողորմիմ սիրելեաց ձերոց , և
« բազում անգամ ողորմիմ անձանց ձե-
« րոց » . Եւէէ :

Գարձեալ համանշանակ բառից կրկ-
նութեամբ .

« Աթէ ցանկ այսպիսի միտս ունիցիս , իբ-
« րև զսգաւոր շրջիս հանապազ , լաս , հե-
« ծես , յողոց հանես , աշխարեսս զցայգ
« և զցերեկ : Մի մեղաւոր միայն կոչես ,
« ցուք զանձինս մեր , այլ զմեզս զամենայն
« մի բոտ միոջէ զմտաւ ածցուք , 'ի համար
« բերցուք զմե՛ն և զփոքրն , այց արաս-
« ցուք , խնդրեսցուք , զի մի ինչ մնասցէ
« անյիշատակ » . Մաբէն :

Հ . Օրինչ է զեղչումն .

Պ . Առութիւն մասանց ինչ բանի պէս
պէս ձևովք . զոր օրինակ .

« Քննեցաւ (ֆնասապարտն) , գտաւ , պատ-
« ժեցաւ , 'ի սուր սպառեցաւ » . Մաբէ :

Աստանօր լուեն շաղկապք :

« Բարկութիւն ամենահօրն զիջաւ 'ի հաշ-
« տութիւն , զի 'ի մէնջ խաղաղութեան
« պատարագն » . Լաճէ : Ուր լռի բառս
Մաբէն :

« Յետ տեսանելոյ զնա յարուցեալ , և շօ-
« շափելոյ ձեռամբ թոմայի , զինչ » . Լաճէ :

Այսինքն տակաւին յետ այնորիկ զինչ գոր-
ծէին առաքեալքն :

Հ . Օ ինչ են յողնահորովք .

Պ . Արկնումն նոյն բառի յայլ և այլ հո-
լովս , կամ բայի յայլ և այլ ժամանակս և
յեղանակս . զոր օրինակ .

« Փառաւորեմք զԱստուած յորժամ զմի-
« մեանց բեռն բառնամք , յորժամ միմեանց
« գիրկս արկանեմք , յորժամ զմիմեամքք
« փարիցիմք , յորժամ առ միմեանս ջոլորի-
« ցիմք , յորժամ միմեանց կարեկից և վըշ-
« տակից գտանիցիմք , յորժամ 'ի վերայ ի
« բերաց արտասուեմք » . Սաբգ :

Աւ դարձեալ . « Արիթայեալ և բրդ-
« գլեալ առ ամենայն ոք դիմէ , զամենայն
« ոք աղաչէ , ամենեցուն աղերսէ » . Սաբգ :

Աւ դարձեալ . « Այլ իմաստունք լացին
« և լային և լան միշտ կենդանի բանիւ-
« քըն իւրեանց » . Ասմք :

Աւ դարձեալ . « Ի խաւարային ժամու
« զխաւարային կերակուրս խաւարային
« մարմնոյս տացուք » . Եւեւ :

Հ . Օ ինչ է նմանաձայնութիւն .

Պ . Բառք կամ յանգք նմանաւորք մի-
մեանց . զոր օրինակ .

« Փրթթեալ վարդից նման թերթից ,
« կամ գերունակ ճրղաց խրնձոր » :

Այլ օրինակ .

« Օոմն 'ի միջի իմ ծածանէր ,

« Քաղցրիկ օգոմն ծիծաղէր » . Եւսբգ :

Այլ օրինակ .

« Գոհար վարդն վառ առեալ

« Ի վեհից վարսիցն արփենից .

« Ի վեր 'ի վերայ վարսից

« Պաւալէր ծաղիկ ծովային » :

Այլ օրինակ .

« Տատանին տազնապաւ տերեք տնկոց

« եղևին ծառոց շարժեալք 'ի հողմոց ուժ

« գին բաղխելոց » . Նաբէի :

Յետինս այս ձև 'ի քերթուածս առաւելապէս ունի տեղի, և այն բազում զգուշութեամբ . զի խաղքս այսոքիկ բառից մանկական առնեն զշարագրածն :

ԴԱՍ Ժ

Ձեք իմաստից :

Հ . Ո՞ր իցեն ձեք իմաստից .

Պ . Ամենայն բան՝ արտաքոյ սովորական ասացուածոյ բացատրեալ, եթէ փոխաբերարար, եթէ այլաբանօրէն, և եթէ այլովոր և է օրինակաւ :

Հ . Մեկնեա՛ ինձ զգոսա մի ըստ միոջէ . և նախ թէ զինչ է փոխաբերութիւն .

Պ . Փոխաբերութիւն է փոփոխումն նշանակութեան բառից յայլ ըստ նմանութեկամ ըստ համեմատութեան : Օր օրինակ Լիճ Երուսաղէմ կոչել զաչս, Որոհաշան զքամբաւ

սօղն և զքսու , Կարո՞ւմսի Կարո՞ւմս զծով . Աւ
պէշս Բարո՞ւմսիս զճանճիկն փոսուռայ և այլն :

« Արդարև ճշմարիտ սարդի ոստայն
կամեցան անկանել՝ որ զայս այսպէսն դը
րոշմեցին 'ի ստագիր զիրսն իւրեանց » .
Բարո՞ւմս : Այսինքն 'ի զուր սնավաստակ
եղեն :

« Աս ձայն զառիւծուն ասեմ , որ զո
չէր 'ի քառաթևին » . Նարե՛ի : Աստանօր
առիւծ զՔրիստոս , և քառաթև զսուրբ
խաչն փոխաբերաբար նշանակէ :

Բայց զգուշալի է նախ մի յանարդ ի
րաց առնուլ փոխաբերութիւնս ազնուա
գունից : Ասն որոյ ստգտանէ Ավրատ ըզ
տողսն Մարկոսի ,

« Ի լեառն Ալպեայ բարձրագիտակ

« Աթուք Հերմէս ձիւն ըսպիտակ » :

Արկրորդ՝ պարտ է փոխաբերութեան
գոլ բացայայտ և մերձաւոր , և մի մ'թին
և բռնազքօսեալ . որպէս եթէ Ապարե՛ի երե
նաբե՛ւ՛ կոչիցէ ոք զայր բարձրահասակ :

Արրորդ՝ մի զքերթողականս 'ի կիր
առնուլ 'ի ճարտասանելն . զոր օրինակ
մարթ է քերթողի ասել զումեքէ անըստ
դիւտ՝ թէ 'ի դալարագեղ զարնայնի տիո
ցրն վախճանեցաւ . բայց ճարտարախօսի
գուն ուրեք :

Չորրորդ՝ մի զերն ընդ փոխաբերու

Թեան խառնակել, ուրեք 'ի փոխաբերեալ միտս և ուրեք ըստ նկարագրին իմացեալ. զոր օրինակ փոխանակ ասելոյ թէ Արտասուք կարճեցին զկեանս նորա, ոչ է օրէն ասել՝ Գետք արտասուաց կարճեցին զթել կենաց նորա:

Հինգերորդ՝ մի 'ի միում վայրի խուկել բազում փոխաբերութիւնս, մանաւանդ զանկցորդելիս ընդ միմեանս: Ստղտանելի է յայսմ մասին մերս Յովհաննէս կաթողիկոս յասելն.

« Յայնմհետէ ասլա նիւթ հրաբորբոք
« դառնութեան մտաց դտեալ ոստիկանին
« զայնպիսի յաղթութիւն, հրկիզութիւնս
« բազումս սփռեալ տարածանէ ընդ ոլոր
« տըս երկրի մերոյ, և 'ի միջօրէի իբրև
« զիշերի մութ և մէգ և մառախուղ և
« խաւար աղջամղջին սլատեալ սլաշարէր
« զասքանազեանս ազն, և 'ի լծակս կշոոց
« եղեալ զերկունս տազնասլ տարակուսա
« նաց, հակամիտեալ կուտեալ գտանէին
« 'ի վերայ մեր ծանրատաղտուկ անուր
« Հաղարու, առաւել քան զքարինս ձո
« րոյն՝ Ասքովրայ: Ասան զի նետք հինից
« և տէգ տեառն սեղացին 'ի մեզ քան
« զի արմատ դառնութեան, զոր երբեմն
« խլեաց տէր 'ի տանէս թորդումայ, կըր
« կին շառաւիղեալ տնկեցաւ յիմանալի

« այդեստանս մեր , 'ի փշահեղձ մայառս
« վերընձիւղեալ յեղծումն և յապականու
« թիւն » :

Հ . Օյնչ է փոխանունութիւն .

Պ . Փոխանունութիւն է յորժամ սլատ
ճառք դնին փոխանակ զործոյ , կամ զործ
փոխանակ սլատճառի , կամ պարունակեալ
փոխանակ պարունակելոյն , և կամ հակա
ռակն նորին , կամ ժամանակն փոխանակ
անցից , և կամ սոցին սակի փոխադրու
թիւնք : Օր օրինակ .

« Ասէր զի ընթեռնոյր զԱսայի մարգա
րէ » . այսինքն զգիրս Ասայեայ մարգարէի :

« Յառնել առաջի ալեաց » . այսինքն ծե
րոց :

« Հնազանդեցուցանէր զամբարտաւան և
« զբիրտ ապստամբութիւն նոցա » . այս
ինքն զմարդիկն ապստամբ :

« Յափշտակեցաւ , զի մի նենդութիւն
« պատրիցէ զանձն նորա » . իմ նենդողք :

« Մանկութիւն վաղվաղակի վախճա
նեալ » . այսինքն մանուկ վաղամեռիկ :

« Ողբամ զքեզ Հայոց աշխարհ » . այս
ինքն բնակիչք հայաստանի :

« Րմպել զբաժակ » . այսինքն զըմպելին
որ 'ի բաժակի :

« Աւ փախեան 'ի Հայս » . իմ յաշխարհն
Հայոց :

« Կորոյս զգարն 'Աոյի » . այսինքն զմարդիկ 'Աոյեան դարուն :

« Օձամենայն արբունս մանկութեան կոտորեալ » . իմ զմանկտին ամենայն :

« Բարձի ակն ունել » . իմ իշխանութեան :

« Արհամարհել զթագ » . այսինքն ըզթագաւորութիւն :

Հ . Օյնչ է խելամտութիւն .

Պ . Ոչ ինչ ընդհատ 'ի փոխանունութենէ վարել զմասն փոխանակ բոլորի , ըզնիւթ փոխանակ իրին , զսեռ ընդ տեսակի , զեզական ընդ յոգնականի , և որ սոցին սակի ձևք : Օ՞որ օրինակ .

« Ահա ոտքն , որք թագեցին զայրն քո 'ի դրան , հանցեն և զքեզ » :

« Վասն այնորիկ և ճնչին փայտին հաւա « տան մարդիկ զանձինս իւրեանց » . այսինքն նաւուն :

« Ալ տեսցէ ամենայն մարմին զփրկութիւն Աստուծոյ , զի տէր խօսեցաւ » . այսինքն ամենայն մարդ , որ է տեսակ սեռական անուանս մարմին :

« Մի' լինիք որպէս զձիս և զջորիս , զի « ոչ գոյ 'ի նոսա իմաստութիւն » . այսինքն իբրև զանբանս :

« Տկարն խրախուսեսցէ թէ հզօր եմ ես , « հանդարտն պատերազմող եղիցի » . այսինքն տկարք խրախուսեսցեն , հանդարտք պատերազմողք եղիցին :

« Սատակել զքետացին և զամուլըհացին », այսինքն զքետացիս և զամուլըհացիս :

ԴԱՍ ԺԱ

Հեզնութիւն . — Երգիծանութիւն . —
Փոխառութիւն . — Անուանաստեղծութիւն

Հ . Օ ի նչ է Հեզնութիւն .

Պ . Հեզնութիւն է ուր հակառակ բառիցն են իմաստք նոցա , զոր օրինակ .

« Ո՛վ քո զօրութեանդ , 'ի ծայրն հասեր
« իմաստից . փրկեցեր զոգի քո՝ զայդ ասե-
« լով » . Լաճք : Օ , որ պարզաբար ասելի էր ,
Պակասամիտ ես . 'ի խորս տգիտութեան
կաս , և զոգիդ քո դատապարտես բանիւդ :

« Հարցանեն ոմանք յիմաստունս մեր ,
« կենդանւոյ լինի՞ պատարագ թէ ոչ . իսկ
« որ բուն կատարեալքն են՝ պատասխանեն ,
« ոչ բնաւ » . Լաճք : Ուր ահա իմաստունն
և բուն կապարեալ նշանակեն զհակառակն ,
այս ինքն զտխմար և զանդէտ :

« Մեծաձայն կարգացէք , զի աստուած
« է , թերևս զբօսանք ինչ իցեն նմա , և
« միանգամայն թերևս առնիցէ հրաման ,
« կամ թէ 'ի քուն իցէ և յառնիցէ » , այս
ինքն 'ի զուր է կարգալդ ձեր , զի չէ նա
աստուած :

Սովին ձեռով Գրիգոր կաթողիկոս պա

պանծեցուցանէ զՏուտէորդին , որ զՀը-
նումայ եկեղեցին ասէր կործանեալ .

« Եւստ յայտ իսկ է , եթէ 'ի զուր աշ-
« խատեցաւ Պօղոս , 'ի զուր աշխատեցաւ
« և Պետրոս , և ոչ ուղղեցան ոտք նորա
« 'ի զնացս՝ ընդ որ խորհեցաւ և արար :
« Ինդունայն են և քարոզութիւնք նոցա ,
« և սուտ էին խոստմունք տեառն առ
« Պետրոս՝ թէ 'ի վերայ այդր վիմի շինե-
« ցից զեկեղեցի իմ , և դրունք դժոխոց
« զնա մի յաղթահարեսցեն : Եւրդ յաղթա-
« հարեցաւ և կորեաւ , զի ոչ է եկեղեցի ,
« այլ այր աւազակաց . ոչ մկրտութիւն 'ի
« թողութիւն մեղաց , այլ միայն լուացու-
« մըն ջրոյ : Եւրդ ուրախ լեր Պիղատոս ,
« ցնծացէք և գուք դապք քահանայապե-
« տաց . վասն զի ոչ սպանիք տէր , այլ մո-
« լորեցուցիչ . ոչ խաչեցիք աստուած , այլ
« դող և աւազակ և խռովարար . ոչ հո-
« վիւ քաջ , այլ վարատող ոչխարաց , սուտ
« է որդին որոտման , և իրաւ է որդին
« Տուտեայ » :

Հ . Օրնչ է երգիծանութիւն .

Պ . Դժնդակ հեգնութիւն . զոր օրինակ
« Վահճ որ քակէիր զտաճարն , և զերիս
« աւուրս շինէիր զնա . ապրեցո զքեզ , եթէ
« որդի ես Եստուծոյ՝ էջ 'ի խաչէդ » :

Եւսպէս Սմբատ սպարապետ զշամիր

հրաշեկ ածեալ զգլխով Մեհրուժանայ, ա-
սէր. « Պսակեմ զքեզ, Մեհրուժան, քան
« զի 'ի խնդիր էիր թագաւորել Հայոց. և
« ինձ ասպետիս պարտ է զքեզ պսակել
« ըստ սովորական իշխանութեան իմոյ
« հայրենեաց » . Խորեն :

Բնդ ձեովս ընդ այսուիկ բովանդա-
կին և դսրովանք, որով ճարտարախօսն
կշտամբէ զարժանին դսրովանաց. զոր օ-
րինակ Վամբրոնացի զբանսարկուն.

« Ուր դու, զրպարտիչ դատախազ, եկ
« այժմ կայ մեզ առնթեր, ոչ իբր սիրելի,
« այլ իբրև զթշնամի. տես և ողբա յանձն
« քո, տես և յամօթ լեր 'ի գործս քո. տես,
« սա այն է՝ որում զխաչն մեքենայեցեր,
« որում զլեզլին արբուցեր, զոր գողա-
« ցեալ համբաւեցեր » :

Են և պատրուակեալ կշտամբանք, որ
լռելեայն տան իմանալ զդսրովանս. զոր
օրինակ Պօղոսի ասելն ցկորնթացիս .
« Յայդմ ոչ գովեմ զձեզ » :

Եւ Ոսկերերանի ստէպ զանձն 'ի մէջ
բերել, և խառն ընդ այլս յանդիմանել .
զոր օրինակ .

« Որչափ չարեօք լի եմք, և ոչ զգամք .
« զմիմեանս խաժանեմք, զմիմեանս ուտեմք,
« մեղանչեմք, ամբաստանեմք, բամբասեմք,
« ընդ ընկերաց փառս խանդամք » :

Հ. Օ՛խնչ է փոխառութիւն .

Պ. Օ՛միոյ իրիք հանդամանս այլում
տալ ըստ համեմատութեան կամ ըստ նը-
մանութեան . զոր օրինակ .

« Գիշերադէմ գորով ես, 'ի բնաւից սլար-
սաւիմ » . այսինքն սեւադէմ . Գ. օ. 2 :

« Որքան 'ի սեւ և 'ի մութ կեանքս պան-
դրխտիմք » . այսինքն 'ի խաւարային և 'ի
տխուր կեանս յայս . Լ. 3. 5 :

« Բնդ աչացաւացն նեղելոց մշտագիշե-
« ընն խարխափանօք » . այսինքն որպէս
միշտ 'ի խաւարի խարխափելով . Ն. 3. 7 :

« Ի կողմանս ասորեստանի դադարէ առ
« զետովն երկրունեայ աւուրս » . այսինքն
երկամսեայ ժամանակ . Խ. 3. 12 :

Բստ այսմ ասեմք. Անցին հունձք երեք,
փոխանակ ասելոյ ամք :

Բստ այսմ և Աղիշէի վարդապետի
ասելն .

« Բազում ձմերաց հալեցան սառնամա-
« նիք , եհաս դարուն , և եկին նորեկ ծիծ-
« ոունք , տեսին և խնդացին կենցաղա-
« սէր մարդիկ , և նոքա (երանելի արիկ-
« նայքն) ոչ երբէք կարացին տեսանել
« զանձկալիսն իւրեանց » :

Հ. Օ՛խնչ է այլաբանութիւն .

Պ. Բան 'ի բազում փոխաբերութեանց
հիւսեալ . որպէս Շնորհալոյ այլաբանե-

լն զվախճան եղբօր իւրոյ Գրիգորի կա-
թողիկոսի՝ օրինակաւ նաւարկութեան.

« Ինքն նաւու հաւատոյ ընդ ծով աշխար-
« հիս՝ հողմով Հողւոյն ուղղակի նաւա-
« պետեալ ճշմարտութեամբ և առաքինու-
« թեամբ, եհաս անվնաս յանքոյթ և ա-
« ռանց ալեաց նաւահանդիսան » :

Այլ օրինակ .

« Օրնան կուսանք ազգրս բազումս ,
Եւ մարբք մանկունք ըզհրապարակրս
ծերոց .

Ի զիրկրս սրբութեան աղօթից և
պահոց

Աճեցին հաւատովք զարդացեալք ՚ի
Քրիստոս » . Ա. Ե :

Գեղեցիկ է յոյժ այլաբանութիւն այ-
լւոյն ՚ի սաղմոսս .

« Այդի Ազխատոսէ փոխեցեր , հաներ
« զհեթանոսս և զնոսա տնկեցեր , և ա-
« ռաջնորդեցեր նմա : Հաստատեցեր զար-
« մատս նորա , և ելից զերկիր . ծածկեաց
« զլերինս հովանի նորա , և բարունակ նո-
« րա զմայրս Աստուծոյ : Չգեաց զորթ
« իւր մինչև ՚ի ծով , մինչև ՚ի գետս են
« շառաւիղք նորա : Ինդէր քակեցեր ըզ-
« ցանկ նորա . կթեն զնա անցաւորք ճա-
« նապարհի : Ապականեաց զնա խող ան-
« տառի , և երէ վայրի արածեցաւ ՚ի նմա :

« Աստուած զօրութեանց , դարձ հայեաց
« յերկնից , և տես . այց արա այգւոյս
« այսմիկ , և դարման տար սմա՝ զոր տըն
« կեաց աջքո » :

Այլաբանութեան նոյն կանոնք են որ
ինչ փոխաբերութեան . այլ 'ի սմա զյու
շալի է և ևս՝ չփոխել զայլաբանութիւնն
այլ յայլմէ , այլ յորոց իրաց առեալ իցէ
նմանութիւնն՝ նովին և աւարտել :

Հ . Օրինչ է անուանաստեղծութիւն .

Պ . Ներդաշնակութիւն բառից ըստ ի
մաստիցն . զորօրինակ ճճուել կամ ճոռու
ղել ճնճղկանց , բզզել մեղուաց , դարդա
փել տախտակաց , ճղփումն ջուրց , ճոնչել
ծղինեաց , ճարճատիւն փշոց 'ի հուր , շըր
շիւն տերեւոց , և այլն :

Վ այելուչ և զօրաւոր յոյժ առնէ զբանն
ձևս այս , որպէս տեսանի օրինակօքս .

« Անդ էր լսել թնդիւն վահանաց , շը
« կահիւն աղեղանց , շողիւն սուսերաց , շա
« չիւն նշանաց , շառաչիւն նետից » . Մակաբ :

« Արփիւնք վահանաւորացն , և ճայթմունք
« լարից աղեղանց զլսելիս ամենեցուն առ
« հասարակ խլացուցանէին » . Եւեբ :

« Աւ 'ի տրոփական դոփմանէ ոտիցն
« թնդեալ տանիքն , և 'ի վայր փլուզեալ » .

Յ . Ը . Կաթ :

« Ի գիւ զայր 'ի գիւ սայլիկն 'ի գիւ
« Ի մասեաց յաջ կողմանէն » . Նաբէ :

ԴԱՍ ԺԲ

Դերանուենութիւն և Շրջաբանութիւն . —
Չափազանցութիւն . -- Բացադանչութիւն:

Հ . Օ՛րինչ է դերանուենութիւն կամ շրջաբանութիւն :

Պ . Փոխանակ անուան ուրուք այլ ինչ հասարակ անուն սեփականել : Օ՛րր օրինակ՝ փողն տարսոնեան , այսինքն Պօղոս , Ամլորդին , այսինքն Յովհաննէս մկրտիչն . Արդին կորստեան , այսինքն Յուդա , և այլն :
« Յաղագս արմատոյն հանուրց մարդկու .
« Թեանս , կամ թէ հաճոյ ումեք թուեսցի
« ասել՝ ծայրին » . Կ՛ր Աղամայ . Խո՛ւն :

Իստ այսմ է և շրջաբանութիւն . զի զոր համառօտիւ սակաւ բառիւք մարթ է առաջի առնել , ճարտասանն բազում բառիւք առաջի առնէ :

Օ՛րր օրինակ փոխանակ ասելոյ՝ թէ Իբրև եղև զիշեր , ասէ .

« Մինչ դեռ խաղաղութեանն պատեալ
« էր զամենայն , և այն ինչ զիշերն իւրով
« արազութեամբ ընդմիջէր » . Իճասար :

Փոխանակ ասելոյ՝ Իբրև դարուն եղև , ասէ .

« Իբրև ՚ի բաց եղաւ ձմեռնային ձիւնա
« խաղաղ սառնամանեաց ցրտութիւն : —

« Իբրև դարնանային հարաւակողմն զձմե,
« րայնոյն ժամանակ ցրտութեանն 'ի բաց
« մերկանայր : — Իբրև դրունք . դարնայ,
« նոյն բացան և աւուրքն ջերոտք զտե,
« ղի փոխաբերեցին : — Իբրև ձմեռնային
« սգաւորութիւնն 'ի դարնանային բարե,
« խառնութիւն օդոց յեղանակէր զփո,
« փոխումն » . Յ^աՎ^աԿ^աԵ^ա :

Փոխանակ ասելոյ՝ Իբրև այդ լինէր, ասէ,
« Իբրև լոյսն զղիշերն մերկանայր : — Այն
« ինչ կամէր առաւօտն 'ի զղիշերոյն մեր,
« կանալ : — Այն ինչ վարդագոյն ծայ,
« րակարմիր արեգակն ընդ երկիր ծաւա,
« լել կամէր » . Մ^աԿ^աԵ^ա :

Փոխանակ ասելոյ՝ Մինչև էր մեռեալ,
ասէ .

« Մինչ դեռ ջերմ ոգիքն 'ի ծոցոյն չե էին
« թափեալ , և շունչ վախճանին չե էր
« հասեալ : — Մինչ դեռ յոգւոցն սլար,
« զել ապաստան կայր » . Մ^աԿ^աԵ^ա :

Վամբրոնացի զմիակ բառս խօսել տես
ինձ քանի օրինակաւ բացատրէ .

« Պետրոս՝ որ 'ի Ապիառնառում սնեալ՝
« լսեմք զի ընդ հռոմայեցւոց լեզուն խը,
« րոխտալով արշաւէ , և Փիլիպպոս՝ որ 'ի
« Ռեթսայիդա զալիլիացւոց՝ արաբացւոց
« բարբառովն զխօսս իւր յօդէ , Յովհան,
« նէս՝ որ 'ի Ասղարէթ սնեալ՝ զիսիրդ կի-

« լիկեցւոց ձայնիւն զմեզ հարցանէ . թա
« դէսն այն տխմար տեսէք սրբան վայե
« լուչ մեծաց հայոց բառիւքն զբանս իւր
« յօդէ » :

Հ . Օ ինչ է չափազանցութիւն .

Պ . Առաւելու կամ նուազել տարապայ
ման զզօրութիւն բանին : Օ որ օրինակ .
« Իբրև զմրրիկ կառք նորա , արագա
« դոյն քան զարծուիս երիվարք նորա » :

« Գոյ հնար թուել զխիճս հեղեղատի,
« և զաւազ ծովու , և զշիթս անձրևի , և
« ոչ զստեղծեալն առ 'ի քէն նորազիւտ
« բանս և իրս » . Յովն . Իմաստ :

« Արդարև իսկ բազում աշխարանաց
« արժանի եմք , բազում ողբոց , եթէ ա
« մենայն աշխարհս ձայն առնուցու , զող
« բըս հարկանիցէ , և քարինք և փայտք և
« ծառք և երէք և թռչունք և ձկունք , և
« ամենեին ամենայն տիեզերք համօրէն
« 'ի ձայն աղի և ողբում աշխարանաց աշ
« խարիցեն , ոչ ինչ արժանի աշխարելոյն
« աշխարիցեն » . Ուիէբ :

« Աչ ինչ եթող չարիս՝ զոր ոչ գործեաց
« 'ի կեանս իւր , և ոչ մնաց 'ի մեծամեծ
« չարեացն , որ ոչ անցին ընդ նա 'ի
« մահուան իւրում » . Եւեւ :

« Բազում անգամ է տեսանել զգազա
« նըս վայրենիս , զարջ զինձ զգայլ զա

« ոիւծ հանդարտացեալս դարմանելով և
« մարդասէրս , իսկ զբարկասիրան և ոչ
« երբէք : Բազում անգամ և զծով տեսա
« նեմք հանդարտացեալ յալեաց և ցածու
« ցեալ 'ի վայրենութե . իսկ զբարկացողն
« և ոչ բնաւ : Հանասպազ 'ի դազա
« նութեան կայ , միշտ 'ի վայրենութեան ,
« յար 'ի տմարդութեան , համակ յալէկո
« ծութեան » . ՍՊԻԳ :

« Օ , ի եթէ զլիճ մի ծովուց 'ի յորա
« կութիւն դեղոյ յեղեղեցից , և զգաշտս
« ասպարիզօք բազմօք սահմանեալ 'ի տա
« րածունն լայնութեան քարտենի չափե
« ցից , և զպուրակս յոգունց անտառաց
« շամբից եղեգանց 'ի հաստուածս գոյու
« թեան դրչաց կազմեցից , և ոչ զթիւ մի
« 'ի բարդեւոցն անօրէնութեանց զօրե
« ցից ընդ գրով սահմանի գրաւել » . ՆՊԵԷ :

Հ . Օ , ինչ է բացազանչութիւն .

Պ . Բարբառ յայտարար սաստկագոյն
յուզման կրից հոգւոյ . զոր օրինակ .
« Ո՛վ մեծի տուրեւառութեան շնորհի երկ
« նայնոցն և երկրայնոցս , զի սոքա ետուն
« մարմին , և 'ի նոցանէ առին զհոգին » .

ԼՊԷ :

« Ո՛հ ես մեղայ նրման նրմին ,
« Եւ յանցանաց մօրն Եւային .
« Եւս առաւել քան ըզնոսին

Վերտայ յանցող սուրբ օրինին» . Շնորհ :

« Ո՛վ անբերելի ազիտութեանս և ապա-
« ոում բարուցս . եկ Արեմիա ցաւակից
« մարգարէ , և վշտակցելով ողբա՛ զքե-
« կումն իմ և ժողովրդեան իմոյ » . ԱճԻ :

« Ո՛հ , կարի է առասպելս , և առասպել-
« լաց առասպել » . Խորհն :

« Ո՛վ համբոյր՝ նենգութեան նշան , և
« առիթ մահու » . Շնորհ :

Ի սոյն ձև պատկանի և մահազանչու-
թիւն , որ ՚ի վախճան բանից ՚ի կիր ար-
կանի , զնոյն ունելով զօրութիւն հանդոյն
բացազանչութեան :

Որպէս Ամբրոնացի յետ ճառելոյ զան-
հաս խորհրդոց տնօրէնութեանցն Քրիս-
տոսի և գալստեան Հոգւոյն սրբոյ , ՚ի վե-
րայ ածէ .

« Խորհուրդ լայն և ընդարձակ , առա-
« ւելութիւն գիտութեանն Աստուծոյ տե-
« սանի , եղբարք » :

Ալ յաճախ ուրեք ՚ի վարս հարանց
զհետ պատմութեան առաքինութեանց
նոցա յարէ պատմիչն .

« Այս է խոնարհութիւն . — Այսպիսի է
հնազանդութիւն » . և այլն :

ԴԱՍ ԺԳ

Տարակուսութիւն . — Աղերսանք . — Անէճք :

Հ . Օ՛րնչ է տարակուսութիւն .

Պ . Աեղծիք երկուանաց մտաց ճարտա-
սանին , առ 'ի բերել զհետ զելս տարա-
կուսանացն . զոր օրինակ ,

« Հիացեալ զարմանամ մտօք , և ոչ զի
« տեմ ուստի սարտ և պատշաճ իցէ առ
« նել սկիզբն ճառիս » . Բարս :

« Աւ արդ ո՞ւր արդեօք զգարչապարս
« ոտին կառուցից , և կամ յոր վստահու-
« թիւն զաչս իմ յառեցից : Օ՛ր եթէ
« 'ի ձեղուն բարձրութեան երկնի,անտի
« անձրեեաց հուրն Սողոմայ . իսկ եթէ 'ի
« յատակս խորութեան երկրի,սա եբարձ
« զկոկորդն ըմբօնողական և եկուզ զՎա-
« դան բանական Աբիրոնի : Աթէ 'ի հա-
« մատարած օդոյն պարզութիւն , այն ե-
« ղև եզիպտացւոցն խաւար շօշափելի :
« Այլ դու ամենազօր արարիչ բնաւից , և
« ինձ ողորմեա կրկին զթութեամբ » .
Եբէ :

« Օ՛ր թէ պահանջէ յինէն հայրս հոգ-
« ւոց և դուք ընդ նմին գործունեայք բա-
« րեաց՝ յանձն առից , զարհուրիմ երկիւ-

« զիւ՝ նայեցեալ յիմս տկարութիւն , և
« ՚ի մեծի այսր աստիճանի բարձրութիւն,
« մանաւանդ ՚ի չար և յանմասն բարեաց
« ժամանակիս : Իսկ եթէ յայսցանէ և որ
« նման սոցին զանգիտեալ՝ ընդդիմանամ
« կոչողիդ հրամանի , երկնչիմ դարձեալ
« յանհնազանդութեան դատաստանէ : Աւ
« այսոցիկ տարակուսանաց ելք ոչ այլ ուս
« տեք , բայց եթէ յաստուածահաճոյ ա
« զութից ձերոց » . Ընդհ : :

« Այ զիտեմ ուստի զայս օրէնս դտեալ
« մեր . ՚ի նախնեացն ոչ ունիմք , զի ահա
« ցուցաւ վերագոյն . և յայլ ազգս ոչ տե
« սանեմք . և նոր առաքեալ ոչ յայտնեցաւ
« մեզ , որ խախտեաց զառաքելոցն սահ
« ման : Յայտ է թէ ունիմք յանիմաստու
« թենէ և յարհամարհութենէ օրինացն
« Աստուծոյ » . Լսմք :

« Աւ արդ ուստի հաւանեցուցից զձեզ ,
« ոչ զիտեմ . զայն ասացից՝ թէ որդն նո
« ցա ոչ վախճանի և հուրն ոչ շիջանի , թէ
« զմիւսն որ ասիցէ՝ թէ երթիցեն ՚ի հու
« րըն յաւիտենից : Աթէ զմեծատունն ա
« ծեալ կացուցից առաջի , և տակաւին ա
« սիցէք թէ վասն սպառնալեաց ասացեալ
« է : Աւ արդ ուստի հաւանեցուցից ըզ
« ձեզ : Սատանայի միտք են այդ , անօ
« դուտ շնորհ շնորհեալ՝ որ ամենեկին ծոյ

« լոս կազմէ . և արդ ուստի՞ բառնայցեմք
« զայն 'ի միջոյ . որչափ և ասիցեմք 'ի գը-
« ըոց , ասէք՝ վասն սպառնալեաց է : Այլ
« զայլոց զհանդերձելոցն թերևս մարթի-
« ցէ որ ասել , այլ զանցելոցն և 'ի գլուխ
« ելելոցն՝ ոչ ևս : Առարուք զջրհեղեղէն .
« մի թէ այն վասն սպառնալեաց ինչ ա-
« սացաւ , և չեղև , և չել 'ի գլուխ » .
Ուկեք :

Հ . Օ ինչ են աղերսանք .

Պ . Պաղատանք խառն ընդ պատճառա-
բանութիւնս առ 'ի հաւանեցուցանել :

Ազգողագոյն է ձևս , և յաճախ սովո-
րութիւն է 'ի կիր առնուլ 'ի վերջաբա-
նութիւնս : Օր օրինակ Ամբրոնացի
ձևացուցանէ աղերս 'ի դիմաց Արդւոյ
առ Հոգի .

« Այսուհետև քեզ եկեալ եհաս ժամա-
« նակ դործոյ , ո՛վ փառակից իմ Հոգի .
« պարտիս և զքոյդ մարդասիրութիւն
« ցուցանել 'ի յերկրի . այսուհետև քեզ ա-
« պաստան առնեմ զանուն աստուածու-
« թեանս մեր յարգել առ մարդիկ . Հայր
« իմ ներեաց և եթող զպարտսն՝ որով
« դուն խափանեցար 'ի հեղոյ առ նոսա՝
« մարմնոյ իմ պատարագան . սա առ զիս
« առհաւատչեայ 'ի նոցանէ , և տայ նո-
« ցա զքեզ խաղաղութիւն : Այլ այժմիկ ,

« սիրոյ աղբիւր , սիրով առ նոսա . և միւր
« թարեա զորս 'ի սլանդխտուլթեան վայ
« ըրն նժղեհ և անցաւոր կենօք տառա
« պին : Քեզ տամ զնոսա , քեզ յանձն առ
« նեմ զնոսա . զքեզ խոստացայ նոցա , և
« այժմ 'ի քեզ ամրափակեմ զնոսա զա
« մենեսեան » :

« Աղաչեմ զամենեսեան , և զոտս եղ
« բարցդ սրբոց արտասուօք սիրոյն համ
« բուրեմ . ներեցէք իմոյ անզգամուլթեա
« նըս , և իբր վշտակից ծառայակից ըն
« կալարուք զիս , և զձեզ ընկալցի Յիսուս
« Քրիստոս տէր մեր » . Լ.ճԲ :

Հ . Օխնչ են անէծք .

Պ . Չե մաղթելոյ այլոց կամ անձին
չարիս առ զայրացման . զոր օրինակ .

« Անէծք այնպիսի բանից » . ՈւկեԲ :

« Աորիցէ օրն՝ յորում ես ծնայ , և զի
« շերն՝ յորում ասացին թէ ահա արու :
« Խաւարեսցի զիշերն այն , և մի խընդ
« րեսցէ զնա տէր 'ի վերուստ : Այի եկես
« ցէ 'ի վերայ նորա լոյս . ընկալցի զնա
« խաւար և ստուերք մահու . եկեսցէ 'ի
« վերայ նորա մէզ : Անիծեալ լիցի օրն
« այն և զիշերն , և տարցի զնա խաւար . մի
« եղիցի յաւուրս տարւոյ , և մի թուեսցի
« յաւուրս ամսոց : Այլ զիշերն այն եղիցի
« 'ի ցաւս , և մի եկեսցէ 'ի վերայ նորա

« ուրախութիւն և մի ցնծութիւն : խա-
« ւարեսցին աստեղք զիշերոյն այնորիկ .
« սպասեսցէ և 'ի լոյս մի եկեսցէ , և մի
« տեսցէ զարուսեակն ծագեալ » . ՅԻ :

« Այլ իմ մեռցի և կորիցէ անուն և յի-
« շատակ յերեսաց երկրէ , և խաւարես-
« ցին բիրք աչացս , և մի տեսցեն զլոյս . և
« քակեսցին ականջքս ' և համր եղիցի հո-
« վեալ բերանս , և լեզու իմ 'ի քիմս իմ
« կցեսցի , և մէգ և մառախուղ մեղաց և
« ստուերք մահու պատեսցէ զբոլոր անձ-
« նրս , եթէ ինչ շարժեցայց կամ զգա-
« ցայց տեսանել կամ լսել կամ խօսել զար-
« դարոյն զանիրաւութիւն . . . Քաւ լիցի
« ինձ ձեռս ամբառնալ յօծեալն Աստու-
« ծոյ . . . ապա թէ ոչ , բացցէ երկիր զբե-
« րան իւր , և կցէ զիս կորստեամբ ընդ
« բանակն Աբիրոնի , և կենդանւոյն իջ-
« ցեմ 'ի դժոխս » . ՅԻԿ . ԿԻ :

« Վասն այսորիկ Աստուած 'ի սպառ-
« կործանեսցէ զքեզ յաւիտեան .

Եւ խրլեսցէ զարմատըս քո ,

Յերկրէ հանցէ կենդանական : . . .

Արդ քեզ ելցէ կարճ 'ի յօրեր ,

Եւ կայենին հասցէ երեր :

Ի դառնութիւն դարձցին տարերք ,

Ջրհեղեղին ելցեն գետերք :

Սեաւ ամսլ մըթին կարկրտաբեր

Օքեզ արասցէ անպըտղաբեր .
Սոգոմացւոյ հուր ծրծրմբեր
Իջցէ 'ի գլուխդ արիւնակեր : . .
Արդ 'ի գրծոխս իջցես 'ի խոր ,
Քեզ անկողին մէցք և ցեցեր .
Եւ նոյն հրեշտակին մահաբեր
Սըրով հատցէ զքեզ 'ի յազդեր . . .
Տուն քո լիցի անհետ աւեր ,
Եւ գու գերի ազգով երեր » . Ընդհ :

ԴԱՍ ԺԴ

Հարցումն . — Հաղորդակցութիւն . — Լուս
թիւն . — Ընորհումն :

Հ . Օյնչ է հարցումն .

Պ . Չե հարցական , ոչ առ 'ի խնդրել
զլուծումն տարակուսանաց՝ այլ առ 'ի ստի-
պել զունկնդիրս , և առ 'ի սաստկագոյն
բացատրել զբանն . զոր օրինակ .

« Բնդէր , աչս ունելով և ականջս , ոչ տե-
« սանեմք և ոչ լսեմք : Քանի՞ ասպարէզ
« է 'ի բերանոյ մինչև ցունկն , զի զբար-
« բառ սորին ոչ ներեմք ունկանն լսել և
« տեղի տալ : Այսքան էր խաւարեցուցաք
« զպայծառութիւն եկեղեցւոյ վասն սը-
« նոտի յուսոյ » . Լամբ :

« Ս'ի թէ որ տնկեաց զունկն , ինքն ո՛չ

« լուիցէ : — Ա՞յլ իցէ նման քեզ յաս-
« տուածս , տէր . կամ ո՞վ նմանիցի քեզ ,
« փառաւորեալդ 'ի սուրբս » : Աւր պարզա-
բար պարտ էր ասել . Որ տնկեաց զուն-
կըն , ինքն ևս լսիցէ : Աչ ոք է նման քեզ
յաստուածս , տէր . և ոչ ոք նմանիցի
քեզ , փառաւորեալդ 'ի սուրբս :

Այսպէս և Ոսկերբերան փոխանակ ա-
սելոյ՝ թէ այլ ոչ ևս կարեմ համբերել ,
հզօրագոյն յոյժ գործէ զբանն հարցուա-
ծոյ պայմանաւ ասելով . « Մինչև ցայդ
վայր համբերիցեմ » :

Մերթ ևս հարցմանն առնթեր դնի
պատասխանին . զոր օրինակ .

« Իսկ արդ չա՞ր արժան էր ասել թաղա-
«ւորին . քաւ , ես ոչ ասեմ . այլ խրատ 'ի
« գործ արկեալ զայլս ուսուցանեմ » . Եւէն :

« Օ՞ ինչ պատու յայնժամ ետուն աչ-
« խարհի . զինչ այլ , բայց եթէ երկիրս եր-
« կին եղև , և փառքն՝ որ 'ի բարձունս էր
« Աստուծոյ՝ և յերկիրս տարածեցաւ » .
Լ.՝ճԲ :

« Օ՞ ինչ ծանր հրաման առաք առնել .
« զսա՞րս հատանել անցանել , թէ ընդ օդս
« թռչել , թէ ընդ բնութիւն համատարած
« ծովուն ցամաքաթևս սլանալ : Աւ ոչ
« երբէք . այլ այնպէս զիւրին է առաքի-
« նութիւն , մինչև այնպիսի գործոյ մի ինչ :

« կարօտանալ, այլ միայն ողւոյն և զթոյ:
« Օ՞ր զործի ունէին առաքեալքն՝ որ
« զայնպիսի ուղղութիւնս արարին. ոչ միա
« ձորձք և բռկք շրջէին, և ամենեցուն յաղ
« թեցին: Օ՞րնչ գժուարին 'ի հրամանաց
« իցէ. Մի՛, ասէ, առներ զոք թշնամի.
« մի՛ ատեար զոք. մի՛ չար զումբէ խօսիր:
« Սոցին հակառակք են գժուարինք, և
« ոչ սոքա » . Ուրեք :

Ընդ սովիմք բովանդակի և ձեն հաղոր
դակցութեան, որով ճարտարախօսն վըս
տահացեալ 'ի դատ իւր՝ հարցանէ զուն
կրնդիրս. զոր օրինակ .

« Արդ աղէ ասա, ո՞ր է արժանահաւատա
« լի. բանքն եթէ արդիւնքն. ոչ ապաքէն
« արդիւնքն, զի բանքն չվճարեն ինչ 'ի
« հաւատոց սակս, բանիւ զՔրիստոսին
« կրել զանուն, և գործով զսատանային,
« զի լի և լի է այնպիսին անհաւատու
« թեամբ » . Սուրբ :

« Արդ աղէ ասա, եթէ յանկարծ կոչ լի
« նիցի 'ի քաղաք ուրեք արքունի, որք ոչ
« զրաստու ինչ կարօտ լինիցին, ոչ պա
« տանեաց, ոչ կօշկաց, և ոչ այլ ինչ կահի
« և կազմածոյ, այլ զհացիկն միայն և ըզ
« ջուր յաղբերացն բաւական համարիցին,
« և այլքն ասիցեն՝ եթէ ոչ կառս կազմի
« ցէք, և ոչ կակուղ անկողինս պատրաս

« տիցէք , չկարեմք երթալ , եթէ ոչ բա-
« զում սպասաւորս ունիցիմք , և ստէս
« հանդէլ հասանիցէ , և նժոյգ ևս և
« կարճութեան վանս և այլ ինչ բազում
« պէտս , չկարեմք երթալ . և ընդ ոյս ար-
« ժան է զարմանալ , ընդ նոսա՞ թէ ընդ
« սոսա . յայտ է թէ ընդ սոսա , որք ոչ
« ինչ իւիք ումեք բուռն լինին : Աոյնպէս
« և յաշխարհիս ճանապարհի ոմանց բա-
« զում պէտք են , և ոմանց չափ ինչ . որ-
« պէս զի աղքատութեամբն , եթէ պարտ
« ինչ էր , 'ի դէպ էր մեծամտել » : Ո՞ւէք :
Հ . Օ՞րնչ է լուծիւն .

Պ . Առելովն ինչ ազգողադոյն տալ ի-
մանալ զայն : զոր օրինակ .

« Օ՞ր մի մի թուիցեմ . այլ զամենայն անար-
« ժանս յառաջ մատուցանէր , և զամենայն
« արժանաւորս յետս տանէր » . Եւէն :

« Ար մեղանչէ , օրինազանց է . իսկ որ
« զօրէնս լուծանէ , զինչ անուն նորա . ես
« պատկառիմ ասել , մանաւանդ թէ եր-
« կընչիմ . զի մի աղեկէզ բժշկութեամբս
« վասն 'ի խոր հարմանս զգեղ բանիս՝ ե-
« րևեցայց թշնամի » . Լ՞՞՞ք :

« Օ՞րս վասն Առոնոսի և Արամազդայ
« պատմութիւնք իցեն՝ ամաչեմ ասել . ոչ
« սակս նոցա՝ որ արժանի են ամենայն
« պարսաւանոց , այլ խնայեմ 'ի լեզու իմ ,

« զի մի ժանտասցի յիշատակօք պղծու »

« Թեան նոցա » . Ս^{աբգ} :

« Ա՛վ թշուառութեանս , և արտասուաց
« արժանի մոլութեանս , վասն այսորիկ և
« քահանայք ելով , 'ի դպրաց կարգ թե
« ըստ կարողանամք լինել , և եպիսկոպոսք
« բնաւ և ոչ ճաշակեալ զքաղցրութիւն
« բարեկարգութեանս . զոր բովանդակին
« ասել հեղղանամ , բաւականացեալ 'ի լի
« նելս անձամբ անձին կշտամբիչ » . Ն^{աբգ} :

« Քահանայք քարոզք բանին

Եւ սպասաւորք սուրբ խորհրդին

Ընխրտրաբար վարուք կէին ,

« Օր չէ ասել պարտ՝ գործէին » . Շ^{աբգ} :

Բ՛ստ այսմ է և կեղծեօք զանց առնել
լոյ զբանիւք իւիք՝ ասելն զայն . զոր օրինակ
« Թողից ասել զևս դժնդակագոյնսն այ
« սրբ ժամանակի եպիսկոպոսաց գործ . զի
« և բազում անարդանաց և տուծից տա
« նին յայլազգեաց , ոչ յաղագս աստուա
« ծային օրինացն՝ այլ վասն սնտոի փա
« ռացն յուսոյ » :

« Օպտուղսն՝ որ նախ քան զայս 'ի

« միաշնչութեանն և մինչդեռ 'ի տաճարին

« խաղաղութեան էաք՝ տայր աշխարհ ,

« ձեզ թողումք իմաստասիրել քան թէ բա

« նիւ զանձառն ճառել » . Շ^{աբգ} :

Հ. Օրինչ է շնորհումն .

Պ. Շնորհել անիրաւ ինչ հակառակորդին , վստահացեալ յանձին իրաւունքս : Օր օրինակ առնէ առաքեալն .

« Իսկ արդ ասիցես . ոստքն փշրեցան , զի
« ես պատուաստեցայց : Բարւոք է . ան-
« հաւատութեամբն փշրեցան , և դու հա-
« ւատովք հաստատեցար . մի հպարտա-
« նար , այլ երկիր : զի եթէ Աստուած 'ի
« բուն ոստն ոչ խնայեաց , գուցէ եր-
« բէք և 'ի քեզ ոչ խնայեսցէ » :

« Բայց համարեաց ' թէ 'ի հաւատոյն
« թիւրեցան . 'ի կարգացն ոյր աղապաւ .
« զի այլ է հաւատոյն բան , և այլ է աւան-
« դութիւն կրօնից : — Բարձեալ թիւր'
« մի ազգն կամ երկունն . երեք ազգ քրիս-
« տոնէից , և որ ընդ նոքօք բազմապատիկ
« ազինք հաստատուն աշխարհօք և աթո-
« ռովք՝ զիարդ վրդովեցան 'ի ճշմարտու-
« թենէն , և առ յեղյեղեալ և տատանեալ
« ազգս մեր նոյն միայն մնաց հաստա-
« տուն » . Լ. Բ :

« Գեղեցիկ դատիմք 'ի ձէնջ , եղբարք .
« քանզի գրեալ է , մի փոխեսցես զսահմա-
« նրս զոր եղին հարքն քո . և որ քակէ
« զցանկ , հարցէ զնա օձ : Բայց ասա ,
« զորս խոստովանիս դու հարս քո . եթէ
« զառաքեալն և զհայրապետն՝ որք աս-

« տուածաշունչ բանիւք դեռևս կենդանի
« են 'ի միջի մերում, և առ ամենայն ճրշ-
« մարտութիւն առաջնորդեն, և ես եմ'նո-
« ցա ջատագով և առ 'ինոցանէ վարժեալ և
« աշակերտեալ: Աստա թէ այլս ոմանս, ո-
« թոց ոչ անուն երևի 'ի միջի մերում, և
« ոչ արձանագրութիւն բանից վկայ իւ-
« բեանց ուղղութեանն, զիմաստասիրու-
« թիւնն պարտիմք յայսմ վայրի 'ի գործ
« արկանել, և ընտրութեամբ ճանաչել,
« մի գուցէ լիցին մեզ մոլորեցուցիչք 'ի
« սրբոցն հետոց, որպէս ծերքն Խորայէ-
« լի 'ի Մովսիսէ » . Լ.ճԲ :

Ի սոյն պատկանի ձև և վստահու-
թիւնն, որով ճարտարախօսն աներկիւղ
ձայն տայ հակառակորդին, որպէս Շք-
նորհալի առ ժպիրհն .

« Ծանիր և զայս, զի զիս թէ և ամենայն
« լեզուք գովեսցեն յայն բարի՝ որ ոչ է առ
« իս, հողմոց հնչմունք վարկանիմ, և թէ
« պարսաւէ ոք և դատի յայն ինչ՝ որ 'ի
« մտացս խղճէ ոչ դատիմ, ոչ փոյթ ինչ
« առնեմ. իսկ եթէ յորոց ունիմ և ասէ
« ոք, ոչ վասն ասելոցն, այլ վասն ունե-
« լոյն վշտանամ » :

« Յոր ինչ ոք համարձակիցի, անզգա-
« մութեամբ ասեմ, համարձակիմ և ես :
« Աբրայեցիք իցեն, և ես . խորայելացիք

« իցեն , և ես . զաւակ Աբրահամն իցեն ,
« և ես . պաշտօնեայք Քրիստոսի իցեն ,
« յանդհնադոյնս ասացից' թէ առաւել
« ևս ես » :

ԴԱՍ ԺԵ

Բացադարձութիւն . — Դիմառնութիւն .
— Նկարագրութիւն :

Հ . Օ՛րինչ է բացադարձութիւն .

Պ . Խօսք առ անձն բացակայ կամ վախճանեալ , և կամ առ անշունչ իսկ և առ անդգայ իրս . զոր օրինակ .

« Դ՛ուր երկին , և սննդն դիր երկիր , զի տէր խօսեցաւ » :

« Օ՛արթիր զարթիր Արեմիաս , զարթիր
« և ողբա հանդերձ մարգարէանալով զոր
« ինչ թշուառացոք և զոր ինչ թշուա
« ռանալոց եմք . դուշակեա զյառնել հո
« վուացն ազիտաց , որպէս երբեմն Օ՛ա
« քարիաս մարգարէն յԱսրայէլին » . Լ^{աճԲ} :

Այսու ձևով Աղիշէ վարդապետ 'ի կարգի պատմութեանն յանկարծ խօսել սկսանի առ թագաւորն Պարսից .

« Օ՛ր կոծիս , զի մրցիս , զի այրիս , զի բորբոքիս , զի շիջանիս , զի կոչես 'ի խոր
« հուրդ զայնոսիկ' որ զողիսն ձեր 'ի

« ձէնջ քաղեալ՝ հանեալ է զանապականդ
« յապականութիւն, և զապականելի մար
« մինդ զիշաքարչ արարեալ՝ իբրև զազիր
« մեռելոտի՝ ՚ի բաց ընկեցեալ : Ապաքէն
« զայդ կամիս, զի ծածկես զխորհուրդ ամ
« պարշտութեան . տեսջիր յորժամ յայտ
« նեսցի, ապա զիտասցես զելս կատարա
« ծի դորա » :

Հ . Օխնչ է դիմառնութիւն .

Պ . Արցնպէս բացակայ կամ վախճա
նեալ անձանց, և կամ անշունչ և անզգայ
իրաց մարդկօրէն խօսք . զոր օրինակ .

« Յորդանան լուեալ փախստական
դառնայր ,

Վ ըտակառվըտակ պատգամաւոր լինէր .

Գետ , մի՛ զարհուրիր , քո արարիչն
եմ ես .

Եկեալ մըկըրտիմ , և լըւանամ ըզ
մեղս » . Տաշ :

Բստ այսմ և Շնորհալի ձեացուցանէ
՚ի դիմաց Եդեսիոյ առ Հոռմ քաղաք ըզ
դիմառնութիւնս .

« Եւ դու Հրոռմ, մայր քաղաքաց

Գերապայծառ և պատուելի ,

Մեծին աթոռըդ Պետրոսի

Առաքելոց գրլխաւորի ,

Եկեղեցիդ անշարժելի

Ի կեփայեան շինեալ վիմի .

Դրանց զրծոխոց անյաղթելի

Եւ կնիք երկնիցըն բացողի .

Եւ հա առ քեզ բանըս խօսիմ

Վ իճակ լաթոորս Թաղէի .

Ի ուր 'ի հեռուսա իմոյս ձայնի ,

Ի էր ողբակից ինձ յայս վայրի » :

Օրինակք գեղեցիկք յԱզեկիէլէ .

« Եւ յսպէս ասէ տէր տէր ցՏիւրոս . . .

« ամենայն իշխանք ազգաց ծովուդ . . .

« յողոց հանցեն 'ի վերայ քո , ողբս առ

« ցեն 'ի վերայ քո և ասասցեն . զիւրդ

« կորեար քակտեցար 'ի մէջ ծովու քաղա

« քրդ հոյակապ , որ եղեր զօրացեալ 'ի

« մէջ ծովու դու և բնակիչք քո , որ զար

« հուրեցուցանէիր զամենայն բնակիչս

« քո : — Ի ձայնէ բարբառոյ քո նաւա

« վարք քո երկիւղիւ զարհուրեսցին . . .

« Կոծ դառնութեան առցեն որդիք նոցա

« 'ի վերայ քո , ողբս առցեն և ողբասցին ,

« Ո՞վ էր իբրև զՏիւրոս՝ որ լռեաց դադա

« րեաց 'ի մէջ ծովու » :

Օգուշութեամբ պարտ է զձեւ զայս

'ի կիր արկանել , և 'ի սաստիութեան և եթ

կրից , և մի՛ յերկարաձգել յոյժ զայն :

Դարձեալ և 'ի մեծամեծ իրս և եթ վա

րել նովաւ և ոչ 'ի ճնչիսն . զոր օրինակ ոչ

է 'ի դէպ խօսել զիմառնաբար առ հան

գերձս ուրուք կամ առ սոսն :

Գիմառնութիւն է և դործս ինչ կամ
կիրս տալ անշունչ և անզգայ իրաց . որ
պէս Մամբրէ տայ մահու .

« Օտեղի կալաւ Յիսուս աւուրս երկուս,
« Թոյլ ետ աւազակին մտանել ՚ի տուն սի-
« բելւոյն . եմուտ ապականագործն, և ա-
« բար խոռովութիւն ըստ կամաց իւրոց .
« գոռողացաւ հպարտացաւ մահ, և կա-
« տարեաց զկամս իւրոյ չարութեանն » :

« Դողալով սարսեցին դժոխք, տեսա-
« նելով զթագաւորն անմահ » . Ըստ :

Հ . Օրնչ է նկարագրութիւն .

Պ . Յայտ յանդիման առաջի աչաց կա-
ցուցանել զիրն ստորագրութեամբ . վասն
որոյ պարտ է առաջի առնել զիւրաքան-
չիւր մասունս իրին, զյարակից հանգա-
մանս, զպատճառս, զգործս՝ այլովքն հան-
գերձ . զոր օրինակ .

« Չտեսանիցես զերեսս պատերազմողացն,
« զիարդ տրտմազին ՚ի խոնարհ կախին .
« յօնքրն ահագինք և դէմք խոժողք . աչք
« արիննախառն և սիրտ ՚ի թնդոջ ՚ի վեր
« վազեն և զկուրծս բաղխեն՝ ժողովեալք
« գումարեալք համօրէն, զահի հարեալք
« ՚ի մի վայր ժողովեալք և ճակատեալք բա-
« զում կարգօք, առաւել յօրինուածովք » .

Ուրեք :

« Բաղցր է ինձ ասել և յաղագս զե-

« զեցիկ դաստակերաին Արուանդակեր
« աի, զոր յօրինեաց նոյն ինքն Արուանդ
« զեղեցիկ և չքնաղ յօրինուածովք: Քան
« զի զմիջոց հովտին մեծի ընու մարդկու
« թեամբ և սլայծառ շինուածովք՝ լուսա
« ւոր որպէս ական բիբ. իսկ շուրջ զմարդ
« կութեամբն ծաղկոցաց և հոտարանաց
« կազմութիւն, որպէս շուրջ զբբովն զայլ
« բոլորակութիւնական: Իսկ զբազմութիւն
« այգեստանոյ իբր զարտեանաց խիտ և
« զեղեցիկ ծիր, որոյ հիւսիսային կողմանն
« դիր կարակնաձև՝ արդարև զեղաւոր
« կուսից յօնից դարեանդաց համեմատ.
« իսկ ՚ի հարաւոյ հարթութիւն դաշտաց՝
« ծնօտից պարզութեան զեղեցկութիւն.
« իսկ զեան բերանացեալ դարաւանդօր
« ափանց՝ զերկթերթիսն նշանակէ շրթու
« նրս: Ալ այսպիսի զեղեցկութեան դիր,
« անբթթելի իմն գոզցես ՚ի բարձրաւան
« դակ թաղաւորանիստն զհայեցուածսն
« ունի » . Խ՞Ր՞Ն :

« Տիկնայք փափկասունք Հայոց աշխար
« հին, որ գրդեալք և գգուեալք էին յիւրա
« քանչիւր բաստեոունս և ՚ի դահաւորա
« կրս, հանապազ բոկ և հետի երթային ՚ի
« տունս աղօթից, անձանձրոյթ խնդրեալ
« ուխտիւք, զի համբերել կարասցեն մեծի
« նեղութեանն . Ար ՚ի մանկութենէ իւ

« րեանց սնեալ էին ուղղովք զուարակաց
« և ամճովք էրէոց, խոտաբուտ կենօք իբ-
« րև զվայրենիս ընդունէին զկերակու-
« րըն մեծաւ խնդութեամբ, և ոչ յիշէին
« ամենեին զսովորական խորտիկան :
« Սեպտեալ ներկան մորթք մարմնոց նո-
« ցա, վասն զի ցերեկ արևակէզք էին, և
« զամենայն գիշերս գետնաբեկք : Սաղ-
« մոսք էին մշտնջենաւոր մրմունջք 'ի
« բերանս նոցա, և մխիթարութիւն կա-
« տարեալ՝ ընթերցուածք մարգարէիցն :
« Միաբանեցին երկու երկու իբրև ամուք
« հաւանք և հաւասարք ուղիղ տանելով
« զակօսն արքայութեան, զի առանց
« վրիպելոյ հասցեն 'ի նաւահանգիստն
« խաղաղութեան » . Եւէէ :

Սովին ձեռովք գեղեցիկ յոյժ նկարագրէ
Ռսկեբերան զընակութիւն սրբոց միայնա-
կեցացն .

« Աթէ դժուարին ինչ թուիցի քեզ այս,
« եկ երթիցուք յայն տաղաւարս, զի ար-
« դեամբք իսկ ուսանիցիս զգիւրութիւնն :
« Խուղս և եթ շինեցին. և եթէ չուել հա-
« սանիցէ, այնպէս թողուն և չուեն, որպէս
« զօրականքն 'ի խաղաղութեան զբանակն
« թողուցուն և գնայցեն, քանզի այնպէս
« բանակեալ են. մանաւանդ թէ ևս աւելի
« ցանկալի տեսիլ տեսանել իցէ : Քանզի

« և ցածնկալի իսկ տեսիլ է տեսանել զանա-
« սրատն լի վանականօք, վարկպարազի խո-
« րանօք խիտ առ խիտ թե՛ ի թե հարեալ
« ճիզն ՚ի ճիզն զապարմանցն թեևակս
« խառնեալ քան զզօրականացն բանակի-
« ուր սրահակք ձգիցին, և զտէզս և
« զգեղարդունս կանգնեսցեն, և զքնիցն
« գեղարդեանցն զաղեղնակասլարձս կա-
« խիցեն, պղնձապատ զգլուխսն առնիցեն,
« և մեծապայծառ իմն կմբեայ վահանացն
« փայլիցեն, և կողինաւորք և զրահա-
« պատք շողայցեն, թաղաւորին սպաս առ-
« նիցեն ՚ի դաշտի ուրեք ՚ի հարթ և յո-
« ղորկ վայրի, և ճաշք զճաշս մղիցեն, և
« ընթրիք զընթրեօք անցանիցեն, դուսանք
« երդիցեն, փողարք զձայն փողոցն նուա-
« դիցեն. սակայն և այնպէս չիցէ գեղե-
« ցիկ տեսիլն քան զայն, զորմէ այժմ՝ ես
« սրատմեմ: Աթէ երթիցուք յանապատն,
« և տեսանեմք զՔրիստոսի զօրականացն
« զխորանան, ոչ սրահակս ձգեալս տեսա-
« նեմք անդ, և ոչ շողունս գեղարդանց,
« և ոչ խորանս ոսկեզօծս արքունիս, այլ
« այնպիսի ինչ՝ եթէ որ յերկրի, և առա-
« լել և այնչափ երկայնագոյն այլ երկիր
« գործէր, և ՚ի վերայ բազում երկինս
« ձգէր, ոչ ասլաքէն նոր իմն և չքնաղ
« տեսիլ ցուցանէր. նոյնպէս և անդ է տե-

« սանել : Չէ ինչ ընդհատ յերկնից բը-
« նակուծիւնն նոցա , քանզի և առ նոսա
« հրեշտակք իջանեն և հրեշտակապետա-
« ցըն տէրն : Օ՛ի թէ առ Աբրահամ եկն,
« որ կին ունէր և որդիս սնուցանէր, քանզի
« ետես եթէ հիւրասէր է յորժամ ևս ա-
« ռաւել առաքինուծիւն ուրեք գտանիցէ,
« զմարդն ազատեալ յերկրէ , և 'ի մարմնի
« զմարմինն արհամարհեալ, սրչափ ևս ա-
« ռաւել և անդ բնակեսցէ , և պար ա-
« ռեալ շրջիցին 'ի միջի նոցա գունդք հը-
« բեշտակաց . քանզի և նորա այնպէս կազ-
« մեցին զանձինս, որպէս և նմա հաճոյ է » :

Բնդ սովին ձևով բովանդակին և նը-
կարագրուծիւն բարուց կամ դիմաց , և
կամ խառն երկոցունցն նկարագիր . զոր օ-
րինակ նկարագրէ Յովհաննէս կաթողի-
կոս զմեծն Աշոտ .

« Քաջահասակ էր նա և անձնեայ և թիկ-
« նաւէտ և զուարթերես և մրայօն , նը-
« կարէն իմն և նիշ արեան յաչս ունելով
« որպէս զյակինտ կարմիր 'ի մէջ մարգարտի
« ծագեալ, և վայելչացեալ գեղեցկուծեանն
« ալեօք , մեծիմաստ և քաղցրաբան , և առ
« կերակուրս խրախճանաց ոչ խնդացեալ
« նորա ընդ լաւագոյնսն , և ոչ արհամար-
« հեալ զնուաստագոյնսն : . . Միանգա-
« մայն իսկ ասել , եթէ որ ինչ մարդկու-

« Թեանս է պիտանի՝ ոչ ինչ կասեցու,
« ցանէր » :

Նոյնպէս և Սարգիս վարդապետ ըզ-
բարկացողն նկարագրէ .

« Յօնքն անկեալք և խոնարհեալք, երես,
« քրն գեղինք և ապականեալք, շրթուն,
« քրն սեաւք և երիթացեալք, ունչք եր,
« կայն և սուր, ձայն խոշոր և թիւր, աչք
« հրատեսակք, բանք ընդդիմադրեալք և
« անախորժելիք, և բոլորովին գծնեայ և
« ահարկու տեսողաց » :

ԴԱՍ ԺԶ

Հակադրութիւն . — Վախումն :

Հ . Օ՛րինչ է Հակադրութիւն .

Պ . Չե բանի , յորում բառք բառից
կամ իմաստք իմաստից ներհականք յօրի-
նին . զոր օրինակ .

« Վասն առողջութեան զապիկարն կար,
« դայ , և վասն կենաց զմեռեալն աղա,
« չէ , և վասն ՚ի թիկունս հասանելոյ տա,
« բակուսելոյն մաղթէ , և վասն ճանապար,
« հորդութեան զայն՝ որ և զոտն յոտա,
« նէ չկարէ փոխել , և վասն ընչաւետու,
« թեան և դործոց ձեռաց կորովութեան
« յանարգասաւորէն ձեռօք զարգասաւո,
« րութիւն խնդրէ » . Իմաստ :

« Արդ կրիցն լիցուք մի աղճատիչք, այլ
« ցաւակիցք . մի եպերիչք, այլ առողջացու
« ցիչք . մի կսկծեցուցիչք, այլ դարմանիչք .
« մի երգիծանիչք, այլ մխիթարիչք » . Լ. Կ. Բ. :

Վայելուչ է ձևս այս մահաւանդ 'ի կըշ
տամբութեան . այսպէս հաւատացեալք
զնախարարս հայոց տկարացեալս 'ի հա
ւատոց կշտամբէին .

« Պետք էիք առաքելական քարոզութեան
« ցրն , արդ աշակերտ լինիցիք մոլար խա
« բէութեանն . ուսուցիչք էիք ճշմարտու
« թեանն , արդ ուսուցանէք զպատիր խա
« բէութիւն մոզաց . քարոզք էիք արարչա
« կան զօրութեանցն , արդ զտարերս աս
« տուածս խոստովանիք . յանդիմանիչք էիք
« ստութեան , արդ և քան զսուսն ստա
« զոյնք լինիցիք . 'ի հուր և 'ի հողի մկրտեալք,
« արդ 'ի մոխիր և յաճիւն թաթաւիցիք .
« կենդանի մարմնով և անմահ արեամբ
« էիք սնեալ , արդ 'ի ճենճեր զոհից և 'ի
« շարաւս աղտեղիս մըճոտիցիք . տաճար
« էիք հողւոյն սրբոյ , արդ զոհարան դի
« ւաց լինիցիք . քրիստոսազգեացք էիք 'ի
« մանկութենէ , արդ մերկացեալք 'ի փա
« ռացն՝ դիւաբար արեգական կաքաւիցէք .
« ժառանգ էիք արքայութեան , արդ ան
« ձամբ զանձինս արկէք 'ի ժառանգ գե
« հենին » . Եւեւէ :

Սովին հակադրութեան ձևով բաղդա

տէ Ասկերերան զվարս այնր ժամանակի
որերոյն ընդ սրբոց միայնակեցացն .

« Մեք յօրանչիցեմք, խորդայցեմք, այսրան,
« դրր յեղեղիցիմք, մինչ նոքա զգիշերն
« ամենայն ընդ օրհնութիւնսն հանիցեն :
« Աւ յորժամ այդ լինիցի, հանգչին փոքր
« մի . և յորժամ ընդ գործ խառնիցեմք,
« նոքա խուն քնովն յազեցեալք և հան
« գուցեալք, դարձեալ միւսանդամ յօրհ
« նութիւնսն կազմիցին : Իսկ մեք չև այդ
« եղեալ՝ իւրաքանչիւր զընկեր կոչեմք հա
« մարս պահանջել, և կէսք ընդ հրապա
« րակս ճեմ առեալ շողայցեմք : . . Իսկ նոքա
« դարձեալ իբրև զառաւօտին զաղօթսն և
« զօրհնութիւնս կատարեն, ապա յընթեր
« ցուածս գրոց շրջիցին : . . Մինչ մեք ամե
« նեքին ճաշիցեմք, խաղայցեմք ծիծաղի
« ցեմք, ուռուցանիցեմք զորովայնս, որ
« կորստութեամբ շուայտիցեմք, մցրի
« ցեմք, նոքա օրհնութեամբքն զմայլիցին :
« Չիք ժամ սեղանոց և ոչ խորակաց յա
« ռաջ բերելոց, և դարձեալ յետ ճաշոյ՝ ի
« նոյն ոճ մտանիցեն, կան պատկառ օրհ
« նութեանցն : Աշխարհականք և ցերեկն
« ննջեն . նոքա ցանկ արթունք և պատ
« րաստք ՚ի պաշտամանն . արդարև որդիք
« լուսոյ են և որդիք տունջեան » :

Հ . Օրինչ է ձև կախման .

Պ. Տարտամեալ ունել զողիս ունկըն՝
զրաց՝ ակնկալեալ ՚ի լուր կարևոր ինչ
իրաց :

Սովին ձևով յօժարամիտս առնէ ճարտասանն զուսկնդիրս, որով ազգողազոյն մտանեն բանք ՚ի լսելիս նոցա, զոր օրինակ.
« Աամիմ և նոր ինչ ասել, այլ մի ինչ
« կարի զարմանայցէք կամ խոսովիցիք : Այ
« զինչ իցէ : Պատարագն նոյն է, եթէ
« չափ և զոյզն ոք մատուցանիցէ, և եթէ
« Պօղոս և Պետրոս զլխովին, սակայն
« նոյն է, զորև Քրիստոս ետ աշակերտացն,
« զնոյն այժմ քահանայքս կատարեն, և
« չէ ինչ ընդհատ յայնմանէ » . Ո՞ւնէք :

Ճարտար ՚ի կիր արկանէ զձևս զայս
Յովսեպոս ՚ի պատմել զիրս կնոջն, որ
վասն սովոյն զորդին իւր խորովեաց և եկեր,
զի յետ պատմելոյ թէ ո՞րպէս յանհնարին
սովուն զկաշիս վահանացն և զխոտ
ցամաք ճարակէին Հրեայք, յաւելու
ապա .

« Բայց զինչ պիտոյ է մեզ զչարութիւն
« սովոյն յանշունչ կերակրոցն ցուցանել .
« զի ունիմ ես ցուցանել զործ մի, որ նըման
« ման նմա ոչ ՚ի մէջ Յունաց և ոչ բարբարոսաց
« պատմի եթէ զործեցաւ, զի զողումն և սոսկումն է
« պատմել, և լսելեաց զժուարին է հաւատալ : Արդ կա

« մակար անփոյթ առնէի ես անցանել
« զայսու թշուառութեամբ, զի մի ստել
« երևեցայց յետամնացացն, եթէ ոչ բա-
« զում վկայս ունէի. և թերևս շնորհս
« ինչ դուզնաքեայ ընդ որդիս ժողովրդեան
« իմոյ առնէի ես, խնայելով ճառել զայն
« ինչ՝ զոր արգեամբքն պաշտեցաւ » : Աւ-
« ապա յարէ զպատմութիւն :

Արկին օրինակք գեղեցիկք դարձեալ
յԱսկերերանէ.

« Աւ ուրէ՛ զի չէ ախտն այն (խեղկատակու-
« թեան.) արդ և յեկեղեցիւս եմուտ, և ՚ի
« զիրս ևս մեսեցաւ : Ասացից ինչ, զի ցու-
« ցից զչարեացն առաւելութիւն. ամաչեմ,
« բայց սակայն ասացից. քանզի կամիմ
« ցուցանել՝ թէ սրչափ տարածեցան չա-
« ըիքն, զի մի կարծիցիմ եթէ վասն շնչին
« իրաց սուտ խօսիցիմ, այլ զի զոնեա-
« այնպէս կարացից մերթել զձեզ ՚ի պատ-
« բանացն : Աւ մի ոք համարիցի եթէ ՚ի
« մտաց ինչ կարկառեմ, այլ զոր ինչ լը-
« լայն՝ զայն ասեմ : Ամուտ ոմն ՚ի տուն
« աւաղաց, թէսկէտ և ծաղուբանք են,
« սակայն ասացից : Աբրև սկուտեղ խորտ-
« կօք առաջի եդին, ասէ, ընկալարուք
« զխրատ, զի մի բարկասցի որովայն » :

« Հաւատայցէք արդեօք եթէ եղև
« ջրհեղեղ, եթէ առանցելոյ ինչ բանք

« թուիցին՝ ձեզ, ուր և լերինքն յորս տա-
« պանն դադարեաց՝ վկայեն. զՀայոց լե-
« րանցն ասեմ: Այլ ևս յաճախութեամբ,
« և յայլ ևս քան ՚ի նոյն յայտնագոյն ա-
« ծիցէ բանս. երթեալ ուրուք իցէ ձեր ՚ի
« պաղեստինացւոց աշխարհն: Այսու-
« հետև ոչ ևս բանս, այլ արդիւնս իսկ
« ասեմ. թէպէտ առաջինքն քան զարդիւնքն
« յայտնագոյնք են, զի զոր զիրք ասեն, և
« քան զաչաց տեսիլ հաւատարմագոյնք
« են: Արթեալ ուրուք իցէ ձեր ՚ի պա-
« ղեստինացւոց աշխարհն. զինչ ոք ՚ի
« ձէնջ վկայեսցէ ինձ, որոց զտեղիսն իսկ
« տեսեալ իցէ. քան զԱսկաղոն և քան
« զԳազա ՚ի վերոյ, անդ իսկ ՚ի սպառուա-
« ծի Յորդանան գետոյ վայրքն ինչ
« բազում են և ամենալիցք. մանաւանդ
« թէ էին, քանզի այժմ ոչ է նոյնպէս, որ
« երբեմն իբրև զգրախա Աստուծոյ էին »:
Աւ ապա նկարագրէ զՍողոմայ հրոյն
արգասիս.

ԴԱՍ ԺԷ

Նախապաշարուն . — Ձև Բաղմայեղանակ .
— Բաժանորդութիւն :

Տ. Օյնչ է նախապաշարուն .

Պ. Յառաջ բերել զառարկութիւն այլ
լոյց, և լուծանել զայնս . որպէս առնէ
առաքեալն .

« Իսկ արդ ասիցես . ոստքն փշրեցան ,
« զի ես պատուաստեցայց : Բարևոք է ,
« անհաւատութեամբն փշրեցան , և դու
« հաւատովք հաստատեցար . մի հսար
« տանար , այլ երկիր . զի եթէ Աստուած
« ՚ի բուն ոստան ոչ խնայեաց , դուցէ եր
« բէք և ՚ի քեզ ոչ խնայեսցէ » :

Աոյնպէս և Ոսկեբերան յառաջ բերէ
զանողորմածացն առարկութիւնս և հեր
քէ . « Այլ բազում անգամ , ասէ , ետու :
« Աւնա չուտիցէ՞ հանապազ . և զորդիսն
« քո , յորժամ յաճախ խնդրիցեն , միթէ ՚ի
« բայ մերժեսցես . ո՞ անհնարին անամօ
« թութիւն : . . Չգիտիցես սր հարկք
« որովայնին են , որ զամենայն ինչ վասն
« նորին հնարիցիս : . . . Այլ ՚ի շատսօ
« սութիւնս հատանիս . այսր անուան
« այսչափ դահեկանք ՚ի վարձու կան , և

« այսր անուանն ևս աւելի , և նա մուրա
« նայ : Օ մանկաւոյ զրոյց խօսիք և զշաղ
« փաղփութիւնս . քանզի և նոքա միշտ
« առասպելաց դայեկացն անսան : Չառ
« նում յանձն , չհաւատամ , քաւ լիցի ,
« փոխ ոք տայցէ և 'ի բարութեան իցէ'
« և մուրանայցէ : Ա՛ր վասն , աղէ ասա .
« զինչ ինչ քան զմուրանալ գործ ծանա
« կաց կայցէ . լաւ է մեռանել քան զմու
« րանալ » :

Հ . Օ ինչ է բազմայեղանակն ձե .

Պ . Բազմօրինակաբար զնոյն և զմի
բան յեղյեղել , զանազան եղանակօքն ազ
դողազոյն զբանն առնելով :

Ի յօրինուած այսր ձեոյ խառնին բա
զում և այլ ձեք :

Աքանչելի յօրինէ Սարգիս վարդապետ
զայս ձե 'ի կոչելն Աստուծոյ զԱզամյա
պաշխարութիւն :

« Ա՛նր նմին Աստուծոյ , զինչ ասէր առ
« մեղուցեալ և թագուցեալ մարդն . Ա
« դամ ո՛ւր ես : Մի՛թէ ո՛չ գիտէր թէ
« ո՛ւր էր . մի՛թէ ո՛չ տեսանէր ամենատես
« ակնն , մի՛թէ տգիտանայր արարիչն .
« քաւ լիցի : Ազամ ո՛ւր ես . տրտմու
« թեան էր ձայնն , տարակուսանաց բար
« բառն : Արպէս հովիւ զի կորուսանիցէ
« ոչխար 'ի հօտէն , և տրտմութեանն

« ձայնիւ ըսուցու զանտառն , նոյնգու
« նակ և արարիչն զգրախտն : Ազամ
« ուր ես . ընդէր թաքչիս յերեսաց արար
« չիս , հիմ ամօթով լցեալ ես և երկիւ
« ղիւ : Աչ վասն այդորիկ ստեղծի գքեզ ,
« ղի փախստական լինիցիս յինէն , ոչ
« վասն այդորիկ փառօք զարդարեցի գքեզ ,
« ղի ամաչէիր յինէն , այլ զի 'ի զիրկս
« քո և 'ի հոգի ընդունէիր զիս : Ազամ
« ուր ես . յորպիսի անարզանս , յորպի
« սի զաղբալի տեսակս , յորպիսի ամօթ
« երեսաց , յորպիսի խեղճ մտաց , յորպի
« սի ալիս տարակուսանաց : Առայ , ասէ ,
« զձայն գնալոյ քո 'ի գրախտի ասա , և
« երկեայ . քանզի մերկ էի , և թա
« գեայ : . . Արդարև ստուգապէս մերկ ,
« ոչ 'ի հանգերձից միայն՝ այլ և յարդա
« րուլթենէ » :

Հ . Օրինչ է բաժանորդութիւն .

Պ . Յիշատակել առ հասարակ զկա
րևոր մասունս բանին , և ապա մի ըստ
միօջէ բացատրել զայնս . զոր օրինակ .
« Արդ տես գրաղցրութիւն և զսաստիու
« թիւնն Աստուծոյ . 'ի վերայ կործանե
« լոցն սաստիութիւն , և 'ի վերայ քո
« քաղցրութիւն Աստուծոյ » . Հո՞ւմ :

« Հողիք սրբոց հեռի են յայսպիսի ախ
« տակրութեանց (այսինքն 'ի մարգահա

« Ճուլթենէ ,) այլ մանաւանդ ընդդիմա ,
« կացք այսպիսի ախտիցս են բանիւք և
« արդեամբք : Բանիւք , յորժամ ասէն
« Գաւիթ . Աստուած ցրուեսցէ զոսկերս
« մարդահաճոյից : . . Ի վերայ այսորիկ
« կնքէ առաքեալ բանիւք իւրովք , եթէ
« տակաւին մարդկան հաճոյ լինէի , ապա
« Քրիստոսի ծառայ ոչ էի : Իսկ արդեա
« մբք , յորժամ թշնամանէին և բամբա
« սէին և նախատէին , և զփառաց ինչ ոչ
« հոգային , և փոխարէն զնախաատիչսն ոչ
« նախատէին , այլ և երախտիս հատու
« ցանէին » . Մարտ :

« Քանզի որ մարք են առաքինութեանց
« սկզբունք՝ իմաստութիւն , արութիւն ,
« ողջախոհութիւն և արդարութիւն , վրի
« պեալ գտանին յիմումս իշխանականի
« մասին : Օ՛ր ոչ խրատեցի զբանն որ
« յիս՝ իմաստութեամբ , և ոչ զցանկու
« թիւնն՝ ողջախոհութեամբ , և ոչ դար
« ձեալ զայսոսիկ խրատեցի արդարու
« թեամբ » . Շնորհ :

ԴԱՍ ԺԸ

Ուղղութիւն . — Անցումն .

— Արտուղութիւն :

Հ. Օ՛րինչ է ուղղութիւն .

Պ. Ուղղել զասացեալն սրատշաճազոյն
ասացուածով . զոր օրինակ .

« Այս է քո սանձալի աստուածաբա-
« նութիւնդ , մանաւանդ թէ յիմարու-
« թեանդ ցոյցք , զնիւթս զայս յաւէժակից
« ասել արարչական զօրութեանն » . Լ^{աճ} :

« Աստանօր ամաչեմ ասել զճշմարտու-
« թիւն , մանաւանդ թէ զանօրէնութիւն
« և զամպարշտութիւն ազգիս մերոյ ,
« զմեծի ողբոց և արտասուաց արժանի
« սոցա զգործս » . Խ^{աճ} :

« Օյստոսիկ լսելով , եղբարք , հայեսցուք
« ՚ի մեզ և սթափեսցուք յահագին ար-
« բեցութենէս , եթէ արբեցութիւն պարտ
« է անուանել զմերս , և ոչ խելազա-
« րութիւն և կամ դիւաբազխութիւն » .

Ս^{աճ} :

« Աստ աղբիւր հրեղէն հոգևոր բղխէ
« ՚ի սեղանոյս , և քո զայս թողեալ ՚ի
« թասարն ճեպիս . . . թողեալ զՔրիս-
« տոս՝ որ նստի առ աղբիւրս . քանզի և

« այժմ առ աղբիւրն նստի , ոչ ընդ շա-
« մրրտացւոյն միայն խօսի՝ այլ ընդ հա-
« մօրէն քաղաքիս : Բայց թերևս և այժմ
« ընդ շամրտացւոյն , քանզի չիք որ և
« այժմ առ նմա մօտ . այլ ոմանք մար-
« մնով միայն , և այլք և անձամբ իսկ
« մեկուսի » . Ուկէք :

« Ընդ իսկ ՚ի սպառուածի Յորդանան
« գետոյ վայրքն ինչբազում են և ամենա-
« լիցք , մանաւանդ թէ էին , քանզի այժմ ոչ
« է նոյնպէս , որ երբեմն իբրև զգրախան
« Ըստուծոյ էին » . Ուկէք :

Հ. Օ ինչ է անցումն .

Պ. Օգտ կցորդութեան մասանց ճա-
ռին . զոր օրինակ .

« Եւարդ վասն զի ծանուցաւ փոքր ՚ի շատէ
« որքան միանդամ յաստուածազգեստիցն
« տուաւ յաղագս երկնայնոցն կարգաւո-
« բութեան , բեր այսուհետև զընտա-
« նեգոյնն մեր դիցուք առաջի առ ՚ի
« քննութիւն » . Շնորհ :

« Եւ այսոքիկ քեզ բաւականացեալ , ես
« ՚ի կարգ սլատմութեանն դարձայ » .
Յն . Իսկ :

« Բայց մեք զայսոսիկ ՚ի տեսողս անդր
« թողացուցեալ , և զորս աչօք իսկ տե-
« սեալ է մեր՝ ոչ դանդաղեսցուք սլատ-
« մել » . Նոյն :

« Այլ չգիտեմ զի՛արդ վայրապար ընդ
« խարս եկի յայսպիսի բանքս . զայլս
« խրատէի հեղութեամբ ուսուցանել, և
« ես ինձէն 'ի ցասումն զառածայ : (Թէ
« այնպէս իցէ, դարձցուք անդրէն 'ի մեր
« խրատն, և հոգ տարցուք ամենայն
« թերութեան կենաց մերոց, զի ուղղես
« ցուք զոր կամիցիմք » . Ո՛հէք :

« Ահաւասիկ երեք ճառք, և զսկզբանս
« բան ոչ ևս կարացաք լուծանել . մի թէ
« վայրապար ինչ ասէի՝ եթէ խորքանդնդոց
« են միտք ճառիցս : ()՛ն առեալ այսօր
« զմնացեալսն արկանիցեմք 'ի հարց և 'ի
« փորձ » . Ո՛հէք :

Հ. Օ՛ինչ է արտուղութիւն .

Պ. Սուղ ինչ հեռացումն 'ի կարգէ
բանին, առ 'ի հանգիստ ունկնդրաց կամ
յառաւել ազդուութիւն բանին :

Բայց ամենեին զգուշալի է զի մի ինչ
բռնի և անյարմար մուծցի 'ի ներքս, և
զի 'ի կատարածին վայելչաբար դարձցի
յառաջագիր բանն :

Այսպէս Յովսեպոս 'ի սլատմել զսլա
տերազմն Հրէից ընդ հռոմայեցիս՝ առնէ
արտուղութիւն, ստորագրելով զհրահանգս
հռոմայեցի զօրականին .

« Աստանօր յոյժ զարմանալոյ արժանի
« համարիցի ոք զնախագահութիւն հռո

« մայեցւոյ , որք այնպէս վարժեն զձա-
« ալս , մինչ զի ոչ միայն 'ի սաշտօն
« կենաց՝ այլ և 'ի գործ պատերազմի
« օգտակարք իցեն : Իսկ եթէ որ նայիցի
« 'ի նոցա կրթութիւն զինուորութեան ,
« արդարև իսկ ծանիցէ զի զայսքան թա-
« գաւորութիւն ոչ շնորհիւ բարեբախ-
« տութեան՝ այլ իւրեանց քաջութեամբ
« ստացան : Բանզի զինու վարել ոչ եթէ
« 'ի պատերազմի սկսանին , և ոչ միայն
« յորժամ պիտոյ է՝ զձեռս շարժեն մինչ
« 'ի խաղաղութեան պարապիցեն , այլ
« ընդ զինու որպէս թէ բնութեամբ
« միացեալք . . . ոչ երբէք ժամանակի սպա-
« սեն » : Աւ յետ նկարագրելոյ զկրթու-
« թիւն նոցա և զհշուժիւն և զարիութիւն
« և զամենայն ինչ խորհրդով գործել ,
« յաւելու ապա . « Արդ որոց գործք
« սկսանին 'ի խորհրդոց , և զխորհե-
« ցեալն այնչափ յօժարութեամբ կա-
« տարեն զօրք , զինչ զարմանք՝ եթէ
« Ափրատ յարևելից , և Ալկիանոս յարև-
« մուից , և 'ի հարաւոյ Ափրիկեայ քա-
« ջաբեր երկիր , և 'ի հիւսիսոյ Հռենոս
« և Դանուբ են սահմանք թագաւո-
« րութեանն հռոմայեցւոյ՝ զոր բարւոք
« կարիցէ որ ասել զեռ փոքր գոլ զըս-
« տացուածն ստացողացս : Արդ զայս

« յիշեցի, ոչ զի սփոփիցեմ զպարտեալսն՝
« և զխոսվասէրսն երկեցուցանեմ, [Թե-
« րևս և առ հմտութիւն քաջութեան հե-
« տևողացն ասացեալքս օգտակարք եղի-
« ցին, որք ոչ զիտեն զսահմանադրու-
« թիւն զինուորութեան հոռմայեցւոց :
« Բայց դարձայց անդրէն ուստի ելի » :

Օկերպարանս այսր ձևոյ բերեն 'ի
համառօտութեան և միջանկեալ պարբե-
րութիւնք, զորս փակադժիւ սովորութիւն
է ոմանց տրոհել, զոր օրինակ .

« Աթէ ոչ զիտէք, եղբարք, զի ընդ զի-
« տունս օրինաց խօսիմ, զի օրէնք տի-
« րեն մարդոյ որչափ ժամանակս կենդա-
« նի է » : Եբր ասել, պարտիք զիտել զայս,
զի օրէնսդէտք էք . հո՛ւմ :

« Աւարդ միտ գիր և հաւատոցն և հնա-
« զանդութեան առաքելոցն : Թէպէտ և
« 'ի դործ արուեստին զաղեալ էին, (և
« զիտէք իսկ թէ զիւրդ քաղցր և պատիր
« ձկնորսութիւն էր,) սակայն ոչ ինչ դան-
« դաղեցան լսել այնմ որ կոչեացն զնո-
« սա » . Ու՛նէք :

« Արթեալ ուրուք իցէ ձեր 'ի պաղես-
« տինացւոց աշխարհն, (այսուհետև ոչ
« ևս բանս, այլ արդիւնս իսկ ասեմ, թէ-
« պէտ առաջինքն քան զարդիւնսն յայտ-
« նագոյնք են, զի զոր զիրք ասեն, և

« քան զաչաց տեսիլ հաւատարմագոյնք
« են) . երթեալ ուրուք իցէ ձեր 'ի պա-
« ղեստինացւոց աշխարհն » . Ո՞՞՞՞ :

ԳԱՍ ԺԹ

Ընդլայնումն :

Հ. Օ՞րինչ է ընդլայնումն .

Պ. Օ՞տուղ ինչ իմաստ ընդարձակել առ
'ի բացայայտագոյն իմացուած և առ 'ի
սաստկագոյն ազգուութիւն բանին :

Եւ զոր օրինակ կրկին ազգ են ձեոց,
ըստ բառից և ըստ իմաստից , նոյնպէս
և ընդլայնումն կրկնակի յօրինի , բառիք
և իմաստիք :

Հ. Ո՞րպէս յօրինի ընդլայնումն բառիք .

Պ. Յօրինի , որպէս 'ի կարգս ձեոց
ասացաք , յաճախութեամբ նոյն կամ հա-
մանշանակ բառից . զոր օրինակ Գաւիթ
յողբայն զԱբխողոմ , ազգեալ 'ի բնու-
թենէ զձեւ զայս յօրէնէր .

« Որդեակ իմ Աբխողոմ , Աբխողոմ որ
« դեակ իմ . ո՞ տայր զմահ իմ փոխանակ
« քո . ես փոխանակ քո Աբխողոմ որդեակ
« իմ , որդեակ իմ Աբխողոմ » :

« Եւ մեք յորանչիցեմք , ձգտիցիմք , քոչ-
« քիցեմք , քոչքոտիցեմք , շնչիցեմք , խոր-

« դայցեմք , այսր անդր յեղևեղիցիմք , և
« յորսայս խաղայցեմք , և ազդի ազդի
« խտպտանս զմտաւ ամիցեմք , մինչ նոքա
« զգիշերն ամենայն ընդ օրհնութիւնսն
« հանիցեն » . Ո՞՛կէք :

« Այլ արդ վասն այնր չէ՞ր պարտ բիւրա
« պատիկ պատառ պատառ կոտորել , ցանկ
« սպանանել , բազում մահուց համբերել ,
« և զամենայն զինչ և ինչ իցեն չարչա
« րանք կրել և բանիւք և արդեամբք . և
« եթէ կենդանւոյն հրով այրել իսկ հա
« սանէր , չէ՞ր պարտ այրել վասն հասա
« նելոյ խոստացելոյ բարութեանցն » .
Ո՞՛կէք :

Ընդ սովին ձեով բովանդակի և ընդ
լայնումն 'ի ձեռն փոխաբերական բառից .
որպէս Մարդիս վարդապետ առնէ 'ի գո
վել զնախնի սուրբ միանձունս :

« Որք իմաստուն վաճառականքն էին ,
« անցաւորօքս զյաւիտենականն գնելով
« զկեանս . ճարտար ղեկավարք , որք ա
« ռանց նաւակոծութե անցին ընդ ահա
« դին ծովս կենցաղոյս . արիագոյն զօրա
« կանքն Քրիստոսի , որք ոչ լբան 'ի հոգևոր
« պատերազմին . միամիտ աղաւնիքն , որ
« 'ի խուճապելոյ բազէին 'ի սիրոյն Աս
« տուծոյ ոչ խուճապեցան . ողջախոհ
« տատրակքն , որ 'ի վարչ ցանկութեանց

« տութանացն ոչ աղտեղացան . բանաւոր
« ծիծռունք , որ 'ի յօձիցն խարամանեաց
« ոչ վնասեցան . անմեղ դառինքն , որ 'ի
« դայլոցն պատառողաց ոչ կեղեքեցան» :

Ըստ ամին օրինակի և շրջաբանու-
թեամբ յօրինի ընդլայնումն . որպէս Ա-
դիշէ վարդապետ փոխանակ տսելոյ զուխ-
տագրութն Ասասկայ՝ թէ ուրացաւ զհա-
ւատս Քրիստոսի , սսէ .

« Քանզի մոռացօնք եղեն նմա զալուստ
« Արդւոյն Ըստուծոյ , և ոչ յիշեաց զքա-
« ըղուծիւն սուրբ աւետարանին . և ոչ 'ի
« սպառնալեացն զանգիտեաց , և ոչ յաւե-
« տիննմխիթարեցաւ . ուրացաւ զաւազանն ,
« որ յղացաւն զնա , և ոչ յիշեաց զընկա-
« լուչ սուրբ Հոգին , որ ծնաւն զնա :
« Ընարդեաց զմարմինն սրատուական՝ ո-
« թով սրբեցաւն . և առ ոտն եհար զա-
« ըիւնն կենդանի՝ որով և քաւեցաւն 'ի մե-
« ղաց . ջնջեաց զգիր որդեգրութեանն , և
« իւրովք ձեռովք խորասակեաց զհաստա-
« տուն կնիք մատանւոյն . ել 'ի թուոյերանե-
« լեացն , և ապստամբեցոյց ընդ իւր զքա-
« զումս . ձեռն արկ կամակարութեամբ և
« եմուտ յորդեգրութիւն դիւապաշտու-
« թեանն , և եղև աման չարին , և ելից
« զնա սատանայ ամենայն խորամանկու-
« թեամբ . 'ի ձեռն էառ իբրև զվահան ,

« և ազաւ զնա իբրև զրահս, և եղև իբրև
« զինուոր կատարեալ կամաց նորա »:

Յօրինի դարձեալ և 'ի ձեռն աստի-
ճանաց, զոր օրինակ.

« Չկարիցես թափուր յընչից լինել, գէթ
« զայլոյ մի յափշտակիցես, չկարիցես պա-
« ճել, գոնեա 'ի փափկութիւնս մի հատա-
« նիցես զանձն, չկարիցես 'ի գետնի ննջել,
« զահոյս արծաթապատս մի առնիցես ».
Ո՞՛կէք :

« Թեւադիր լեր, աղաչեա, զամենայն հնա-
« ըրս հնարեցիր, թերևս կարասցես զոմա-
« նրս ապրեցուցանել, և եթէ զոմանս ոչ,
« սակայն կէս մի, և եթէ կէս մի ոչ, սակայն
« զերիր մասն մի, սակայն տասներորդ մի:
« Աւ եթէ ոչ այսպէս, գոնեա զմի ոք 'ի
« բազմաց: Աւ եթէ ոչ զմի ոք, սակայն
« զքո անձնդ ապրեցուցես 'ի տանջանաց ».
Ս՞րք :

« Աչ միայն առաքեալք, այլ և ստասա-
« ւորք, այլ և ականատեսք Քանին, և ոչ
« միայն ականատեսք, այլ և սիրելիք, և
« բարեկամք, և որդիք, և ժառանգք, և
« ժառանգակիցք » . Ն՞յն :

Հ . Ա՛րպէս յօրինի ընդ լայնումն իմաս-
տիւք.

Պ . Շ՞արտարութիւն մեծ ճարտասա-
նին յայսմ իսկ է, ճոխարանել առանց շատ

խօսութեան և ճամարտակութեան, և այս իսկ է տիրապէս ընդ լայնումն. և առ այս չիք վարժապետ վեհագոյն՝ քան զՍտեփաննին ճառից յաճախ ընթերցուած:

(Օրինակք ինչ 'ի ճառից անտի պարզաբանեսցեն զպատասխանիս քան զամենայն բացատրութիւնս բանից: Քանզի զսուղ իմաստս զայս, զի ոչ ինչ իւրք օրէն է մարդոյ մեծամտել, այսպէս ընդարձակէ.

« Արչափ ինչ բարութիւնս ծնանիցի մեզ
« խոնարհութիւն. զինչ կամիցիս, ո՞րս
« չունել, անցասումն լինել, մարդասիրու
« թիւն, մտադիւրութիւն. այս ամենայն
« բարիք 'ի խոնարհութենէն են, և սոցին
« հակառակք 'ի հպարտութենէ: Հարկ է
« այնպիսւոյն թշնամանիչ լինել, հարկա
« նող և բարկացող և դառն և անհամբոյր,
« դազան մանաւանդ և ոչ մարդ: Աւժ
« զին իցես, և յայն սակս մեծամտիցես.
« թէ այսպէս իցէ, և վասն այնորիկ ա
« ռաւել պարտիս խոնարհել: Օ՞ր չնչին
« իրօք մեծամտիցես. քանզի և առիւծ
« դազանագոյն քան զքեզ է, և վարազ
« ուժգնագոյն, և դու իբրև զմթիս մի ես
« առ նորօք. և աւազակք և գերեզմա
« նակրկիտք, և 'ի վսեր եկեալքն, և ծա
« ռայքն իսկ քո, և թերևս որ կարին
« իսկ անազատք և չարաբարոյք իցեն, զօ

« րադոյն քան զքեզ իցեն : Ալ այն զո-
« վութեանն ինչ արժանի իցեն . և չկայ-
« ցես ինչ ծանակ այնպիսի ինչ իրօք մե-
« ծամտել » :

« Այլ թերևս գեղեցիկ և բարենշան որ
« իցես . և այն աղջկանց նշանք են . բայց
« սակայն քան զսիրամարդ գեղեցիկ չիցես ,
« և ոչ այնպէս ծաղկալից համապայծառ
« թևս ունիցիս իբրև զայն թռչուն՝ որ
« վարսիւքն և գիսակօքն , որ խրճացեալ
« կարակնեալ բազմաճեմուկ ասնոյն յաղ-
« թէ քեզ գեղեցկութեամբ : Աս և փորն
« կարի իսկ գեղեցիկ է , և այլք ևս բա-
« զումք 'ի թռչնոց , ընդ որս թէ կամիցիս
« անցանել 'ի հանդիսի՝ ոչինչ ամենևին
« տեսանիցես զանձն : Բազում անգամ և
« մատաղ մանկոտի , և աղջկունք անփորձք
« յամուսնութենէ , և պոռնիկ կանայք , և
« արք կանայք իդացեալք նազեցան այն-
« պիսի պարծանօք : Ալ արդ այն պար-
« ծանայ ինչ արժանի իցէ կամ մեծամտու-
« թեան :

« Ալ թերևս զի մեծատուն իցես , հար-
« տանայցես : Աւստի իցէ զոր ունիցիսն ,
« և կամ զինչ ունիցիս . ոսկի , արծաթ ,
« ականս պատուականս . այն և աւազա-
« կաց և սպանողաց պարծանք են և սս-
« կեհանաց , և որք 'ի քրէական մատաղ

« սըն խոնջիցին : Թերևս զարդուք ինչ
« և պաճուճանօք հպարտանայցես, զայն
« և 'ի ձիսն է տեսանել, պարսիկք և զշա
« ռաւունսն նկարեն և պաճուճեն, այլ
« 'ի մարդկան միջի 'ի բողանոցս և եթ վայե
« լեն այնպիսի պաճուճանք, ուր պատիրքն
« և որոգայթքն են : Չամաչէս չթրջիս այն
« պիսի իրօք հպարտանալ, որովք և անա
« սունք հանգոյն քեզ լինիցին, և ծառայք
« և սպանողք և կանայք և աւազակք և
« գերեզմանակրկիտք :
« Այլ 'ի տունս ինչ գեղեցիկս պարծիցիս :
« Բազում թռչունք ևս 'ի գեղեցիկ տունս
« բնակեն, մանաւանդ ճայք ևս առաւել
« պայծառադոյն քան զքո տունսն ունին
« բնակութիւնս : Այլ թերևս ձայնիւ ինչ
« հպարտանայցես : Քան զփորն և զսո
« խակ և զասպուճակ չիցես ինչ ձայնիւ եր
« բէք քաղցր և հեշտական մրմնջել : Այլ
« թերևս պէսպէս արուեստիւք : Այլ ո՞վ որ
« յայնմ զմեղուօք զճարտարակօք անցանի
« ցէ, ո՞ր դրօշող, ո՞ր նկարիչ, ո՞ր գեսնափոր
« դտանիցի քան զնոսա իմաստուն, որ կա
« ըիցէ ճարտարութեան մեղուաց նմա
« նել : Այլ թերևս բարակ ինչ հանգեր
« ձիւք, այնու սարգք իսկ անցանեն զան
« ցանեն զքե : Այլ թերևս ոտիւք արա
« դութեամբ, և այնու ևս անասունք գլեն,

« մանաւանդ նասպաստակք և այծեմունք և
« այլ ևս անասունք՝ որ արագ իցեն ոտիւք :
« Այլ թերևս ՚ի տար աշխարհ ինչ երթա
« լով, և այնու թռչունքն անցանեն զքե :
« Մանաւանդ խորդք և ծիծառունքն՝ որ
« դիւրաւ հարկանեն զտարաշխարհական
« ճանասպարհս . ոչ պաշար բառնան, և ոչ
« զրաստու կարօտանան, այլ ընդ ամենայ
« նի բաւական են նոցա թեքն : Աովին և
« նաւ և զրաստ ինչ և կառք և հողմք, և
« ամենայն զինչ և իցէ, արագագոյնք են
« քան զքեզ : Այլ թերևս քաջատեսու
« թեամբ ինչ հպարտանայցես, այլ ոչ ինչ
« նման ես այծեման և արծուոյ : Թերևս
« զի արագ լսիցես, այլ չիցես սուր ական
« ջօք քան զէշ : Այլ թերևս հոտ քաջ առ
« նուցուս, այլ չկարես անցանել զչամբ :
« Այլ թերևս զի դործունեայ և համբե
« ըող իցես, այլ չես ձեռնհաս լինել անգա
« դար եբրե զմրջիւն : Այլ թերևս զի ոսկի
« բազում յանձին ունիցիս . այլ ոչ որպէս
« զհնդիկ մրջիւնն :
« Իսկ առողջութեամբ յոյժ իսկ առաւել
« են քան զմեզ անասունք, և անհագու
« թեամբ ինչ չերկնչին յաղքատութենէ,
« չկասկածեն ՚ի կարօտութենէ : Հայե
« ցարուք, սսէ, ՚ի թռչունս երկնից, զի ոչ
« սերմանեն, և ոչ հնձեն, և ոչ ժողովն

« յըշտեմարանս : թէ այսպէս իցեն, քան
« զմեզ՝ զանասունս լաւագոյն արար Աս-
« տուած : Տեսանես, որչափ ինչ վնաս իցէ
« չքններն . տեսանես, որչափ ինչ շնորհէ
« մեզ իրացն քննութիւն . որ քան զամե-
« նայն մարդիկ առաւել մեծամտէր, գտաւ
« և քան զանասունս ևս խոնարհագոյն .
« այլ խնայեսցուք ՚ի նա, և չնմանեսցուք
« նմա : Մի, զի քան զքնութիւնս առաւել
« մեծամտեաց, իջուցանեմք զնա յանաս-
« նոց աշտիճան, այլ կանգնեսցուք զնա
« անտի, ոչ վասն նորա, այլ վասն Հասա-
« ըտկաց պատուոյ՝ զի նա արժանի էր այն
« պիսի ինչ կրելոյ » :

Աոյն ինքն դարձեալ զսուղ իմաստս
զայս, հայեցեալ ՚ի կապանս Պօղոսի՝ զա-
մենայն վիշտս ըստ նմին օրինակի յանձն
առցուք, ընդարձակէ այսպէս :

« Աւարդ մի տրամեսցուք ընդ նեղու-
« թիւնս ինչ, որ վասն Քրիստոսի իցեն . այլ
« յուշ լիցին մեզ և կապանքն Պօղոսի, և
« նոյն եղիցի մեզ յորդորիչ : Աթէ խրատի-
« ցես զովմանս աղքատանալ վասն քրիստո-
« սի, յուշ արասջիր նոցա զկապանսն Պօ-
« ղոսի, և զանձն և զնոսա եղկելիս համա,
« բեսջիր, եթէ զմարմինս ևս ՚ի կապանս
« արկ վասն նորա, դու և ոչ կերակրելով
« զքաղցեալս լինիս հաղորդ ուղղութեան

« ցրն : Յուշ արա զկապանսն Պօղոսի,
« թէ չկրեցեր ինչ այնպիսի չարչարանս, և
« չցանկանայցես այնուհետև ընկերին :
« Յիշեա զկապանսն Պօղոսի, և տեսջիր
« զի անպատեհութիւն է՝ նմա այնչափ՝ ի
« վիշտս կալ, և քեզ այդչափ փափկանալ :
« Յանկանայցէս զրդութեան, զմտաւ ած,
« ջիր զբանսն Պօղոսի, զի նորին աշա-
« կերտ ես և նորին զինուորակից, զի արդ
« ՚ի դէպ իցէ զզինուորակիցն՝ ՚ի կասկանս
« տեսանել և զանձն՝ ՚ի զրդութեան : Աե-
« ղութիւն ինչ ՚ի վերայ հասանիցէ, և
« կարծիցես եթէ թողու ՚ի ձեռաց, առա-
« ջի աչացդ նկարեա զկապանսն Պօղոսի,
« և տեսանեցես՝ թէ ՚ի նեղութեան լինել՝
« չէ՞ ՚ի ձեռաց թողոյ նշանակ : Աւյորժամ
« ՚ի միտ անկանիցի կերպաս հանդերձ
« զգենուլ, յիշեսջիր զկապանսն Պօղոսի,
« և քան զկապերտսն ասպահարից անար-
« զազոյն ևս թուեսցին քեզ, և կամ որ
« ընդ այլ դայռ ինչ թօթափեալ իցեն : Աա-
« միցինս ոսկի զարդս կրել յանձին, զմտաւ
« ածջիր զկապանսն Պօղոսի, և քան զչու-
« ան ինչ հին չթուիցի քեզ լաւագոյն : Աա-
« միցինս ծամս գործել և գեղեցիկ երևել,
« նկարեսջիր զերկաթն Պօղոսի ՚ի բան-
« տին, և խանդաղատեսցին միաք քո յայն
« գեղ, և զքո սլճնանսն զարշելի համա-

« րեսջիր, և դառնապէս հաշիցես հառա,
« չիցես նորա կապանացն » :

Հ. Ասա ինձ արդ համառօտիւ որ ինչ
յօրինակաց աստի պարտ իցէ 'ի միտ առ
նուլ .

Պ. Ասիս զայն իսկ, զի թէպէտ և զսուղ
ինչ իմաստ օրէն է ընդարձակել, մանա-
ւանդ թէ ճարտարութիւն իսկ է, այլ զգու-
շալի է յոյժ՝ չյաւելուլ յայն դուզնաքեայ
և չնչին հանդամանս, և մի այնպիսի ինչ՝
որ չյաճախիցէ զզօրութիւն բանին :

Աւ երկրորդ զի զամենայն ազգս ազգս
ձեոց, զորոց յառաջագոյն ասացաք, մարթ
է 'ի կիր արկանել յընդւայնումն :

ԴԱՍ Ի.

Պարբերութիւն. — Արտասանութիւն :

Հ. Օ՛րնչ է պարբերութիւն .

Պ. Պարբերութիւն է բան լրացեալ, զոր
քերականն վերջակիտիւ ուսուցանէ ա-
ւարտել :

Մեծագոյն մասունք նորա կոչին ան-
դամք, որ միջակիտիւ արոհին, և փոքրա-
գոյնք կոչին հատածք, որ ստորակիտիւ բա-
ժանին. զոր օրինակ .

« Աչ ոք յուղի անկեալ, և բառնայ ինչ ընդ

« իւր յաւելորդացն, այլ պարտ և պատշաճ
« է պնդակազմ լինել, զի կարող լինիցի
« ընթանալ» :

Եւ դարձեալ. « Օ՛ր թէ զվարս առաջ
« նորդացն պարտէաք ինչ քննել, ապա և
« զձեռնադրութիւնն մեր պարտէաք տալ,
« և ամենայն ինչ վեր 'ի վայր կործանէր,
« ոտքն 'ի վեր և գլուխն 'ի վայր» . Ո՛հէք :

Հ. Բարեզք պարբերութեան քանի՞ ան-
դամք պարտին լինել.

Պ. Աչ նուազ քան զերկուս, և ոչ աւելի
քան զչորս. այլ ըստ պատշաճի իմաստիցն
մարթ է և բազմանդամ ևս յօրինել պար-
բերութիւնս, մանաւանդ 'ի պերճ ասա-
ցուածս, և միանդամ ևս 'ի վճիռ ասա-
ցուածս :

Օրինակ առաջնոյն յԱսկեբերանէ.

« Յորժամ հաւ զառաջինն խօսիցի, ոչ
« որպէս աստ 'ի տունս՝ խորդան ծառայք,
« դուրք փակեալք, և ամենեքին նման մե-
« ռելոյ կան ծանրաքունք, և պահայոյգքն
« միայն զզանդակսն զանչեցուցանեն. չիք
« անդ այսպիսի ինչ, այլ վաղվաղակի ամե-
« նեքին միանդամայն երկիւղիւ զքունն թօ-
« թափեալ, յառնեն կանառ հասարակ. յոր-
« ժամ զլիսաւորն ազդկամ ոտամբ կամ ձայ-
« նիւ առնիցէ, 'ի զգաստական պարսն յօ-
« ըրնեալք, դունդ առ դունդ կացուցեալք,

« ամենեքեան առ հասարակ զձեռս յերկինս
« համբարձեալ, զնուիրական օրհնութիւն
« սըն երգեն միահամուռ » .

Օրինակ երկրորդին յաճախ ուրեք գտա-
նի 'ի զիրս Առակաց .

« Սկիզբն իմաստութեան երկիւղ տեառն :
« Օ իմաստութիւն և զխրատ ամպարիշտք
« անգոսնեն : . . Արդի իմաստուն ուրախ
« առնէ զհայր . որդի անմիտ տրամութիւն
« է մօր » :

Հ . Առ ինչ տրոհմունքս այսոքիկ պար-
բերութեան իցեն կարևորք .

Պ . Այս առ 'ի պարզ իմացուած ճա-
ռին, և երկրորդ առ 'ի բարւոք արտասա-
նութիւն՝ որ յոյժ կարևորն է ճարտասա-
նին : Դեմոսթենեայ երկցս հարցեալ, թէ
զինչ կարևորագոյն իցէ ճարտարախօսի,
զնոյն երեքկնեաց պատասխանի՝ թէ Ար-
տասանութիւն :

Աւարդ քանզի մի 'ի կարևորաց բար-
ւոք արտասանութեան է ուրեք ուրեք
հանդիստ կամ դադարումն առնել ձայնի,
նմին իրի և բարւոք տրոհմունք պարբե-
րութեանց օգնեն առ այս :

Հ . Համառօտեա ինձ զօրէնս բարւոք
արտասանութեան .

Պ . Այս քան զամենայն պարտ է ճար-
տարախօսին կրթել զլեզու իւր 'ի յստակ

արտաբերութիւն, զամենայն զվանկս և զտառս քաջ առողանելով:

Արրորդ՝ ելևէջ առնել ձայնին ըստ ոլորակաց և ըստ իմաստից ճառին, և մի նմանաձայն զհարցականն և զարդելական կամ զսաստ և զաղերս արտասանել, որ զի անկենդան կացուցանէ զճառն, և նիրհեցուցանէ զլսելիս:

Արրորդ՝ հանդարտութեամբ և ծանր արտասանել՝ ըստ պատշաճի անդամոց և հատուածոց պարբերութեան զհանդիստսն առնելով, և մի շտապել տղայօրէն և պարտասեցուցանել զլսելիս:

Չորրորդ՝ մի մուծանել եղանակ յարտասանութիւնն՝ իբր նուագելով զճառն, որպէս ոչ սակաւք առնեն, որ տաղակալի է և օտար ՚ի բնականէն:

Հինգերորդ՝ մի բարձրագոչ ճառատել, այլ մանաւանդ ՚ի սկզբան մեղմ և դաշն ձայնիւ յառաջաբանել՝ եթէ ոչ յանկարծական ինչ իմաստիւք սկսանիցի ճառն, և ապա տակաւ ըստ պատշաճի սաստկացուցանել զբարբառ:

Ըս այս ամենայն օգնէ մեծապէս ընթեռնուլ ՚ի ձայն զճառս Ասկեբերանին, և մանաւանդ ուսանել յորդորակս ինչ յայնցանէ ՚ի բերան, և արտասանել զայնոսիկ առ ՚ի կրթութիւն:

ԳԱՍ ԻԱ

Հարժուածք:

Հ. Համառօտեսլիր ինձ և զկանոնս շարժուածոց, որ զոյդ ընդ քաջ արտասանութեան կարևոր են.

Պ. Հարժուածոց պարտ է յարմարել ընդ ձայն և ընդ կիրս արտասանողին, և է սա լեզու համբ, այլ ճարտարախօս, և բազում այն է՝ զի հզօրագոյն քան զբարբառ իսկ:

Երևելագոյն յանդամս է զլուխ, և զայն պարտ է ուղիղ ունել, և ըստ իմաստից ճառին շարժել ընդ ձեռս: Օրորինակ 'ի մերժելն ինչ կամ հրաժարել յիմեքէ կամ 'ի գարշել, պարտ է 'ի ձգել զձեռս ընդդէմ՝ դարձուցանել զզլուին 'ի բաց: Չիք 'ի կրից՝ զոր ոչ 'ի դէմս և յաչս մարթ իցէ արտասանողին յանդիման երևեցուցանել. նմին իրի պարտ է նմա ըստ իմաստից փոփոխել զայնոսիկ, մերթ սպառնական և մերթ աղերսական, մերթ տխուր և մերթ զուարթ, մերթ խրոխտ և մերթ ցածուն երևեալ:

Բայց թէպէտև յաչս և 'ի դէմս տարւորագոյն երևիցին կիրք հոգւոյ, այլ ճար-

տար ևս են ձեռք 'ի բացատրել զիմաստս :
Մնջկատակացն 'ի թատերս նախնեաց
խաղք, որք զտեսողս շարժէին յարտասուս,
բաւականք են 'ի ցուցանել զճարտար-
խօսութիւն ձեռաց :

Արդ 'ի շարժուածս ձեռաց՝ զաջ ձեռն
'ի ձախմէ յաջ տանելի է, սկսեալ 'ի հան-
դիւոյ կրծոց : Օճատունս ձեռաց պարտ
է արձակ և 'ի բաց ունել, և զբազուկն
պարզեալ. մի՛ զարմուկն 'ի վեր քան զուս
ամբառնալ, և մի՛ հաւասար բարձրութեան
ուսոց. մեկուսի յանձնէ ունել զայն, և
գրեթէ միշտ նովաւ սկսանել զշար-
ժուածս :

Ըստ այսմ և զահեակ ձեռն յաջմէ 'ի
ձախ կոյս ածելի է, և ոչ երբէք զձախն
միայնակ շարժել, այլ միշտ աջակից :

Պարտ է ընդ աւարտ պարբերութեանց
աւարտել զշարժմունս ձեռաց, և ապա
թողուլ անկանել բնականապէս 'ի վերայ
ամբիոնին՝ եթէ յամբիոնի ոք բանախօսէ,
և մի՛ երբէք 'ի ներքս կամ արտաքս արկա-
նել զձեռն : Իսկ եթէ յոտին կացեալ բա-
նախօսիցէ որ, պարտ է յաւարտ պարբե-
րութեանց թողուլ երկուստեք զձեռս 'ի
կախ. իսկ եթէ բազմեալ յաթոս, արկա-
նել զձեռս 'ի վերայ ծնոցաց :

Ինչպէս ազգի ազգի ձեռք են շարժուա-

ծոց, զորս սովորութեամբ և կրթութեամբ մարթ է ուսանել:

Առ ՚ի ցուցանել զբարձրութիւն, պարտ է դարձուցանել փոքր մի զգլուխ առ ՚ի կողմն, և ամբառնալ զաչս ՚ի վեր՝ առանց ամբառնալոյ զգլուխն, և զերկոսին զձեռս միանգամայն ՚ի միւս կողմն առ ՚ի ստոր մեկուսի յանձնէ երկայնել, զերեսս ձեռաց դարձուցեալ առ ունկնդիրս:

Իսկ ընդ հակառակն առ ՚ի ցուցանել զխորութիւն, պարտ է խոնարհեցուցանել աստի զաչս յերկիր, և անտի ամբառնալ զձեռս ՚ի վեր՝ զարտաքոյս նոցա ցուցանելով ունկնդրաց:

Առ ՚ի ցուցանել զտարածութիւն, պարտ է զերկոսին զձեռս ՚ի հանդիպոյ կրծոց յաջ և յահեակ ածել շուրջանակի զոյգ ընդ աչս:

Առ ՚ի ցուցանել զերկայնութիւն, պարտ է զերկոսին զբազուկս միանգամայն ՚ի մի կոյս երկայնել՝ ուղղակի զձեռս ընդ արմկունս ունելով, և զափ ՚ի խոնարհ:

Իստ այսմ օրինակի պարտ է և զայլ ձևս գիտել և ուսանել ՚ի քաջակիրթ և ՚ի բարեձև բնաւորելոց անձանց. և զայն ևս գիտել, զի ոչ ամենայն շարժմունք և ձևք ամենեցուն ՚ի ճահ գան: Աւ դարձեալ մի անդէն ՚ի սկզբան ճառին սկսանել և զշար-

ժուածս, այլ տակաւ. և միշտ իսկ հանդարտութեամբ առնել զշարժմունս:

Այլ կարևորագոյն և ընդհանուր կանոն և ձայնի և շարժուածոց այն է՝ բնականին հետեւել, յորում է կատարումն արուեստին. զի սլարտ է սմա ըստ օրինակին կարչաց զեղեցկացուցանել զբնականն, այլ մի երբէք օտարանալ ՚ի բնութենէ:

ԴԱՍ ԻԲ.

Ո՞՞՞ վսեմ:

Հ. Օ՞՞ինչ է ո՞՞ն.

Պ. Կերպարան բանից ըստ իմաստից ճառին յարմարեալ: Արդ թէպէտ և բազում ազգի կերպարանք բանից են, ոչ միայն ըստ զանազանութեան շարագրածոց՝ այլ և ըստ հանդամանաց բարուց շարագրողացրն զանազանեալ, այլ հստորք առ հեշտի ուսանողաց երիս ազգս ո՞՞նչ զլիաւորս զանազանեն, վսեմ, պարզ և բարեխառն:

Հ. Ո՞ր է վսեմն.

Պ. Զորում ճարտարախօսն ՚ի կիրարկանէ ազնուագոյն մտածութիւնս, պերճագոյն ասացուածս, քաջայանդուզն ձևս, և սաստկագոյն յոյզս կրից:

Այսպէս իմաստունննկարագրէ զԱհա

րոն, յորժամ եկաց նա ընդ մէջ մեռելոց
և կենդանեաց՝ զիջուցանել զցասումն տեա-
որն՝ ի կատորել նորա զժողովուրդն.

« Փութացեալ այրն անարատ, մատեալ
« յառաջ ՚ի կռիւ իւրով սպաշտաման զի-
« նուն, աղօթիւք և խնկօք ուղերձեալ զքա-
« ւութիւնն. եկաց ընդդէմ բարկութեանն,
« և արար վախճան հարուածոցն, յայտ ա-
« րարեալ թէ քո ծառայ է: Յաղթեաց բա-
« զում ամբոխի, ոչ զօրութեամբ մարմնոյ,
« և ոչ զինուց ազգեցութեամբ, այլ բանիւ
« զտանջիչն հնազանդեաց: Օ երդմունս և
« զգաշինս հարցն յիշատակեալ, զշեղջա-
« շեղջ գիականցն անկելոց առ միմեանս,
« կացեալ ՚ի մէջ, դադարեցոյց զբարկու-
« թիւն. եհերձ ճանապարհ ընդ մէջ կեն-
« դանեաց և մեռելոց: Քանզի ՚ի սճղնա-
« ւոր հանդերձին էր ամենայն զարդն, և
« փառք հարցն ՚ի չորեքկարգեան ականսն
« քանդակեալս, և մեծութիւն քո թագ ՚ի
« զլուխ նորա: Յայնց խորշեցաւ սատա-
« կիչն, և ՚ի նոցունց զարհուրեցաւ »:

Այսպէս և յորժամ նկարագրէ զսպաշտ-
պանել Աստուծոյ զարդարս.

« Բայց արդարք յաւիտեան կեցցեն, և ՚ի
« տեառնէ վարձք նոցա, և խնամք նոցա
« ՚ի Բարձրելոյն:.. Օ ի աջով իւրով հովանի
« լիցի նոցա, և բազկաւ իւրով վերակա-

« ցու լիցի նոցա : Ապէ սպառազինութիւն
« զնախանձ իւր, և վառեսցէ զարարածս
« առ 'ի խնդրելոյ զվրէժս 'ի թշնամեաց :
« Օգեցցի զրահս զարդարութիւն, և զի-
« ցէ սաղաւարտ զգատաստանն անաչառ :
« Ապէ վահան զսրբութիւն անվկանդ, և
« սրեսցէ զհատու բարկութիւնն 'ի սուսեր.
« և պատերազմեսցի խառն ընդ նմա և
« և աշխարհս առ անդգամս : Գնասցեն
« նետք կորովիք փայլատականց, և իբրև 'ի
« լայնալիճ աղեղանէ յամպոցն ոստիցեն
« 'ի նպատակս, և 'ի քարընկէց բարկու-
« թենէ թափեսցի լիով կարկուտ : Օայ-
« րազնեսցի 'ի վերայ նոցա ջուր ծովու, և
« զետք ողողեսցեն անխնայ : Ի գիմի հարցի
« նոցա հողմն բռնութեան, և իբրև զմրրիկ
« հոսեսցէ զնոսա : Աւերեսցէ զամենայն
« երկիր անօրէնութիւն, և խարդախութիւն
« կործանեսցէ զաթոռս բռնաւորաց » :

Այսպէս և Յորայն ստորագրութիւն
երիվարին .

« Արոտայ 'ի տաշտի և դափր հատանէ .
« ելանէ 'ի պաշտօնորութեամբ, 'ի պատահել
« նետից՝ արհամարհէ, և ոչ դարձցի յեր-
« կաթոյ : Ի վերայ նորա շողան աղեղն և
« սուսեր, և շարժին վահանի և նիզակի .
« և բարկութեամբ ապականէ զերկիր : Աւ-
« ոչ հաւատայ մինչև փող հարկանիցի . և

« Իբրև փող հարկանի, նա վաշ վաշ կար-
« դայ. 'ի հեռաստանէ առնու զհոտ պա-
« տերազմի, վազս առնելով և փոնչելով » :

Ըստ սմին օրինակի և Ասայի զստա-
կուսն թագաւորին բաբելացւոց նկարագրէ,
« Աւ եղիցի յաւուր յայնմիկ հանդուսցէ
« զքեզ տէր 'ի ցաւոց և 'ի տրտմութենէ
« քումմէ և 'ի ծառայութենէ խստութեան՝
« զոր ծառայեցեր նոցա : Աւ առցես զողոս
« զայս 'ի վերայ թագաւորին բաբելացւոց,
« և ասասցես յաւուր յայնմիկ. զիարդ դա-
« դարեալ կայպահանջողն, հանգեաւ տազ-
« նապողն, զի խորտակեաց տէր զլուծ
« մեղաւորացն, զլուծ իշխանաց : . . Հան-
« գեաւ յուսով երկիր ամենայն, և դոչէ ու-
« րախութեամբ . և փայտքն Վիբանանու
« ոտնհար եղեն քեզ, և մայրքն Վիբանանու
« ասեն, թէ յորմէ հեաէ դու դադարեցեր, ոչ
« ելին 'ի մեզ փայտահարք : Վժոխք 'ի ներ-
« քուստ դառնացան 'ի պատահելն քեզ .
« կանգնեցան միանգամայն հսկայքն ամե-
« նայն՝ որ լեալ էին իշխանք երկրի. որ
« յարուցին յաթոռոց իւրեանց զամենայն
« թագաւորս ազգաց : Ամենեքեան պա-
« տասխանի տացեն քեզ և ասասցեն, և
« դու իբրև զմեզ ըմբոնեցար, և ընդ մեզ
« համարեցար. իջին 'ի դժոխս փառք քո
« և բազում ուրախութիւնն քո » :

ԴԱՍ ԻԳ .

Ոճ՝ պարզ, և բարեխառն :

Հ. Ո՞ր է պարզ ոճն .

Պ. Յորում ճարտարախօսն դիւրիմաց բանիւք և ընտիր ասացուածովք զարդս բնականս 'ի կիր առնու, զոր Ուլրատիոս ինքնագարդ կոչէ զոճն զայն, որպէս բարձում ուրեք 'ի պատմութեանն Աղիշէի և մանաւանդ 'ի յառաջաբանսն է տեսանել, զոր օրինակ .

« Թէպէտ և ոչ իցեմք բաւական ասել զա-
« մենայն չարիսն՝ որ անցին անդէն 'ի կա-
« բաւանին ընդ դունդն Հայոց, սակայն
« և ոչ լուել կամիմք ծածկելով զվիշտս
« նեղութեանն, այլ ասասցուք փոքր 'ի
« շատէ, զի ձայնակիցք լիցուք այնոցիկ՝
« որք դառնապէս զմեզ ողբային : Օ՛ի և
« դու իբրև լուիցես, ոչ սակաւ արտասուս
« հեղուցուս 'ի վերայ ազգին թշուառու-
« թեան » :

« Մինչև ցայսվայր ոչ ինչ կարի զանդի-
« տէի պատմել զհարուածս ազգիս մերոյ,
« որ յարտաքին թշնամեացն ճշմարտու-
« թեան չարաչար յարեան 'ի վերայ մեր .
« որք սակաւագոյնք հարին զմեզ, և յոր-

« վագոյնք հարեալ գտան 'ի մէնջ, քանզի
« դեռ ևս միաբանք և հաւասարք էաք:
« Թէպէտ և ոմանք 'ի ծածուկ ունէին
« զերկմտութիւն նենդութեանն, սակայն
« յաչսարտաքնոցն ահաւոր երևէր միաբա,
« նութիւնն: . . Արդ յայսմհետէ և անդր,
« ուր սպրդեալ անկանի երկպառակու
« թիւն 'ի ներքս, ընդ քակել միաբանու
« թեանն՝ և երկնաւոր առաքինութիւնն
« հեռանայ, և անձնընտիրք լինելով, յոյժ
« բազմանայ լալումն ողբոյս » :

« **Մեծ է սէրն Աստուծոյ քան զամենայն**
« մեծութիւն երկրաւոր, և այնպէս աներ
« կիւղս առնէ զմարդիկ, իբրև զանմար
« մին զօրս հրեշտակաց, որպէս անդստին
« 'ի սկզբանէ է տեսանել զբազումս բա
« զում անգամ 'ի բազում տեղիս: **Մար**
« **դիկ՝** որ սիրովն Աստուծոյ իբրև զինու
« վառեալք էին, ոչ ինչ խնայեցին զան
« զիտելով իբրև զանարի՝ գոլով վատասիրտք
« կամ 'ի մահ անձանց, կամ յափշտակու
« թիւն ընչից, կամ 'ի խողխողումն սիրելեաց,
« կամ 'ի գերութիւն ընտանեաց, ելանել
« 'ի հայրենի երկրէն և անկանել 'ի ստր
« կութիւն յօտարութեան, առ ոչինչ համա
« րեցան զայս ամենայն անցս չարչարանաց,
« այլ միայն միաբան կալ ընդ Աստուծոյ, զի
« 'ի ոմանէ միայն մի գերի ելցեն » :

Հանդոյն իմն ոճով և Շնորհալին բա-
զումուրեք 'ի թուղթսն վարի . զոր օրինակ
« Օարթեաք որպէս 'ի քնոյ զուարթա-
« բարս բանիւք՝ որ 'ի սուրբ թագաւո-
« թութենէդ . որով պատառեցաւ քուրձ
« սոյ առ 'ի մէնջ, և զգեցաք զուրախու-
« թիւն ըստ գոհաբանութեան սուրբ մար-
« դարէին՝ որ յաղազս Մստուծոյ : Քանզի
« ծանոյց մեզ զօրութիւն բանիս, ոչ միայն
« անուանակցութեան և աթոռակալու-
« թեան՝ այլ և զործակցութեան ճշմար-
« տին էմմանուէլի արծանաւորել ձեզ,
« այնմ՝ որ հարիւրոցն ոչխարաց և դրա-
« մոցն տասանց էջ 'ի խնդիր նուազու-
« թեանցն լուման : . . Քանզի զցանկ օրի-
« նացն՝ զոր խրամատեաց թշնամին, և
« զուռսն հաւատոյ՝ զոր քանդեաց կինձն
« վայրենի 'ի ճշմարիտ սրթոյն, փութալ
« խրամակարկատ լինել, և առ նոյն պա-
« տուաստել վերստին, և այսմ բարւոյ գոր-
« ծակից լինել զմերս տկարութիւն հրա-
« մայեալ էք եղբօրն իմոյ առաքել 'ի սուրբ
« թագաւորութենէդ » :

Հ. Ար է բարեխառն ոճն .

Պ. Ար ոչ զպարզին ունի փափկութիւն, և
ոչ զվսեմին շանթիչ զօրութիւն, այլ հազոր-
զի երկաքանչիւրոցն . որպիսիք են բազմա-
գոյնք 'ի ճառից Ասկեբերանին . զոր օրինակ .

« Աղէ ասա, 'ի պէտս բնակութեան սիւնքն
« բազումք և խոյակքն աղաւեղազէսք, և
« ազղի ազղի դիմակք պատկերացն, և
« ոսկի խառնեալ ընդ նկարս որմոյն, և այլ
« ևս համապայծառ գունակք գունակք
« երանգոցն, և ազղի ազղի դեղքն ընդ մի
« մեանս 'ի ճամուկսն մտեալ, զինչ օգուտ
« իցէ, այլ հպարտութեան և պարծանաց և
« յօրանալոյ պատճառք են և աւելորդ ան
« մտութեան: Ամենայն ուրեք կարեորաց
« պէտք են՝ որով կարօտ իցեմք, և զպէտ
« սրն վճարիցեմք: Տեսանե՞ս, զի վնաս է և
« ոչ օգուտ, և աւելորդ և անշահ. զի թէ
« աւելի պէտս ինչ չտայցէ, և ոչ վայել
« չութիւն երեսաց: Քանզի յորժամ ժա
« մանակ 'ի վերայ անցանիցէ, յազի ակն,
« և չթուի ինչ վայելուչ, և յայտ է թէ չէ
« ինչ, բայց վնաս միայն. այլ չտայ զայն
« իմանալ սնապարծութիւնն: Պօղոս և
« զոր շահն կարծէր, զայն վնաս համարէր
« վասն Քրիստոսի: Մինչև ցերբ ընդ երկիր
« բեեռիմք, մինչև ցերբ չնայիցիմք ընդ
« երկինս: Չտեսանիցէք զծերացեալսն,
« զիարդ և ոչ զմիոյ ինչ զախորժելոցն յի
« շեն. չտեսանիցէք զվախճանեալսն, զո
« մանս 'ի ծերութեան զոմանս 'ի մանկու
« թեան. չտեսանիցէք զբազումս իսկ
« կենդանւոյն զրկեալս յընչիցն, զի այն

« չափ ծնդիցիմք ընդ չկայսս և շմնալիս,
« ընդէր այդչափ կապեալ իցեմք ընդ մնա-
« սակարսս. մինչև ցերբ ոչ հարկանիցեմք
« բուռն զկայիցն և զմնացելոց »:

Սովին ոճով և Աղիշէ վարդապետ նկա-
րազրէ զերանելի կանայս սուրբ նախա-
րարացն նահատակելոց.

« Քազում ձմերաց հալեցան սառնամանիք,
« եհաս դարուն, և եկին նորեկ ծիծուռնք.
« տեսին և խնդացին կենցաղասէր մար-
« զիկ, և նոքա ոչ երբէք կարացին տեսա-
« նել զանձկալիսն իւրեանց: Սաղիկք
« դարնանայինք յիշատակեցին զպսակա-
« սէր ամուսինս նոցա, և աչք իւրեանց
« կարօտացան տեսանել զցանկալի գեղ
« երեսաց նոցա: Սպառեցան բարակք որ-
« սականք, և խցեալ կուրացան արշաւանք
« որսորդաց: Քնազրօք յիշատակեցան նո-
« քա, և ոչ մի տօնք տարեկանաց ոչ ա-
« ծին զնոսա ՚ի հեռաստանէ: Ի ճաշա-
« տեղս նոցա հայեցան, և արտասուե-
« ցին, և յամենայն ատեանս յիշեցին զա-
« նուանս նոցա: Քազում արձանք կանդ-
« նեալ էին յանուն նոցա, և անուանք
« իւրաքանչիւր նշանակեալ ՚ի նոսա: Աւ-
« իբրև այնպէս յամենայն կողմանց ալէ-
« կոծ լինէին միտք նոցա, ոչ ինչ կասեալ
« թուլացան յերկնաւոր առաքինութենէն:

« Արտաքնոցն երևէին իբրև այրիք սղա-
« ւորք և շարչարեալք, և յողիս իւրեանց
« զարդարեալք և մխիթարեալք երկնաւոր
« սիրովն: Աչ ևս սովորեցին հարցանել
« զեկեալոք ՚ի հեռաստանէ, եթէ երբ լի-
« նիցի մեզ տեսանել զսիրելիսն մեր. այլ
« այն էին իղձք աղօթից նոցա առ Աս-
« տուած, եթէ որպէս սկսանն քաջու-
« թեամբ ՚ի նմին կատարեսցին լի երկնա-
« ւոր սիրովն »:

Դարձեալ նոյն ինքն ՚ի յառաջաբան
երկրորդ գրոցն.

« Արոց ողիքն թուլացեալ են յերկնաւոր
« առաքինութենէն, յոյժ ընդ ահիւ ան-
« կեալ է բնութիւն մարմնոյ. յամենայն
« հողմոյ շարժի, յամենայն բանէ խռովի, և
« յամենայն իրաց դողայ. երազագէտ է
« այնպիսին ՚ի կեանս իւրում, և յանպիտ
« կորուստն յուղարկի ՚ի մահուան իւրում:
« Արպէս և ասաց ոմն ՚ի հնումն. Մահ
« ոչ իմացեալ՝ մահ է, մահ իմացեալ՝ ան-
« մահութիւն է. որ զմահ ոչ գիտէ, եր-
« կրնչի ՚ի մահուանէ. իսկ որ գիտէ զմահ,
« ոչ երկնչի ՚ի մահուանէ. և այս ամե-
« նայն շարիք մտանեն ՚ի միտս մարդոյ յան-
« ուսումնութենէ: Աոյր զրկի ՚ի ճառա-
« դայթիցարեղական, և տղիտութիւն զրկի
« ՚ի կատարեալ կենաց. լաւ է կոյր աչօք

« քան կոյր մտօք, որպէս մեծ է Հոգի քան
« զմարմին, այսպէս մեծ է տեսաւորու
« թիւն մտաց քան զմարմնոց »:

ԴԱՍ ԻԴ.

Ընտրութիւնք ոճոյ:

Հ. Ար յերից աստի կերպարանաց բա-
նի ընտրելագոյն իցէ.

Պ. Արեքեան իսկ զովելիք են, այլ վսեմն
դերագոյն քան զայլս, և պարտ է ճար-
տասանին ըստ իմանտից ճառին զերե-
սեան ևս՝ ի կիր արկանելքանդի պարառու-
թեամբ երեցունցս այսոցիկ յարգարի ճար-
տարախօս կատարեալ:

Այլ դժուարին է յոյժ այսոցիկ յումեք
՝ ի միասին պատահել, և յոյժ դիւրին երե-
քումբքն իսկ զեղծանել, զպարզութիւն փո-
խեալ ՝ ի գծութիւն, զզարդ ՝ ի սչրանս
և յարուեստակութիւն, և զվսեմութիւն
՝ ի ճոռոմ ճամարտակութիւն:

Հ. Բովանդակեա ինձ սր ինչ այլ ևս
զիտելիք իցեն զոճոյ.

Պ. Բաց յերից ճարտասանական կեր-
պարանաց ասացուածոյ, են և ուսումնա-
կանն, և բնիկ պատմականն, և լակոնա-
կան՝ որ յարձանագիրս և այլ ուրեք ուրեք

վարի: Մոքա օտար յամենայն զարդուց՝
զկարևորն և եթ բացատրեն:

Օրինակ ուսումնականին յաճախ ուրեք
գտանի՝ ի զիրս Ազնկայ, զոր օրինակ.

« Յորժամ անիւ շրջանակիցի, և մըջիւն
« մի ՚ի խեցին գնայցէ յարեմտից կողմա-
« նէ ընդ արևելս, վասն անուին արադա-
« գոյն ընդ արեմտից կողմն շրջելոյ թուի՝
« թէ մըջիւնն յարևելից յարեմուտս կոյս
« ընթանայցէ. որ ոչ յարևելից յարեմու-
« տըս կողմն գնայցէ, այլ յարեմտից յարև-
« ելս, և անիւն ստէպ շրջելովն այնպէս
« երևեցուցանէ »:

« Աւ օդ ընդ ջուրս և ընդ երկիր խառն է,
« և զի ընդ ջուրս օդ խառն է, ՚ի զեռ-
« նոցն յայտ է՝ որ ՚ի ջուրս զօդոյն կեն-
« դանութիւնն ծծեն: Աւ զի ընդ երկիր
« նոյն օդ խառն է, յորժամ անձրև լեալ
« իցէ, և արև տայցէ, ՚ի գոլորշոյն՝ որ ՚ի
« սրտէ երկրին ՚ի վեր ցողանայ՝ յայտ յան-
« դիման երևի: Աւ զի ընդ օդս հուր
« խառն է, ՚ի փայլատականցն՝ որ ՚ի շփե-
« լոյ ընդ միմեանս հողմոյն և ամպոց ար-
« ձակին՝ յայտ յանդիման ցուցանին: Աւ
« դարձեալ, թէ յապակի սպիտակ ջուր
« արկեալ՝ յարևու ունիցիս, լուսաւորու-
« թեան արևուն մտեալ ընդ սպիտակու-
« թիւն սպակւոյն, և ընդ յստակութիւն

« ջրոյն օդով թափանցանց անցեալ, հուր
« ծնուցանէ » :

Յօրինակ պատմականին շատ իսկ են
պատմութիւնք սուրբ գրոց, և մանաւանդ
աւետարանին Առկայ և գործոց առա-
քելոց . որոց յառաջաբանքն գեղեցիկք
են յոյժ, ամենեւին անզարդ բացատրու-
թեամբն :

« Քանզի բազումք յօժարեցան վերստին
« կարգել զպատմութիւնն վասն իրացն
« հաստատելոց 'ի մեզ, որպէս աւանդե-
« ցին մեզ որ 'ի սկզբանէ ականատես և
« սպասաւորք եղեն բանին, կամ եղև և
« ինձ, որ 'ի սկզբանէ զհետ երթեալ էի
« ամենայնի ճշմարտութեամբ, կարգաւ
« զրել քեզ, քաջդ թէոփիլէ, զի ծանիցես
« զբանիցն՝ որոց աշակերտեցար՝ զճշմար-
« տութիւն » :

Մոյնպէս և նախադրութիւնք սուրբ
գրոց գեղեցիկք են յոյժ, համառօտ և ա-
ռանց աւելորդաց զպատճառս և զհան-
դամանս գրոց իւրաքանչիւր բացատրելով :
Օրինակ իմն նախադրութիւն իմաստու-
թեանն .

« Բազում գիրս երևեցուցանեն զոչ Սո-
« զմոնի՝ ասացեալքն զնմանէ երիս հա-
« զար առակս, և հինգ հազար օրհնու-
« թիւնս . զոր կէսք յառակսն և յԱրգեր-

« գոցն իմանան, և այլք՝ թէ չէ բովան-
« գակն ՚ի միջի: Արդ զկարծիս զայս կալ-
« ցի ոք որպէս և ախորժէ: Այլ առ այս
« զիրք՝ ոմանք կարծեօք վարեցան, իբր
« թէ չէ նորա. բայց բազում քննութեամբ
« ստուգեցաւ նորա գոլ, և ընդ առաջին
« զիրան հարազատ, որպէս տիպք բանիցն
« և զօրութիւն իմաստիցն յայտնէ, հա-
« ւասարազօր գոլով առաջնոց գրեանց,
« թէ և սուղ ինչ զանազանի, որպէս ժողո-
« վողն յԱռակացն, և Արդերգոցն յերկո-
« ցունցն. որով մեծ հարստութիւնն նորա
« յիմաստս և ՚ի բանս ցուցանի: Աոյն-
« պէս և այս զիրք յառատագոյն բանիւ
« խրատէ զԼօզան՝ սիրել զարդարութիւն՝
« որով կարասցեն ընդունել զսուրբ Հո-
« դին, և փախչել ՚ի կորուսիչ խորհրդոց
« ամպարշտաց, որք թէպէտ ժամանակօք
« և ծննդովք բազմանան, փուտք են և
« զաղփաղփունք: Աւ զի վայելեսցեն ար-
« դարք զանձառ բարութիւնս. որ թէպէտ
« և անզաւակք կամ կարճակեացք, այլ
« անմահութեան յուսով հաստատեալք.
« և թէ ՚ի պատուհասիլ անզգամացն՝ նո-
« քա մեծապէս փառաւորեսցին: Խրատէ
« զԹաղաւորս՝ և որք վերնոյ թագին փա-
« փաքեն՝ պատուել զիմաստութիւն, որով
« յաւիտեան թաղաւորեսցեն. և հաստա-

« տէ զրանն բազում վկայիք, ինքեամբ և
« այլովք՝ որք պատուեցին զիմաստութիւն
« և փառաւորեցան, և այլովք՝ որ վարեցան
« անզգամութեամբ և պատուհասեցան » :
Հ. Ո՞ր իցէ լակոնական ոճն .

Պ. Ըմենեին հակիրճն և սուր : Աւ կա-
լաւ սա զանունն 'ի լակոնացւոց անտի,
որ են սպարտացիք. քանզի սոցա կարի
ախորժական էր ոճս այս, և ասելի յոյժ
պերճախօսութիւն : Արով առ բազում
սպառնալիս թշնամեաց ետուն պատաս-
խանի միով յունական վանկիւ՝ որ նշան-
նակէ Աթէ. իբր ասել, Աթէ կարող
իցէք : Սոյնպէս և առ սպառնալիս Փիլիպ-
պեայ արքային մակեդոնացւոց ետուն
պատասխանի . « Դիոնեսիոս 'ի Աորըն-
թոս », իբր ասել . Յիշեա զԴիոնեսիոս՝
որ բռնակալելն ջանայր որպէս զքեզ, և
այժմ տարազիր 'ի թագաւորութենէ պան-
զըխաի 'ի Ասրնթոս :

Արդ ոճս այս կարի յարմար է և կա-
րևոր արձանագրի . այսպիսի էր արձանա-
գիր բազնին յԱթէնս, « Ընծանօթի Աս-
տուծոյ », յայտ առնելով զի բազինն այն
նուիրեալ էր 'ի ժողովրդենէն աթենացւոց
աստուածոյ ումեմն՝ որ անծանօթ էր նոցա :

Արսլիսի էր և արձանագիր աշտարա-
կին Փարոսի յԱզիպտոս .

« Սոստրաա Անիգացի, Գեքսիփանեայ որ
« զի, զիցն սրահսանաց վասն նաւորդաց » :
Օ՛ր խորամանկ ճարտարապետին, հրա-
մանաւ Պտղոմեայ Աղբայրասիրի զշե-
նուածն զայն կանգնեալ, ուր լապտեր 'ի
բարձու լուսատու նաւաց եկաւորաց վա-
ռէր, խարդախութեամբ զիւրն 'ի նմա
գրոշմեաց զանուն . իբր թէ ինքն Սոս-
տրաա Անիգացի, որ էր որդի Գեքսիփա-
նեայ, նուիրէր զայն զիցն խնամակալուաց
նաւելոցն ընդ ծով, զի 'ի լոյս լապտերին
գիւրութեամբ մտցեն նաւորդք 'ի նաւա-
հանդիսա անդր 'ի գիշերի :

Այսպէս և 'ի վաղեմի սերեմն շիրմի
տղայոյ ուրուք մանկան, զոր մայրն կան-
գնէ վաղամեռիկ որդեկին, գտանի գրոշ-
մեալ արձանագիրս այս . « Օ՛ր դու ինձ
սրարաէիրն, ընկալ 'ի մօրէս » :

Այնպէս գեղեցիկ է ոճս այս յարձա-
նագիրս, զի ազգու ևս է յոյժ քան զար-
ձանագիրս քերթողականս ճոխս յօրինեալս
չափու :

ԴԱՍ ԻԵ .

Կրթութիւն ոճոյ :

Հ . Որպէս մարթ իցէ ստանալ ոճ վայելուչ .

Պ . Նախ քան զամենայն պարտ է 'ի շարագրեւն քաջ խորհել և 'ի միտ առնուլ՝ որ ինչ առաջի կայ ասել, զի եթէ ոչ կարգաւ և բացայայտ 'ի միտան դք ունիցի զեմաստս, անհնարին է թէ բարւոք բացատրեսցէ զայնս :

Արկրորդ՝ կրթել զանձն 'ի գրութիւն, և այն հանդարտութեամբ և ոչ շտապաւ և վեր 'ի վերոյ, և մանաւանդ 'ի սկզբան անդ վարծից. զի ապա հանդարտութեամբ և ուշով մարթի զհնարաւորն ստանալ շարագութիւն :

Արրորդ՝ յետ ժամանակի առնուլ զշարագրեալն 'ի քննութիւնս և զթերութիւնս նորա հետազօտել . յղկել զայն և կոկել և զաւելորդս 'ի նմանէ յասպաւել :

Չորրորդ՝ վերծանել մտադրութեամբ զքաջ մատենագիրս, և քննել զոճ նոցա և զեղանակ բացատրութեանցն . օրինակել հատուածս ինչ 'ի նոցանէ, կամ ուսանել 'ի բերան :

Հինգերորդ՝ ՚ի միտ առնուլ զիմաստս
հատուածոց ինչ յընտիր մատենագրաց, և
շարագրեալ զայն ՚ի մտաց՝ բաղդատել
ասպա ընդ բնագրին :

Վեցերորդ՝ ըստ իմաստից իւրաքան
չիւր զեղանակ բանին յարմարել, զի չէ
վայելուչ քերթողաբար յօրինել զբանն՝
ուր ճշգրտաբանութեան փաստից պէտք
իցեն կամ պարզ պատմութեան :

Եօթներորդ՝ ընթեոնուլ զգիրս քննարա
նից և հռետորաց վարժապետաց արուես
տին, և ՚ի միտ առնուլ զկանոնս ճար
տասանութեան աւանդեալս ՚ի նոցանէ, և
զթերութիւնս՝ յորոց պարտ է զգոյշ լինել :

Շ. Իցէ՞ և այլ ինչ հնար կրթելոյ և յար
գարելոյ զոճ .

Պ. Եւ իսկ, բայց լեզուագիտաց և եթ
պահեալ : Քանզի սոցա զիւրազոյն յոյժ
մարթ է կրթել զոճ իւրեանց՝ պարապելով
՚ի թարգմանութիւն ընտիր մատենագրաց,
պահեելով ըստ կարի զճշգրութիւն՝ առանց
ստնանելոյ յատկութեանց բնիկ բարբա
ռոյն : Օ՛ի այլ են քերականական կանոնք
և յատկութիւնք լեզուաց իւրաքանչիւր, և
այլ եղանակ ասացուածոց նոցա և իւրա
քանչիւր ուրուք ՚ի մատենագրաց :

Արդ պարտ է թարգմանչին զքերակա
նական կանոնս նոցա և զյատկութիւնս փո

խել յիւրն, այլ ոչ զեղանակ բացատրու-
թեանց նոցա, ապա թէ ոչ, միօրինակ ընդ
զրչաւ նորա խօսեսցին մատենագիրք ամե-
նայն, ընտիրն և հետեակ, և ոչ ևս այ-
նուհետև մատենագիրն, այլ թարգմանիչն
իցէ՝ որ խօսիցի: Թարգմանութիւն այս-
պիսի սակաւ կամ ոչ ինչ օգնէ ՚ի կրթել
զոճ, ոչ միայն զընթերցողաց, այլ և զթարգ-
մանչին: Իսկ որ ճգնի ոչ ինչ աւելի կամ
պակաս ասել քան զընագիրն, և սեփակա-
նէ իւր զտիպս կերպարանաց բանից նորա,
այնպէս կրթի ոճ իւր, զի և ՚ի գրելն
յանձնէ՝ հանդոյն նմին յօրինէ զեղանակ
ասացուածոցն, և ընտիր զբացատրու-
թիւնսն: Իսկ քերականական ոճ նորա ըն-
տիր ևս յօրինի. զի որ հանդերձ կապա-
նօք թարգմանութեան պահէ զոճ և զյատ-
կութիւնս բնիկ բարբառոցն, յորժամ ազատ
՚ի կապանաց անտի իցէ, յայտ է զի ընտիր
ևս հայկաբանէ:

Հ. Աւ որպէս մարթ իցէ վարժել ՚ի
քաջ թարգմանութիւն.

Պ. Յորմէ լեզուէ թարգմանել ինչ որ
և կամիցի, պարտ է նմա ընդ բնագիրս
այնր լեզուի բաղդատել զընտիր թարգմա-
նութիւնս: Աւ քանզի թարգմանութիւնք
նախնեաց մերոց ՚ի հին լեզուս և եթ ամփո-
փին, առ ՚ի վարժս թարգմանութեան ար-

զի լեզուաց հարկ է դարձեալ 'ի սուրբ
գիրս զիմել: Օ ի որովհետև առաւելագոյն
'ի նոսա պահի ճշդութիւն, և երկաքան
չիւր թարգմանութիւնք, մերն և այլոց,
յար և նման են բնագրին, որով և ընդ
իրեարս գտանին համեմատք, որ բաղդա-
տէն զնոսա տեսանէ զինչ մասնկունս և
բառս խտալացին կամ գաղղիացին և այլն
յաւելու առ 'ի պահել զյատկութիւնս
լեզուի իւրոյ, և թէ որ ոճ նոցա որում 'ի
մերոցս համեմատիցի: Օ գտակարագոյն ևս
լիցի բաղդատութիւնս այս, եթէ ընտրես-
ցին և 'ի սուրբ գրոց ընտրելագոյն մատե-
նադրեալքն և թարգմանեալք, որպէս
Գործք առաքելոցն, աւետարանն Ղու-
կայ, Իմաստութե գիրքն և Յուդիթայ ևն:

Հ. Արպէս մարթ իցէ ստանալ զյիշո-
ղութիւն, և ուսանել ինչ զիւրաւ 'ի բերան.

Պ. Արպէս ամենայն զօրութիւնք մտաց
վարժիւք և կրթութեամբ առաւելուն,
այսպէս և յիշողութիւնն. նմին իրի ոչ է
պարտ թողուլ երբէք անգործ զյիշողա-
կանն զօրութիւն, այլ ստէպ ուսանել 'ի բե-
րան զհատուածս ինչ ճառից կամ քերթուա-
ծոց զեղեցիկս, և ստէպ արտասանել զայնս:

Արկրորդ՝ նախ քան զուսանելն ինչ 'ի
բերան քննել զմասունս նորա, և 'ի միտ
առնուլ զիմաստս:

Արրորդ՝ եթէ երկայն ինչ իցէ, բաժանել զայն 'ի մասունս :

Չորրորդ՝ ինքնին զրել զուսանելիսն, և մի փոխել զգրեալն. զի ձեք իսկ զրուածոյն և եղծուածք օգնեն յիշողութեան :

Հինգերորդ՝ 'ի սկզբան անդ մի 'ի ձայն, այլ ըութեամբ ուսանել, և ապա բարձրաձայն յեղյեղել զուսեալն :

Վեցերորդ՝ ուսանել յանօթուց և ընդ առաւօտս դեռ անխոնջ մտօք, մինչև ծանրացեալ 'ի խորհրդոց :

Նօթներորդ՝ յերեկոյի նախ քան զմտանել 'ի մահիձս ընթեռնուլ զուսանելիսն միանգամ կամ երկիցս մտադրութեամբ, զի զիշերային հանդստեանն 'ի վերայ եկեալ՝ խորադոյն տպաւորէ զայնօսիկ 'ի միաս :

Ութերորդ՝ օգնեն և նշանք ինչ արտաքինք 'ի յիշեցուցանել զուսանելիսն :

Այլ առաւել քան զամենայն զգաստ կեանք և հանդարտութիւն մտաց, որ և առ ամենայն ազգի ազգի վարժս զխտութեանց և հանձարոյ անհրաժեշտ կարեւորք են :

ԴԱՍ ԻԶ

Տրամաբանական Ձեռնարկք . — Հաւա-
քաբանութիւն . — Հնարք :

Հ . Աւելորդք ուրեմն իցեն տրամաբա-
նին ցուրտ և տաղակալի ձեռնարկք, զի
ասա ճարտասանն հղօրագոյն ևս համոզէ
հանդերձ զուարճութեամբ 'ի ձեռն ձեռոյն
և հնարից արուեստին .

Պ . Արդարև հոետորականին ձևք և
հնարք օգնեն յոյժ 'ի համոզել, այլ առանց
տրամաբանութեան զի անկենդան է ճար-
տասանութիւն, և շունչ իմն և հոգի նորա
են ձեռնարկութիւնք բանական արուես-
տին . որպէս զի յեղանակ բացատրութեանն
և եթ զանազանին տրամաբանն և ճարտա-
սան . զի ուր նա կարգաւ զառաջարկու-
թիւննն դասէ, և ակն յանդիման սլատ-
րասաէ զվարմնն, սա վեր 'ի վայր փոփո-
խէ զկարգն, և սեթեթիւք զվարմնն ծած-
կէ, ոչ խրտուցանելով զօրսն :

Հ . Ի՞բր ասպա յօրինէ ճարտասանն զհա-
ւաքաբանութիւն .

Պ . Հաւաքաբանութիւնն է ձեռնարկու-
թիւն, յորում 'ի դնել երկուց առաջարկու-
թեանց՝ հարկաւ երրորդ իմն յառաջ դայ :

Արդ զոր սլարան էր տրամաբանին կար-
գել այսպէս ,

Մեռանի այն՝ որ կենսաւորն է . Իսկ կը-
րակն չէ կենսաւոր , Ապա և չմեռանի ,
այսպէս կարգէ զայն Աղիշէ վարդապետ
’ի ձև ճարտասանական .

Մեռանի այն՝ որ շնչէն և շարժի և գնայ
և ուտէ և ըմպէ .

Արք տեսեր դու զկրակ գնայուն կամ
խօսուն կամ գիտուն .

Արդ զոր կենդանի քո չէ տեսեալ , մե-
ռեալ խոստովանիս :

Աւ Ոսկեբերան զհաւաքաբանութիւնս
զայս ,

Կեղծաւոր է , որոյ գործք հակառակք են
բանիցն .

Իսկ արդ դու զամենայն ցոյցս ուրախու-
թեան ’ի քեզ բերես , յորժամ ասեսզ առ

Աստուած ’ի սուգ և ’ի տրամութեան կալ ,
Ապա կեղծաւոր ես , և խաբել հնարիս

զԱստուած ,
այսպէս յօրինէ ’ի ձև ճարտասանական .

« Օհնչ գործես , մատուցեալ Աստուծոյ
« աղօթս մատուցանես , և շուրջանակի

« կուռ յոսկի համակիս , ’ի հիւսս ոսկե-
« մանս ընդելուզեալս մարդարտով : Մի

« թէ ’ի կաքաւ իջանես , ’ի պար անցանի-
« ցես , միթէ ’ի հարսանիս խնձղայցես ,

« միթէ 'ի դեղօն յառնիցես և 'իցոյց շպա,
« րիցիս . անդ պիտոյ է ոսկին և մարգա,
« րիան ընդելուզեալ, անդ հանդերձքն պա,
« ճուճեալք, անդէն զարդուցն ոայք և ժա,
« մանակ մենթանաց , անդ սեթևեթել ,
« և անդէն պերևեթել . ասա չէ այնմ ժա,
« մանակ, և ոչ սէտք ինչ այնպիսիք : Պա,
« զատել եկիր, խնդրուածս մատուցանել ,
« աղերս վասն մեղաց արկանել, ընդ յան,
« ցանացն եղձանալ, 'ի հաշտութիւն ա,
« ծել զաէրն . զի՞ զարդարիցես զանձնդ,
« չեն այդպիսի կերպարանք խնդրուածոց :
« Օ իարդ կարիցես հեծել, կամ սրպէս
« յողոց հանել և արտասուս արկանել ,
« զիարդ հաչելով հառաչելով զաղօթն
« մատուցանիցես : Յորժամ այդպիսի կեր,
« պարանս ունիցիս և արտասուիցես, ծաղը
« կայցես բազմաց և կատականք տեսո,
« զաց : Չմարթի, յոսկի համակեալ, և
« արտասուս արկանել, խաբէութիւն դոր,
« ծես, կեղծաւորութիւն ցուցանես : Յոր,
« ժամ 'ի նոյն մտաց, ուստի այնչափ պա,
« ճուճանք և զարդարանք ծնանին, և ար,
« տասուք և ս վիժիցեն, չէ 'ի դէսլ, չէ հա,
« ւատալի : Ի բայց առ զայն կեղծաւորու,
« թիւն, քանզի չկարես զԱստուած խա,
« բել . վարձակացն և կաքաւչացն են այն,
« պիսի կերպարանք » :

Հ. Որպէս յօրինէ ճարտասանն զհնարս .

Պ. Հնարքիոչի՛ ի տրամաբանից հաւարաբանութիւն անկատար . յորում միակ առաջարկութեան ՚ի վերայ ածեմք զհետևութիւն , ընդ լուծեամբ թողեալ զմիւսն իբր ծանօթ . զոր օրինակ .

Համահայր և համամայր որդիք եմք .

Եւրա չէ սլարս մեզ հակառակ լինել միմեանց :

Երդ զայս ձեռնարկութիւն այսպէս ՚ի ձև ճարտասանութեան ածէ Աղիշէ վարդապետ .

« Եի է մայր մեր եկեղեցի , որ երկնեայն
« զմեզ , և մի է հայր մեր սուրբ Հոգին ,
« որ ծնուն զմեզ . զիարդ համահարք և
« միոյ մօր որդիք երկալառակք լինիցին և
« ոչ միաբանք » :

Դարձեալ զհնարս զայս . Աչ միայն խօսել ընդ Աստուծոյ կայ մեր առաջի , այլ և շօշափել և ճաշակել զնա . ապա սլարտիմք մաքրել զամենայն անդամս մեր , այսպէս կազմէ Շնորհալի ՚ի ձև ճարտասանական :

« Օ՛ի ոչ միայն խօսել ընդ Աստուծոյ ըստ
« Մովսեսի կայ մեր առաջի , և կամ տեսանել
« գլխոյսն Աստուծոյ , այլ և ձեռք
« շօշափել զանշօշափելին , և շրթամբք
« համբուրել զսէրն , և բերանով ճաշակել

« զկերակրիչն ամենայնի, և 'ի սիրտս ըն-
« դունել և հոգւով միանալ ընդ նոյն, և լի-
« նել աստուած շնորհօք՝ ընդ Աստուծոյ
« միաւորելովն: Ասան որոյ զտեսանելիս և
« զլսելիս և զլեզու և զամենայն անգամ
« խրատեցէք 'ի բարիս շարժել, 'ի չարիս
« անշարժ մնալ, և ողջախոհոյ թեամբ և
« սրբութեամբ յաշխարհական ցանկու-
« թեանց և զբօսանաց զմիտս ամփոփե-
« լով, և ասլա յերկնային խորհրդոյն սպա-
« սաւորութիւն մերձենայցէք »:

Եւ Սսկեբերան դարձեալ զհնարս զայս.
« Անջեցեալքն 'ի տէր հանգչին մանաւանդ
« և պսակին, ասլա չէ պարտ տրտմել ընդ
« մահ նոցա, այսպէս ճարտասանէ .

« Այլ հեծեն միշտ միտք դառնապէս, եթէ
« յո՛ւ եհան զմեզ Քրիստոս, և յո՛ւ իջուցաք
« մեք զանձինս, յորժամ տեսանիցեմք զկո-
« ծողս 'ի հրապարակս և զձիչ և զաշխա-
« րանս 'ի վերայ մեռելոց, զիւրդ խայտա-
« ռակեն զանձինս ողբովք և կական բառ-
« նալով: Թէ հաւատայք, ամաչեմ 'ի հե-
« թանոսաց և 'ի Հրէից և յայլաղանդոց,
« և յամենեցունց իսկ առ հասարակ, որ
« զայն տեսանեն, զմեզ ծաղր առնեն: Եւ
« որչափ ասիցեմ այնուհետեւ, ընդ վայր
« ասեմ վասն յարութեան, և որչափ ճար-
« տարիցեմ ինչ, ոչ ընդ իմ բանսն հային

« Հեթանոսք, այլ ընդ ձեր դործսն, և ան-
« դէն վաղվաղակի ասիցեն. Ա՛վ որ 'ի սո-
« ցանէ կարիցէ զմահ արհամարհել, որ
« ոչ և զայլոց մահ կարիցէ տեսանել: Բար-
« ւորք են բանքն՝ որ 'ի Պօղոսէ ասացան,
« բարւորք և երկնից արժանի և Մատուծոյ
« մարդասիրութեանն. Ար ասրեցուսցէ
« զայնոսիկ՝ որ հանապազ մահուն երկիւ-
« ղիւ կէին, և 'ի վտարանդի էին 'ի ծա-
« ոայութեան: Այլ շտայք այնմ հաւա-
« տարիմ լինել դուք, որ դործովքդ մար-
« տրնչիք ընդ բանսն, թէպէտ և Մատուծ
« բազում անդամ արգել 'ի մարդկանէ, զի
« բառնայցէ 'ի միջոյ զայնպիսի չար սովո-
« թութիւնն: Այլ արդ աղէ ասա՛, զինչ յայտ
« առնիցեն կանթեղքն և մոմեղէնք լու-
« ցեալք. ո՛չ ապաքէն իբրև զնահատակս
« յուղարկեմք: Օ՛րնչ ինչ յայտ և օրհնու-
« թիւնքն առնիցեն. ո՛չ ապաքէն զՄատուծ
« փառաւորեմք և զօհանամք՝ թէ այսու-
« հետև պսակեաց զգնացեալսն, և ազա-
« տեաց յաշխատութեանց, և հան յան-
« յայտ աշխարհէ, առ իւր պահել զետեղ
« և անարատ: Ա՛չ վասն այսորիկ են օրհ-
« նութիւնքն և սաղմոսիցն պէսպէս նը-
« ւաղքն, և այն ամենայն յուրախութենէ
« սրաիցն յայտ առնին. Աւրախ որ իցէ,
« ասէ, սաղմոս ասիցէ »:

ԴԱՍ ԻԷ

Մակաժութիւն .— Յարացոյց :

Հ . Արպէս կազմէ ճարտասանն զմա-
կաժութիւն .

Պ . Մակաժութիւն կոչի 'ի տրամաբա-
նից ձեռնարկութիւնն , յորում առաջա-
դրեալ զիրս աներկբայելիս զանձնիւր տե-
սակաց սեռին կամ զանհատից տեսակին ,
ապա հաստատեմք զնոյն զբովանդակ սե-
ռէն կամ զտեսակէն . զոր օրինակ Տղայոյ ,
մանկան , սրտանւոյ , երիտասարդի , առն ,
ծերոյ և զառամելոյ իւրաքանչիւր կարիք
են . ապա և ամենայն հասակաց կարիք են :

Բայց ճարտասանին ոչ են սլարտք մի-
րսա միոջէ զամենայն մասունս թուել , այլ
համարձակագոյն վարի ձեռովս : Արպէս
'Արեկացին փոխանակ ասելոյ՝ չիք ոք որ
առանց ուղղչի կամ օժանդակութեան կա-
րացէ զործել ինչ , ապա և ոչ ես առանց
կամացն Աստուծոյ , այսպէս յօրինէ զբանն .
« Օ՛րի ոչ երբէք հարթ ընթանայ երիվար՝
« առանց սանձակալի , և ոչ նաւ համ-
« բառնայ հանդէպ՝ առանց ուղղչի , և ոչ
« արօր կշիռ ինչ զործէ՝ առանց մաճակա-
« լի , և ոչ երկուորեակք լծոցն 'ի ճահ ձե-

« մնացեն՝ առանց եզողի, ոչ ամպ վերա,
« չուէ՛ առանց հողմոյ, ոչ աստեղք ցնդին
« կամ զումարին՝ առանց ժամանակի, ոչ
« արեգակն փոխաբերեալ շրջանակի՝ ա-
« ռանց տարրական օղոյ, և ոչ ես նոքօք
« հանդերձ, առանց բարեգործիդ հրա-
« մանաց ակնարկութեան » :

Եւ Ասկեբերան ՚ի լրմանէ ամենայն կան-
խասացութեանցն Քրիստոսի մակաժու-
թեամբ զհետ բերէ և զհանդերձեալ լրու-
մին կանխասացութեան կատարածի աշ-
խարհիս այսպէս .

« Բազում ինչ յառաջագոյն ասաց Քրիս-
« տոս . և եթէ չել այն ամենայն ՚ի զը-
« լուխ , մի հաւատայցես այլոցն ևս
« բանից . և եթէ ելին ՚ի զլուխ և կա-
« տարեցան , ընդէր երկմտիցես ՚ի մնացե-
« լոցն : . . Ասաց Քրիստոս՝ եթէ Արու-
« սաղէմ առցի , և այսպիսի աւերածով
« աւերեսցի . և ել ՚ի զլուխ կանխասա-
« ցութիւնն : Ասաց՝ եթէ եղիցի նեղու-
« թիւն մեծ , և եղև : Ասաց՝ թէ որպէս
« մանանիխ սերմանի , այնպէս տարածես
« ցի քարոզութիւնն . և զնոյն տեսանեմք
« հանասպազ ընդ ամենայն աշխարհ ըն-
« թացեալ : Ասաց՝ եթէ որք թողուցուն
« զհայր կամ զմայր կամ զեղբարս կամ
« զքորս , ունիցին հարս և մարս . և զայն

« արդեամբք իսկ տեսանեմք կատարեալ :
« Ասաց՝ եթէ յաշխարհի աստ նեղութիւն
« հասանիցէ ձեզ, այլ քաջալերեցարուք,
« ես յաղթեցի աշխարհի, այսինքն է՝ թէ
« ոչ ոք իցէ որ ձեզ յաղթիցէ. և զայս ար
« դեամբք իսկ տեսանեմք ելեալ ՚ի գլուխ :
« Ասաց՝ եթէ դրունք դժոխոց ոչ յաղթա
« հարիցեն զեկեղեցի, և այն զի ՚ի հալա
« ծանսկայցէ, և ոչ ոք իցէ՝ որ շիջուցանիցէ
« զքարոզութիւն, վկայեաց և այսմ կանխ
« ասացութեան փորձ իսկ իրայն, թէ
« պէտ և կարի առանց հաւանութեան էր
« յորժամ զայս ասէր : Բնդէր զի ամենայն
« բանք էին, և չև ևս հանդէս ցուցանէր
« բանիցն. որպէս զի կարի իսկ հաւատալի
« եղև այժմ : Ասաց՝ եթէ յորժամ քարո
« զեսցի աւետարանս ընդ ամենայն հե
« թանոսս, ապա եկեսցէ կատարած : Ա
« հաւասիկ այսուհետև մօտ ՚ի վախճան
« եկաք հասաք, քանզի ՚ի մեծ մասն աշ
« խարհիս քարոզեցաւ աւետարանն, այսու
« հետև եկն եհաս կատարած, երկիցուք
« սիրելիք » :

Հ. Արպէս կազմէ ճարտասանն զյա
րացոյց.

Պ. Յարացոյցն է մակաժութիւն ան
կատար, զի ՚ի նմանուոյ այլ ինչ նման գու
շակեմք նովաւ. զոր օրինակ Պօղոս զհա

լածիչսն օրհնեաց, ապա և քեզ աշակերտի նորա զնոյն պարտ է առնել :

Արդ զայս ձեռնարկութիւն այսպէս յօրինէ Ամբրոնացի .

« Պօղոս բամբասերոցն ընդդէմ օրհնեաց,
« զհալածիչն յանձն առ, 'ի հայհոյելն ա-
« զաչեաց, և այնպիսի մաղթանօք զտիե-
« զերս աշակերտեաց : Օքեզ հետևող
« նորինո՞ ուսոյց չարին չար հատուցանել » :

Սովին ձևով Ասկերբերան 'ի պատժոցն՝ զոր կրեցին Հրեայք, ցուցանէ զհանդերձեալ պատուհաս հաւատացելոց .

« Օտղայաբարոյսն՝ որք ոչ այնչափ ինչ
« յանցեան՝ այնպիսի տանջեաց, և 'ի մեզ
« խնայիցէ՞, այլ չէ ինչ 'ի դէպ այս : Թէ-
« պէտ և զնոյն մեղս զնոցայն մեղանչեմք,
« մեծամեծ տանջանաց քան զնոսա ար-
« ժանի եմք : Մ'չդէ՞ր, զի 'ի բազում շնորհս
« իսկ վայելեալ, յորժամ աւելի ևս և մե-
« ծամեծ քան զնոցայն յանցանիցեմք, որ-
« պիսի՞ ինչ պատիժս ոչ կրիցեմք : . . Աս-
« միս և այլ ևս ինչ լսել, սրչափ ինչ վիշ-
« տրս 'ի պաղեստինացւոց աշխարհին կրե-
« ցին, սով, սուր, պատերազմուհաս, գե-
« րութիւն 'ի բաբելացւոցն, յասորեստա-
« նեացն, 'ի մակեդոնացւոց, և անհնարին
« չարիս 'ի հաղբիանոսէ և 'ի Ալեսպիանո-
« սէ : . . Ասմիս և զայլոց ևս չարեաց նոցաու-

« սանել. ընդ Յովսեփայ գիրսն անց, և
« անտի ուսանիս զամենայն աղէտս նոցա:
« Էւ արդ հաւանեցուցաք արդեօք զձեզ
« յայսմ ամենայնէ՝ եթէ գոյ գեհեն: Օ՛մը
« տաւ ած, զի թէ նոքա տանջեցան, մեր
« ընդէր չպատժիցիմք. կամ զիարդ չիցէ
« ՚ի դէպ մեզ պատժել, որ սաստիկ քան
« զնոցա յանցանս յանցանեմք, եթէ յայտ
« իսկ չէ՝ վասն զի պահեալ կան մեզ պա-
« տիժքն » :

ԴԱՍ ԻԸ

Համաբարդութիւն. — Երկայրաբանութիւն:

Հ. Արդէս կաղժէ ճարտասանն զհա-
մաբարդութիւն.

Պ. Համաբարդութիւն կոչեն տրամա-
բանք զշար բանից, որ այնպէս յեռեալ և
կապեալ են ընդ միմեանս, զի որ ՚ի վերայ
յետին ենթակային ածի հետևութիւն՝
նոյն հաստատի զառաջնոյն: Օ՛ր օրինակ
կամեցեալ ցուցանել զանմահութիւն հոգ-
ւոյ, ասեմք. Հոգին է պարզ, պարզն է
առանց մասանց, որ առանց մասանց է՝
անբաժանելի է, անբաժանելին է անապա-
կան, անասլականն է անմահ ՚ի բնէ. ասլա
հոգին է անմահ ՚ի բնէ:

Արդ զսոյն ձև և ճարտասանն 'ի կիրարկանէ առաւելագոյն համարձակութեամբ. որպէս Վամբրոնացի առ 'ի ցուցանել զի առ ստացումն և պահպանութիւն հաւատոց՝ կարևոր է արհամարհել զհանգիստ և զփառս մարմնոյ, ասէ.

« Օ՛րհ հոգևոր խորհուրդ է և ոչ մարմնաւոր. զհոգւոյ կամս պարտ է սորին հաւատոց հաւանեցուցանել և ոչ զբարբառ բերանոյ. և հոգին ոչ հաւատաց առանց հոգեպէս տեսութեան. և հոգւոր տեսութիւն ոչ լինի առանց իմաստութեան. և իմաստութիւն ոչ հաստատի սռանց բանաւորապէս առաքինութեան. և բանաւոր առաքինութիւն ոչ ուղղի առանց մարմնոյս հանգստեան և փառաց արհամարհութեան » :

Գրեթէ սովին ձևով ցուցանէ և Ոսկերբերան, զի խոնարհն պատրաստ գտանի առ ամենայն վիշտս և բամբասանս.

« Վասն այնորիկ վիշտ յառաջնմէն յաջորդսրն յառաջագոյն հորդէ ճանապարհ պատուիրանացն, իբրև շար իմն ոսկի սողեալ մի ըստ միոջէ զպատուիրանան։ Օ՛րհ յորժամ խոնարհ որ իցէ, յայտ է թէ 'ի սուղ է վասն մեղացն. իսկ որ սղաւորն իցէ և հեզ, յայտ է թէ արդար է և ողորմած. իսկ որ ողորմածն է և ար-

« դար, յայտ է թէ մտախոհ և սուրբ սրբ
« տիւ է : Իսկ այնպիսւոյն պատշաճ է,
« զի խաղաղարար ևս իցէ : Իսկ որ զա
« մենայն զուղղութիւնսն յանձին ցու
« ցանիցէ, այնպիսին և առ ճգնութիւնսն
« պատրաստագոյն գտանի, և ոչ ինչ խոռ
« վի՛ յորժամ լսիցէ բանս բամբասա
« նաց, և ոչինչ զանգիտէ՛ յորժամ բիւր
« չարչարանս յանձին կրիցէ » :

Տ. Արտէս կազմի երկսայրաբանու
թիւն ՚ի ճարտասանից .

Պ. Արկսայրաբանութիւն կոչեն արա
մաբանք զձեռնարկութիւն կազմեալ յեր
կուց ներհական առաջարկութեանց, որոց
չիք միջին ինչ : Արպիսի է հռչակաւոր երկ
սայրաբանութիւնն Տերտուղիանոսի առ
Տրայիանոս կայսր, որոյ պատուէր տը
ւեալ էր՝ մի ևս ՚ի հարցփորձ քննութեան
մատուցանել զքրիստոնեայս . իսկ եթէ
յայտնեսցին, պատուհասել զնոսա :

« Առ մ՛ վնասապարտք են, ասէ, քրիստո
« նեայքդ և կամարդար . եթէ վնասակար,
« ընդէր արգելուս ՚ի հարցափորձէ. իսկ
« եթէ արդար, հիմ՞ դատապարտես » :

Այսպիսի երկսայրաբանութեամբ Աար
զիս վարդապետ յորդորէ ՚ի համբերու
թիւն զբամբասեալս .

« Աթէ որ բամբասեացն զքեզ՝ սուտ ասայ

« որքան ինչ միանդամ ասաց . զինչ առ
« քեզ ասացեալքն , ո՞չ ապաքէն 'ի նորա
« զլուսն կուտի ամբաստանութիւնն՝ որ
« բամբասեացն : Ապա եթէ յիրաւի բամ-
« բասեցար , առ քեզ է գայթակղութիւնն՝
« որով բամբասեցարն : Ապա յերկոսին կող-
« մանսն չէ պարտ քեզ ընդդէմ՝ ասել ինչ ,
« և ոչ բամբասանացն փոխարէն բամբա-
« սել » :

Այսպէս և Ասկեբերան կարճէ զբամ-
բասանս ընդդէմ մուրողաց , ցուցանելով
զի թէպէտև 'ի հայրենի ժառանգութենէ
ուր և թէ 'ի վաստակոց իւրոց կերակրիցի ,
սակայն չպարտի անդոսնել զմուրողս վա-
սըն անդործութեան , այլ ողորմել նմա .

« Աւերանի թէ այսչափ միայն , այլ վազ-
« վաղակի չարախօսութիւնք և բամբա-
« սանք յառաջ մատչին զմուրողէն : Անդ-
« էր չգործիցես , ասեն , և ընդէր դա-
« տարկ հաց ուտիցես : . . Աղէ ասա , դու
« 'ի գործոց ունիս զինչ ունիսդ . ո՞չ ապա-
« քէն զհայրենի ժառանգութիւնն առեր :
« Իսկ եթէ զի գործեսն՝ վասն այնորիկ
« զայլս նախատիցես , չսիցես Պօղոսի՝ որ
« ասէրն . զի յետ ասելոյն՝ եթէ Ար ոչն
« գործիցէ , և կերիցէ մի , ասէ . հայց
« դուք զբարիս գործել մի ձանձրանայք » :

ԴԱՍ ԻԹ

Ազգի ազգի շարագրածք. — Քարոզ. —
Պատմութիւն. — Թղթագրութիւն :

Հ. Համառօտեւջիր. ինձ որ ինչ ազգի
ազգի շարագրածաց սեփական կանոնքն
իցեն, և նախ զկարևորս բեմախօսութեան
կամքարողի .

Պ. Քարոզ է բան յորգորական յուղ
ղութիւն բարուց . և զի առանց հաւանե-
ցուցանելոյ զմիտս չէ մարթ յորգորել զոք,
ապա ընդ միտսն նախ պարտ է մաքառել :

Պարտ է հոգևոր բեմբասացութեան
գոլ հանգարտ և եռանդուն. հանգարտ,
զի մեծութիւն իրացն պահանջէ զայն . իսկ
եռանդուն, զի ճառէ զկարևորաց առ բա-
րութիւն մարդկան : Այսն որոյ պարտ է
բեմբասացին յանձին բերել զօծութիւնն
զայն խորազգած ճշմարտութեանցն՝ զորոց
ճառէ, և զիզձս քաջ տպաւորելոյ զայնու-
սիկ 'ի սիրտս ունկնդրաց :

Պարտ է նմա զօգտակարաց հոգւոյ և
զպատշաճից ունկնդրացն ճառել . մի զու-
սումնական իրաց, մի զիմաստասիրական
մանրախոյզ քննութեանց, մի զաեսական
խնդրոց անձաբանութեան, և մի ընդդէմ

անհաւատից և անկրօնից յարդարել զճառսրն . զի քարոզի բանին առ հաւատացեալս պարտ է ճառել, որոց աներկբայելի իցեն ճշմարտութիւնք կրօնից, և միայն պէտք իցեն խելամտագոյնս հաւանեցուցանել զնոսա և յորդորել ՚ի կատարումն այնոցիկ :

Արեւորագոյն կանոնք հոգևոր բեմասացութեան են .

Ա . Պահել զմիութիւն . այսինքն զի բովանդակ մասունք նորա ՚ի մի ինչ ունիւցին զպիտաւորութիւն :

Բ . Մանաւորել զնիւթն . այսինքն զի թէպէտ և բարւոք է և հասարակաբար ճառել զհնազանդութենէ կամ զայլոց առաքինութեանց, բայց լաւագոյն ևս է ամփոփել զնոյնս, և մանաւորաբար ճառել զհնազանդութենէ առ ծնօղս, ևն :

Գ . Ոչ է պարտ ջանալ ՚ի ստրուել զամենայն, որ ինչ մարթ իցէ ասել զառաջարկեալ բնաբանէն . այլ յամենայնէ անտի զկարևորս և զզօրաւոր բանս, զի մի յափրացեալ տաղտկասցին ունինգիրք :

Դ . Պարտ է մանաւանդ ՚ի զործնականս իջանել, և ճառել զիրաց՝ որ հանապազօր զործին առ մարդիկ : Օ՛ի ոչ այնպէս օգուտ է տեսականաբար ճառել զառաքինութեանց և զախտից, որպէս նկարագրել զայնս ՚ի մարդիկ, որով իւրա-

բանչիւր ոք հանգոյն նկարագրեալ սլատիւ-
րին տեսանելով զանձն, տպաւորագոյն ևս
կրէ ազդումն ՚ի բանիցն: Սմին իրի օգնեն
յոյժ և պատմական օրինակք ՚ի սուրբ գրոց:

Ե. Սի ձևս նորահարս կամ քերթո-
ղական տարազս բանի կամ զոճ իմաս-
տասիրական և զտրամաբանական ՚ի կիր-
առնուլ, զի պարտ է ոճոյ հոգևոր բեմա-
սացութեան լինել պարզ և ինքնազարդ,
պատշաճեալ առ ամենայն ունկնդիրս, և
զիւրիմաց ամենեցուն: Աւ ուր ուրեք առ
եռանդեան փոխաբերութիւնք և այլ ևս
ձևք ճարտասանականք ՚ի ճահ գայցեն,
պարտ է առանց արուեստակութեան ՚ի
կիր առնուլ զայնս. զի նողկալի է ՚ի քա-
րոզ բանին իղձ հաճոյ լինելոյ ունկնդրաց,
և զոյց պերճութեան բանից:

Զ. Օբանս սուրբ գրոց մի բռնազօ-
տել, և մի զանյայտս և զգժուարիմացս
ածել ՚ի վկայութիւն, և մի դարձեալ ՚ի
յայտնիս և յանժխտելի իրս յաճախել վկայ-
ութիւնս ՚ի սուրբ գրոց:

Շ. Օյնչ ինչ կարևոր է պատմագրի.

Պ. Պատմութիւն է ճշմարտապատում
յիշատակութիւն անցից անցելոց առ ՚ի
հրահանգ և ՚ի հմտութիւն մարդկան:

Ա. Պարտ է պատմագրի շունել կող-
մաւորութիւն:

Բ. Աչգամենայն դէպս պարտ է նմա անխրտիր տալ ՚ի դիր, այլ զերևելիս յայնցանէ զցանկալիս ՚ի գիտութիւն և զօգտակարս առ ՚ի խրատ, և զայնոսիկ հանդերձ պատճառօքն և արդասեօք ստուգապատում առնել :

Գ. Մի հանդէս առնել հանճարոյ՝ սնուտի զարդուք և կամ աւելորդ խելամտութեամբք, այլ զկարևոր խելամտութիւնս իսկ խառն ընդ պատմութեանն անզգալի առնել, և մի ուրոյն ՚ի զլուսս կարգել զայնս :

Դ. Պահել կարգ և միութիւն ՚ի պատմութեանն, և մի սաէսլ դրուագօք բանի հատուկտիր առնել զայն :

Ե. Պարզ և բացայայտ ունել ոճ, առանց զծծութեան բանից, և քաջ նկարագրութեամբք իբրև ՚ի պատկերի ցուցանել զբարս ազգաց և զիւրաքանչիւր ուրուք, զախտս նոցա և զառաքինութիւնն, զձևս քաղաքաց և զտեղեաց, զօրէնս, զկրօնս, զսովորութիւնս, այլովքն հանդերձ :

Զ. Մի կարի երկայնաբան գոլ և մի յոյժ կարճաուօտ, այլ ՚ի միջասահմանին կալ՝ յերկուցունցն ևս խոյս տուեալ ՚ի ծայրայեղ խոտորմանց, որ տաղտկալի կամ անալի առնեն զպատմութիւնն :

Վարդանանցն պատմութիւն ուսուցէ
քեզ զայս ամենայն :

Տ. Օ՛րինչ ինչ կարևոր է թղթադրու-
թեան .

Պ. Ըյն ամենայն որ 'ի խօսս ընտանե-
կանս է կարևոր . այսինքն է պարզութիւն,
բնականութիւն առանց ամենայն արուես-
տակութեան, եռանդն, և համառօտու-
թիւն հանդերձ ընտիր ոճով և կիրթ ախոր-
ժակօք :

Պարտ է ամենայն ուշիւ միտ գնել 'ի
դրել զթուղթս, և թաղուցանել ամենևին
զմտադրութիւնն :

Պարտ է ըստ առաջարկութեան իրացն
փոփոխել 'ի սմա զախպս կերպարանաց
բանից, առաւել քան յայլ ամենայն ազգս
շարագրածոց : Ըն այս վարժապետ վեհա-
դոյն լիցին Շնորհալոյ թուղթքն :

ԴԱՍ Լ

Սկիզբն և զարգացումն ճարտասանութեան :

Տ. Ի ըրումն ճարտասանական հմտու-
թեանց ցանկալի է ինձ դիտել և զսկիզբն
և զզարգացումն այնոցիկ .

Պ. Սկիզբն ճարտասանական արուես-
տին եղև տիրապէս յԱշխարհ առ Եթեանա-

ցիս, որոց և կարգ տեսչութեանն օժանդակեաց ՚ի զարգացումն արուեստին. զիննդ ամենայն ինչ կարևոր սահմանէր ՚ի ժողովս. և ճարտարախօսք՝ որոց զօրաւորագոյնք էին բանք՝ նոքա իշխէին ՚ի ժողովս:

Պիսիստրատ ժամանակակից Սողոմնի. 528 ամօք նախ քան զթուականութիւն Փրկչին, առաջին ըստ Վրուտարքեայ ճարտարախօս անուանի եկաց առ Յոյնս. որ և ճարտարխօսութեամբն զօրացեալ՝ բրնակալեաց յԼթէնս:

Պերիկղէս, 450 ամօք նախ քան զթուաբերութիւն Փրկչին, ՚ի կատարումն էած զարուեստն յԼթէնս. որ և վասն հզօր ճարտարխօսութեանն կոչեցաւ Ողիմպեան, իբր որոտող հանգոյն Լրամազդայ: Օսմանէասեն յօրինեալ նախ զրով զատենախօսութիւն:

Օհետնորա յաւուրս պեղոպոնեսական մարտին յարեան Աղէոն, Լլկիբիադ, Արիտիաս և Թերամենէս: Ի նմին ժամանակի եկաց և Թուկիդիդէս պատմադիր:

Յետ ժամանակացն Պերիկղեայ յարեան իմաստակք ոմանք հռետորք անուանեալք, որ աղաւաղեցին զարուեստն ճամարտակութեամբ ճառից. ՚ի սոսա անուանիք էին Վորդիաս, Վենտինոս, Պրոտագորաս, Պրոտիկոս և Թրասիմոս:

Մոյա հակառակ եկաց Սոկրատ, և նուրբ և պարզ ճարտասանութեամբն տապալեաց և նշաւակեաց զիմաստակութիւննոցա, և դարձոյց զարուեստն ՚ի սկզբնատիպն գեղեցկութիւնն :

Օհետ Սոկրատայ կացին Ղիւսիաս, Իսոկրատ և Իսէոս : Բայց Իսէոս առաւել Գեմոսթենեաւ աշակերտաւն իւրով եղև անուանի :

Գեմոսթենէս, քաջն և վեհազոյն ՚ի հելլեն ճարտարախօսս, եկաց 340 ամօք նախքան զԹուականութիւնն Փրկչին : Ղիպն նորա ՚ի վարժս ճարտարխօսութեան, չվհատել ընդ ձախող ելս նախընծայ ճատիցն, երկայնամտութիւնն ՚ի յաղթել ամենայն խափանաց՝ զորս բնութիւնն ընդդէմ եղեալ էր նմա, սորամուտ բնակութիւնն նորա ընդ երկրաւ՝ առ ՚ի պարապել անգրաղ յուսումն արուեստին, արտասանութիւնք նորա բարձրագոչ ՚ի ծովեզերս ընդդէմ մրրկալից ալեաց՝ առ ՚ի սովերել աղմկի բազմամբոխ ժողովրդեան, խիճ ՚ի բերանի ունել՝ առ ուղղելոյ զթլուատ լեզուին թերութիւնն, սուսեր ՚ի վերոյ ուսոցն ՚ի կախ ունել՝ առ ՚ի բաց բառնալոյ զսովորութիւնն ընդոստ ընդոստ խաղալոյ թիկանցն յարտասանելն, այս ամենայն քաջալերեն զհամբախ հռետորականին յաջողելոյ ՚ի վարժս

օրինակաւ այնորիկ, որ անյարմարագոյն
դռով արուեստին՝ կրթութեամբ և ջանիւ
վեհագոյն ՚ի ճարտարախօսս դտաւ :

Դեմոսթենի ոսոխ նախանձընդդէմ
եկաց Ասքինէս, ճարտարախօս քաջ, այլ
ոչ եթէ հաւասար նմին : Յետ սոցա ոչ
ոք ընդ ամս յիսուն անուանի եկաց մինչև
ց՝ Դեմետր փաղերացի, այլ և սորա ոճ
պերճ և բազմազարդ՝ թափուր էր ՚ի զօ-
րութենէ :

Իսկ յետ Դեմետրի և ոչ յիշատակաց
ոք արժանի եկաց, մինչև հռոմայեցւոց
նուաճեալ զԱլլադա, ընդ զեղարուեստս
ամենայն փոխեցին և զճարտարախօսութիւն
առ իւրեանս :

Ի նոցանէ ճարտարախօսք երևելիք կա-
ցին Արասոս և Անտոնիոս, և զհետ նոցա
Աիկերոն, և նախանձորդ նորա Արտեն-
սիոս : Բայց վեհագոյն յամենեսին ՚ի
նոսա էր Աիկերոն, կացեալ իբր 50 ամօք
նախ քան զթուականութիւն Փրկչին, և
այնպէս զերազանցեալ յարուեստին՝ մինչև
ի զուղակչիւ կալ ընդ Դեմոսթենեայ :

Յետ Աիկերոնի՝ ի բառնալ ազատութեան
բարձաւ և պերճախօսութիւն ՚ի հռոմայե-
ցւոց, քանզի պակասեցին պէտք ատենա-
խօսութեանց, և ոչ ևս էր յորդոր զար-
գացման ճարտարախօսաց : Աւ ՚ի սպառ.


կործանեցաւ 'ի յաճախել զպրոցաց ճա-
մարտակացն , որ զանպոյից իրաց ճառս
արկեալ՝ պաճուճաբանէին : Այս ոճ 'ի
դիրս Սենեկայ սկսաւ նախ 'ի վեր երևել ,
և 'ի ներբողեանն Պլինիոսի 'ի Տրայիա-
նոս . յորում հռոմէականն ճարտարխօսու-
թիւն զօրհասականն իւր եցոյց ճիգն : Իսկ
'ի տարածանել քրիստոսական կրօնից , յա-
րեան վարդապետք եկեղեցւոյ առ լա-
տինացիս՝ Մինուտիոս Փելլիքս , Ալիտան-
տիոս , սուրբն Հերոնիմոս , Տերտուղիա-
նոս , սուրբ Ամբրոսիոս , սուրբ Օգոստի-
նոս , սուրբ Գրիգոր մեծն և սուրբն Ալեան :
Իսկ առ Յոյնս՝ սուրբքն Բարսեղ , Գրիգոր
նազիանզացի , Աստուածաբանն , Գրիգոր
նիւսացի , և վեհազոյն ամենեցուն՝ Ասկե-
բերան , պարծանք եկեղեցւոյ , որ սրբազան
ճարտարխօսութեամբ ընդ հեթանոսակա-
նին 'ի կոխ եկաց :

Ինչ սոսա՝ ի դէպ է յիշատակել և զմերս
Պրովերեսիոս , զորմէ Աւնարի ասէ դասա-
տու ճարտասանութեան 'ի չորրորդ դարու
կացեալ յԱթէնս , և վարժապետ սրբոյն
Գրիգորի Աստուածաբանի . և այնպէս
հոչակաւոր լեալ , մինչև կանգնել նմա
անդրի 'ի հռոմ , և թագաւոր ճարտարա-
խօսաց զնա անուանել :

Աւ ապա ընդ դարս տասն 'ի սպառ ան-

հետացաւ ճարտարխօսութիւն առ Յոյնս
և առ Վատինս, մինչ'ի Հայաստան մերքն
յաջորդէին զհետ աշակերտացն Սահա-
կայ և Եսրոսլայ Մանգակունին, Յոհան
խմաստասէր, Շնորհալին և Վամբրոնացի,
այլովքն հանդերձ: Որոց զրուածք ընդ
հրաշագան թարգմանութիւնս շարադրա-
ծոց սրբոց հարցն Յունաց կան մեզ առաջի
օրինակք նախանձելիք 'ի նմանութիւն, և
վարժակետք վեհագոյնք ճարտարխօսու-
թեան :





Յ ԱՆ Կ

Աղերսանք	65
Այլաբանութիւն	55
Անգամք սրարբերութեան	109
Անէծք	66
Աննմանութիւն	23
Անուանաստեղծութիւն	57
Անցումն	94
Առաջարկութիւն	13
Աստիճանք	101
Ատենական հանդէս	11
Արտասանութիւն	110
Արտաքին տեղիք	30
Արտուղութիւն	95
Աւելագրութիւն	44
Բաղմայեղանակ ձև	90
Բաժանորդութիւն	91
Բաժանումն սեռի	14
Բաղդատութիւն	25
Բաղխոհական հանդէս	11
Բացադանչութիւն	61
Բացադարձութիւն	75
Գործք և սլաոճառք	22
Դերանունութիւն	58
Դիմառնութիւն	76
Դարովանք	54

Երգիծանութիւն	53
Երկայրաբանութիւն	148
Զանցառութիւն	72
Զեղչումն	45
Ընդլայնումն բառիւք	98
— խմաստիւք	101
Թարգմանութիւն	133
Թուումն մասանց	17
Թղթագրութիւն	134
Լծորդք	20
Լռութիւն	71
Խեղամտութիւն	51
Կախումն	86
Կայրդական հանդէս	10
Կիրք	31
Հակադրութիւն	26
Հակադրութեան ձև	83
Հաղորդակցութիւն	70
Համաբարդութիւն	146
Հարցումն	68
Հաւաքաբանութիւն	136
Հեգնութիւն	52
Հնարք	139
Ձեք բառից	44
— խմաստից	47
Ճարտասանութեան սահման	7
— սկիզբն և զարգացումն	134
Ճարտասանութիւն ազգի ազգի	10
Մակագանչութիւն	62
Մակածութիւն	142
Յառաջաբանութիւն	12
Յարակից հանդամանք	29
Յարացոյց	144
Յիշողութեան կրթութիւն	134

Յուզնահոլովք	46
Յորդոր	31
Յուզումն կրկն	31
Նախապաշարումն	89
Նախընթաց և հետևորդ	29
Ներքին տեղիք	16
Նկարագրութիւն	78
Նմանաձայնութիւն	46
Նմանութիւն	23
Շարժուածոց կանոնք	112
Շնորհումն	73
Շրջաբանութիւն	58
Ոճ բարեխառն	121
— ըսկոնական	129
— ուսումնական	126
— պատմական	127
— պարզ	119
— վսեմ	115
Ոճոյ ընտրութիւն	125
— կրթութիւն	131
Ուղղութիւն	93
Չափազանցութիւն	60
Պատճառք և գործք	22
Պատմագրութիւն	152
Պատմութիւն	15
Պարբերութիւն	108
Պարզութիւն 'ի խօսս	7
Սահման	16
— ստորագրական	17
Սեռ և տեսակ	20
Ստուգաբանութիւն	19
Վերջաբանութիւն	36
Վստահութիւն	74
Տարակուսութիւն	63

Տէղիք արտաքինք	30
— ներքինք	16
Տեսակ և սեռ	20
Տրոհութիւն	110
Յուլյուսն	16
Փակագիծ	97
Փաստ	16
Փոխաբերութիւն	47
Փոխանունութիւն	50
Փոխառութիւն	55
Քարոզ	150

